

# NOTAGANAGAXI ANE IDÍ LUCAS

Lucas one dotowegi, Paulo lowoogotagi, codaa eliodi me lixigagatibece nigijo Paulo me diniwajetibece midiwataga eletidi iigotedi me yelogoditedibece nibodicetedi anele aneetece Jesus. (Awiniteloco miditaga Colossenses 4.14; 2 Timóteo 4.11, Atos 1.1).

Lucas agica aneetege noiigi judeu, codaa agicoa me nadi Jesus. Pida begelioditibece me yotaganega nigijo anodiotibece Jesus ajaagajo eliodo Jesus me diniigaxitece latematiko codaa me liigaxinaganegeco. Nagadi liwakate didikotibige ica goneleegiwa anodita Teófilo, goneleegiwa romaano anida nagatetigi.

Lucas yalagata lanikegi Jesus negepaagicota moyeloadi, codaa naga yewigatace. Yatemati Jesus meliodi me niwikodeteditiwace madewetedi, codaa wajekalodipi, inaa nigina oko iwikodadipi, inaa nigaanigipawaanigi. Eledi yatemati Jesus me igotedibeci minitaga oko abeyacagaga me yelogoditediogi nigina natigide Aneotedogoji me yemaa me iwilegi laalegenali codaa me iigi anee me newiça. Lucas eledi yalagata Jesus me yatemati natematiko anida ane iciaceeketetege me ikee Aneotedogoji me doletibige oko ananiatagipigi.

## Ane leegodi me dinidi nagadi notaganagaxi

(Atos 1.1-2)

**1** <sup>1</sup>Iniotagodi Teófilo. Eliodi oko dinoniciwagaditibigiwaji moiditedini nigijoa Jesus Cristo loenataka godiwigotigi. <sup>2</sup>Oidi nigijoa baanigijo monatematitogowa, nigidi anonadi nigijo maleekoka dinojogoti libakedi, codaa jogoditece latematiko ane icogotedigi miniwataga Aneotedogoji. <sup>3</sup>Igenaga monatematitediwa nigijoa odoejedi libaketedi, oada joanigidaa leegodi me jakadi mele me jidikotibigagaji, iniotagodi, ijoatawece nigijoa baanaga ixomagatedijo, ewi me ilagatedice. <sup>4</sup>Jidikotibigagaji, iniotagodi, amaleegaga owoogoti minoatawece ewi niginoa niigaxinaganegeco anabaatege.

## Ica aanjo dibodicaxinagatece lanikegi João Batista

<sup>5</sup>Nigijo Herodes, malee ninionigi-eliodi niigo judeutedi, onini ica goneleegiwa ane liboonagadi Zacarias, one sacerdoti ane libakadi ligeladi Aneotedogoji. Ida aneetege licogegi nigijo lapo sacerdotitedi ane liboonagadi

loiigiwepodi Abias. Aca lodawa liboonagadi Isabel, loiigiwepodi inaagina sacerdotitedi. <sup>6</sup>Zacarias aniaa Isabel idioka limedi mowo ane igenaga, codaa idokee mowo nigica ane yemaa Aneotedogoji. Idioka limedi modeemitetibige ijoatawece ane lajoinaganegeco codaa me liigenatakanegeco Goniotagodi Aneotedogoji. <sup>7</sup>Pida agica lionigi, leegodi Isabel gojologo, codaa jogopake.

<sup>8</sup>Ica noko Zacarias oneo ica ane libakeditibece minitaga Aneotedogoji ligeladi, leegodi icota ica noko magaga diba. <sup>9</sup>Onowo nigica ane lakatigi nigidiwa sacerdotitedi, oiwi nigica anepaga dinete me yalegi ica ane liditege lanigi liciagi gonadokojegi, ane ligilegegitibece moyalegi. Odaa Zacarias jigijaa dinete me dakatiwece Goniotagodi Aneotedogoji ligeladi. <sup>10</sup>Odaa egidiaagi Zacarias me yalegi nigica aneletege lanigi, idiaagidi ica noiigi ideiticoace we, oyotaganegede Aneotedogoji.

<sup>11</sup>Odaa ica niaanjo Goniotagodi Aneotedogoji ja dinikee lodoe Zacarias, one dabiditi liwai gobaagadi aca nameeja anei moyalegi nigica aneletege lanigi. <sup>12</sup>Nigica Zacarias naga nadi nigijo aanjo, odaa nawela, eliodi me doi. <sup>13</sup>Odaa mee nigijo aanjo, “Jinagadoii Zacarias! Aneotedogoji wajipatedagawa nigijo me ipokitalo, odaa natigide gadodawa jigicaa lionigi, odaa awii me liboonagadi João. <sup>14</sup>Eliodi maniniitibeci leegodi lanikegi, codaa eliodi oko aagaga ninitibigiwaji. <sup>15</sup>Igaataga gonegegi lodoe Aneotedogoji. Awacipeta viinyo, otegexaagaga anigetigida godacipagadi ane yoniciwadi. Nigenitini, odaa ja dakatiogi Liwigo Aneotedogoji. <sup>16</sup>Odaa eo meliodi loiigi Israel odopitalo Goniotagodi Aneotedogoji. <sup>17</sup>Nigica liwigo codaa me loniciwaga liciagi Elias liwigo ane icogotibigimece miniwataga Aneotedogoji. Anigicatibige daga diba Goniotagodi meote ane libakeditetema Aneotedogoji, nigidi nigaanigawaanigi yelogoditedibece latematiko Aneotedogoji, eotibige nigina eniododipi me dagadiaa odinotigimadetege otegexaagaga oidelege lionigipi, codaa eotibige nigijo ane dogoyiwagaditeda Goniotagodi Aneotedogoji me nowookonaga liciagi nigina oko ane igenagatibigiwaji. Odaa jigidaa libakedi, ilakideticooce nigidi noiigi modinoweditege lanokegi Goniotagodi.”

<sup>18</sup>Odaa Zacarias ja ige nigijo aanjo, meeta, “Amiida ica ane jowoogoditece nigewi ida gagegi? Igaataga jegeemoda oxiiigodi, codaa nagajo yodawa jagaga opake.”

<sup>19</sup>Nigijo aanjo naga igidi, meeta, “Ee Gabriel. Idioka limedi me idejotice miniwataga Aneotedogoji me jibatema. Odaa idiige me gadotaganegeni codaa me jelogoditagawa nigida nibodigi anele. <sup>20</sup>Odaa nigina natigide jagakaami aticilonaga, codaa makaami ewalagonaga, agakati motagani nigepaa icota noko menitini gadionigi, leegodi me daga iwagatiteda yotaga, igaataga niginoa yotaga ewi micotalo anigida noko.”

<sup>21</sup>Nigijo noiigi anonibeotege Zacarias jogoyopo me leegi midiaagi catiwedi Aneotedogoji ligeladi. <sup>22</sup>Nigijo naga noditice, agalee yakadi me dotaga. Odaa nigijo noiigi jogoyowoogodi mica lakatigi catiwedi ligeladi Aneotedogoji. Naga daga yakadi me dotaga, odaa ja yatitioyi libaagatedi me yotaganegede nigidi noiigi.

<sup>23</sup>Nigijo naga dinelio nokododi me diba digoida Aneotedogoji ligeladi, odaa Zacarias jogopiticogi ligeladi. <sup>24</sup>Odaa aonigica daga leegi Isabel jigipilege. Odaa aona noditice ligeladi nigicoa ciinco nepenaitedi. Odaa meetigi le, <sup>25</sup>“Joanigidaa igotediwa Goniwa-aagodi. Niginoa nokododi eletedomi me nogowa iboliga lodoe ledi oko. Igaataga idiboliga nigijo me-ee digicata i-oonigi.”

### Ica aanjo dibodicaxinagatece lanikegi Jesus

<sup>26</sup>Nigica naga ixomagatedijo ciinco nepenaitedi Isabel me ipilege, Aneotedogoji ja iige aanjo Gabriel migo manitaga nigotaga Nazaré, nipodigi Galiléia. <sup>27</sup>Iigetedicogi manitaga aca awicije ane liboonagadi Maria. Maria aona nigica me nadi goneleegiwa, onaleekoka doletibige me lodawa ica goneleegiwa ane liboonagadi José, anida aneetege licogegi Davi. <sup>28</sup>Nigijo aanjo nigicota Maria, nice, odaa meeta, “Iniotagodawaana, Goniotagodi Aneotedogoji yajigotedagawa gadinikegi. Aneotedogoji yemaa meote ane dagaxa meletagadomi. Idioka limedi me ideite makaamitaga.”

<sup>29</sup>Maria eliodi me nawela leegodi lotaga nigijo aanjo, codaa domaga yowotece nigica anodaa diitigilo nigijoo lotaga, pida ayowoogodi. <sup>30</sup>Odaa nigijo aanjo meeta, “Jinagadoii Maria! Igaataga Aneotedogoji eliodi meletedagadomi. <sup>31</sup>Digawini! Icota makaami ipilege, odaa jaganigajeetece nigaanigawaanigi, odaa awii me liboonagadi Jesus. <sup>32</sup>Icota me goneleegiwa gonegegi, odaa idokoyatigi me Lionigi Aneotedogoji, Aneotedogoji ane iige inoatawece. Goniotagodi Aneotedogoji eote me inionigi-eliodi, digo anee licogegi Davi. <sup>33</sup>Codaa idioka limedi me inionigi-eliodi ane iige anida aneetege licogegi Jacó, odaa nigica ninioxigi agica liniogo.”

<sup>34</sup>Odaa Maria jegeeta nigijo aanjo, “Igamodaagee ica me yakadi? Anigicoda daga idina-aaditege aaginaga.” <sup>35</sup>Odaa nigijo aanjo ja ninigodi, meeta, “Liwigo Aneotedogoji enagi makaamita, odaa Aneotedogoji ditibigimedeoodi ikeetedagawa nimawenegegi. Joanigidaa leegodi gadionigi anenitini, enitini miniokiniwateda Aneotedogoji me nebi, odaa liboonagadi ‘Lionigi Aneotedogoji’. <sup>36</sup>Digowoo! Moditibece gaditaagi Isabel me daga yakadi mica lionigi, pida natigide jigidiwa ciinco nepenaitedi me ipilege, digo anee nogopake. <sup>37</sup>Igaataga Aneotedogoji agica idi ane daga yakaditeda meote.” <sup>38</sup>Odaa Maria mee, “Nigida meeyo, eeyo liota Iniwa-aagodi Aneotedogoji. Anikanitici nigica aneeteta Iniwa-aagodi.” Odaa jogopi nigijo aanjo.

### Maria dalita Isabel

<sup>39</sup>Naga ixomagatedice icoa nokododi, Maria ja dinoe, odaa ja yediigaticogi nigotaga nipodigi Judéia, midiwa icoa wetiadi. <sup>40</sup>Naga dakatiwece ligeladi Zacarias, odaa ja yecoatitice Isabel. <sup>41</sup>Isabel naga wajipata Maria me nice, odaa nigijo nigaanigawaanigi catiwedi le ja ditinege. Odaa Isabel ja dakatiogi Aneotedogoji Liwigo. <sup>42</sup>Odaa ja dinigetagatee me dotaga, mee, “Aneotedogoji eliodi meote aneletagadomi, caticedi nigina goniwaalowepodi, codaa jegeote aneletema nigidi niga-aanigawaanigi catiwedi gade-ee. <sup>43</sup>Odaa Aneotedogoji

eliodi me idiwe-eenigide, le-eegodi managi adaliitiwa, ano-oota ma-aami eliodo Iniwa-aagodi. <sup>44</sup>Nigijo naga jajipa-aatagawa madiceni, niga-aanigawaanigi ninitibece, oada ja ditinege catiwedi ye-ee. <sup>45</sup>Goniwa-aagodi Aneotedogoji gadibinieni le-eegodi mi-iiwagati mo-oota nigijo ane ligegitedagawa.”

### Maria dogetetalo Aneotedogoji

<sup>46</sup>Odaa jegee Maria,

“Jigaanagatibigimece Goniwa-aagodi Aneotedogoji,  
mele yaalegena.

<sup>47</sup>Odaa eliodi me idinitibeci le-eegodi Aneotedogoji me idewikatidi.

<sup>48</sup>Igaataga yemaa meotedomi anele,  
eeyo liota ane digica me dinabaketibece,  
eeyo iwikodagalo.

Nigina natigide,  
nigepaa ganigicatibige,  
nigina oko odi Aneotedogoji meliodi me idibinie.

<sup>49</sup>Igaataga Aneotedogoji aneliodi nimawenegegi,  
eotedomi nigica ane jopooga.  
Agica ane beyagi miniwataga.

<sup>50</sup>Iwikode inatawece nigina anode-eemitetibige,  
nigina baanigina me newiga,  
codaa nigina ane-eedigica menitiniwace.

<sup>51</sup>Aneotedogoji ja ikee meliodi loniciwaga nigina meote niginoa ane loweenataka.

Ige-eeke niginoa anagaxakenagaga,  
codaa me nogowa lowooko.

<sup>52</sup>Nigina ane ni-iigenatakanaga,  
Aneotedogoji nogowa nimawenegeco,  
codaa eote nagatetigi nigina anodi me digica nagatetigi.

<sup>53</sup>Yajigo niginoa anele,  
nediatediniwace nigina ane nigiciletibigiwaji,  
codaa i-iige moitibece niginoa liicotedi me digica anoyadeegi.

<sup>54</sup>Idioka lime-eedi meote mo-oota niginoa ane lotaga anigotediogi  
jotigide godaamipi,  
codaa midioka lime-eedi me yaxawa godoiigi Israel,  
ane liotagipi.

<sup>55</sup>Igaataga ligegite jotigide gonelokodi Abraão,  
codaa nigina anida aneetege licogegi midioka lime-eedi me iwikodetediogi.”  
(Odaa ja liniogo me dotaga Maria).

<sup>56</sup>Maria ejinaga eote iniwatadigini epenaitedi midiaagi mani Isabel,  
odaa jogopiticogi ligeladi.

### Lanikegi João Batista

<sup>57</sup>Nigicota ica noko me dinigaje Isabel, odaa ja dinigajetece nigaanigawaanigi. <sup>58</sup>Ica lipecagawepodi codaa me litacepodi odibodicetibige, odaa modi Goniotagodi Aneotedogoji eliodi me iwikode Isabel. Odaa ja linikagawepodi.

<sup>59</sup>Nigijo negeote oito nokododi menitini nigaanigawaanigi, odaa jigigotibeci oyakagidi lolaadogo, ane lakatigi judeutedi (moikée me loiigi Aneotedogoji). Odaa ja domogowo me liboonagatewa eliodi, Zacarias.

<sup>60</sup>Pida nagajo eliodo mee, “Ogoa, bigida liboonagadi João.”

<sup>61</sup>Odaa modi, “Pida agica gaditaagi ane liboonagadi João!” <sup>62</sup>Odaa odatikatalo libaagatedi moige eliodi ica ane yemaa me liboonagadi nigaanigawaanigi.

<sup>63</sup>Odaa Zacarias ja dipokotibige taaboawaanigi me iditeloco, “Jemaa me liboonagadi João.” Iditawece nigijo oko oyopo. <sup>64</sup>Odaa agica daga leegi ja yakaditace me dotaga, odaa ja diniotagodetalo Aneotedogoji. <sup>65</sup>Nigijo lipecagawepodi eliodi moyopo nigida niciagi, odaa nigica nibodigi aneetece nigida niciagi jigilaagiteloco idiwatawece nipodaga Judéia, ane inoa wetiadi. <sup>66</sup>Odaa inatawece oko anowajipata oyowo nigida natematigo, odaa dinigetiwage, modi, “Igamigodaagee ica nigaanigawaanigi? Igaataga loniciwaga Goniotagodi Aneotedogoji ewi me idei miditaga.”

### Zacarias yatemati anodaagee nigica nigaanigawaanigi

<sup>67</sup>Zacarias, eliodi nigijo nigaanigawaanigi one dakatiogi Liwigo Aneotedogoji, odaa jigidaa dinanatigi me yalagata anodaagee nigijo nigaanigawaanigi, mee,

<sup>68</sup> “Jogeegatalo Goniotagodi Aneotedogoji,  
Noenogodi loiigi Israel.

Igaataga enagi midi loiigi me yatamagateetege libeyacegeco.

<sup>69</sup>Niwakateetedogowa Gonewikatitogodi anida nimawenegegi,  
anida aneetege licogegi Davi,  
ane liigexegi Aneotedogoji.

<sup>70</sup>Jotigide Aneotedogoji naga ligegi me niwakatee nigica Gonewikatitogodi.  
Nigijo anoyelogoditedibece Aneotedogoji lowooko,  
nigijo aniniokiniwateda modibatema,  
oyelogodi ane ligegi Aneotedogoji.

<sup>71</sup>Odaa ligegi me godatamagateetege godaxakawepodi,  
codaa me loniciwaga nigijo ane degetigodemaa.

<sup>72</sup>Codaa ligegi me iwikode godaamipi,  
codaa nalagatigilo nigijo ane dinilakidetetege,  
leegodi aixomagatice ane ligegi.

<sup>73-74</sup> Akaa ligegiteta gonelokodi Abraão me godatamagateetege  
loniciwaga godaxakawepodi,

eote me jakataga me jibaagatema me digica ane idoiigata.

<sup>75</sup> Odaa jakataga miniokiniwateda me jibaagatema,  
codaa me jakataga me jaogo inokina ane igenaga inoatawece nokododi.

<sup>76</sup> Akaami, ionigi,  
etigadadalitigi makaami nigina ane yelogoditedibece lowooko  
Aneotedogoji anidioka limedi me diigenataka.

Odaa elogoti latematiko Aneotedogoji anigicatibige daga diba Goniotagodi,  
anenyagati laalegenali nigidi noiigi modinoweditige lanokegi.

<sup>77</sup> Awii loiigi Goniotagodi Aneotedogoji moyowoogodi anodaagee me  
yewikatidi,  
nigina me napitagadi libeyacegeco.

<sup>78</sup> Igaataga Aneotedogoji eliodi me godiwikode.  
Nigicoa Aneotedogoji ane niwakatee me godewikatidi  
liciagi nigina maleekoka daxoditibige aligege.

<sup>79</sup> Nigina nigeno,  
yajigotediogi lokokena nigina ane ideiticoace nexocaga  
anodipegitege némaga,  
godadeegitedinece naigi aneo mele godaalegenali.”  
(Odaa ja liniogo me dotaga Zacarias).

<sup>80</sup> Odaa nigijo nigaanigawaanigi naga ili, odaa jagaga ili liwaxinigi.  
Odaa jigidiaagi midiwataga nipodaga ane yadilo ane digica nigeladimigipi  
negepaagicota noko migo yelogodi Aneotedogoji lotaga midii loiigi Israel.

### Lanikegi Jesus (Mateus 1.18-25)

**2** <sup>1</sup> Nigijo César Augusto minionigi-eliodi ane iige idiwatawece niigotedi  
romaanotedi, ja diigenatakata nigijoa nokododi me dinilagadi oko,  
diniditedini liboonagatedi iditawece noiigi. Codaa one odoejegi noko  
me dinilagaditibigiwaji. <sup>2</sup> Nigijo nogonilagadi oko ica ane iige niigo Síria  
bogone ica Cirênio. <sup>3</sup> Odaa leeditibige miditawece oko igotibeci minoataga  
niginoa anepaa nigotadi ane lanikadi, me dinilagaditibigiwaji.

<sup>4</sup> José ida aneetege licogegi Davi nigica jotigide inionigi-eliodi ane  
lanikadi nigotaga Belém, nipodigi Judéia. Joanigidaa leegodi me  
noditicogi nigotaga Nazaré, nipodigi Galiléia, odaa jigigo Belém me  
dinilagadi. <sup>5</sup> Odaa yadeegi Maria, analeedaga lodawa, pida jigipilege.  
<sup>6</sup> Nigijo midiaagi Belém, jigicota noko me dinigaje. <sup>7</sup> Odaa ja dinigajetece  
odoejegi lionigi. Odaa jona ilipaditece lipegetege, yexagatinigi nicooxo  
eijedi, leegodi agaleegica oyakadi limedi manitaga godiotagaxi.

### Nowienogododi waxacocoli onadi aanjotedi

<sup>8</sup>Midiwataga icoa nipodaga onidiwa icoa nowienogododi waxacocoli, oyelogoteetigi moyowie icoa lapoli waxacocoli. <sup>9</sup>Odaa ica niaanjo Goniotagodi Aneotedogoji ja dinikeetiogi, odaa latalaga Goniotagodi Aneotedogoji ja naloteloco nigica aneicoace. Odaa eliodi me doitibigiwaji. <sup>10</sup>Pida nigijo aanjo meetiogi, “Jinaga domagadoitiwaji! Igaataga inadeegitagawatiwaji nibodigi anele, aneo minatawece oko ninitibigiwaji. <sup>11</sup>Digawini! Nigina noko digoida Belém, nigotaga Davi, enitini ane gadewikatititiwaji, Nigijoa anakaa jibodicagatege, Cristo, ane Goniotagodi. <sup>12</sup>Odaa owoogotitiwaji mewi. Akapetege nigaanigawaanigi, oilipaditece lipegetege, oyeliigetinigi nicooxo eijedi.”

<sup>13</sup>Aniaagani nagaca lakata jagaga dinikee mijotaga nigijo aanjo, ica nelegi lapo eletidi liigexedi Aneotedogoji digoida ditibigimedi. Oigaa enaco, odigaanagatibigimece Aneotedogoji, modi,

<sup>14</sup>“Digoina ditibigimedi jigaanaganagatibigimece Aneotedogoji.

Eote mele laalegenali oko digoina iigo,  
leegodi yemaa meote aneletema nigidi oko.”

<sup>15</sup>Nigijoa aanjotedi nogopitacibigimece ditibigimedi, odaa nigijoa nowienogododi waxacocoli modi, “Iniga Belém, iniga jiwinaaga nigica nigaanigawaanigi Goniotagodi Aneotedogoji aneote gobodigi negenitini.”

<sup>16</sup>Odaa jigigotibeci yediigatibigiwaji, odaa jogotota Maria, José, odaa jogonadi nigaanigawaanigi, anoyeliigetinigi nicooxo eijedi. <sup>17</sup>Nigijo nogonadi, odaa jogoyatemati nigijo ane lotaga aanjotedi moditece nigidi nigaanigawaanigi. <sup>18</sup>Ijotawece nigijo anowajipatiogi nigijoa nowienogododi waxacocoli eliodi moyopo. <sup>19</sup>Pida Maria bigidioka limedi me nalagatibige baanaga ixomagateetice, codaa eliodi me yowo lotaga nigijoa nowienogododi waxacocoli. <sup>20</sup>Odaa nigijoa nowienogododi waxacocoli jogopitibeci. Nigaanaganagatece ligi, odigaanagatibigimece Aneotedogoji, odiniotagodetallo leegodi ijoatawece anowajipatalo, codaa anonadi. Ijoatawece ane eetece nigijo aanjo onadi, codaa mowajipatalo moyalagatalo.

### Jesus oibootalo Aneotedogoji minitaga ligeladi Aneotedogoji

<sup>21</sup>Igaanaga ixomagatedijo oito nokododi menitini, jogoyakagidi lolaadi nigaanigawaanigi ane liguregegi judeutedi. Odaa jogowo me liboonagadi Jesus, igaataga jigidaa liboonagadi aneeta nigijo aanjo maleedigicatibige digipilege Maria.

<sup>22</sup>Nigijo naga ixomagatedijo icoa nokododi ane diigenatakata lajoinaganegeco Moisés me diniwilegitibigiwaji lodoe Aneotedogoji, José ajaa Maria jogoyadeegi nigaanigawaanigi manitaga nigotaga Jerusalém moibootalo Goniotagodi Aneotedogoji. <sup>23</sup>Igaataga diniditeloco liigenatakanegeco Aneotedogoji ane iditedini Moisés, anee, “Inatawece



(Lucas 2.16)

nionigi liidaga leeditibige moiomagaditema Goniotagodi Aneotedogoji, odaa iniokiniwateda me nebi.”<sup>24</sup> Odaa José ajaa Maria igotibeci magaga oibootema Goniotagodi Aneotedogoji aneledi liigenatakanegegi lajoinaganegeco Moisés, iniwataale yotipitedi, ogoa domige iniwataale yotipitedawaanaga liboonaga.

<sup>25</sup> Manitaga nigotaga Jerusalém ini ica goneleegiwa nigeladimigi ane liboonagadi Simeão. One goneleegiwa ane igenaga, codaa midioka limedi meyiwaagadi Aneotedogoji, codaa me nibeotibigege me niwakatee Aneotedogoji ane yewikatidi loiigi Israel. Liwigo Aneotedogoji idei mijotaga.

<sup>26</sup> Codaa iniaagini Liwigo Aneotedogoji ikeeta me daga yeleo nigepaa nadi



icoa Cristo, liwaagadi Goniotagodi Aneotedogoji me godewikatidi. <sup>27</sup>Liwigo Aneotedogoji eo migo Simeão minitaga Aneotedogoji ligeladi. Ijaagijo noko moyadeegi eliododipi Jesus minitaga ligeladi Aneotedogoji, mowote aneeta najoinaganegeco mowo. <sup>28</sup>Odaa Simeão ja dibata nigijo nigaanigawaanigi. Naga nogele, odaa ja dogetedibigimece Aneotedogoji, meetalu,

<sup>29</sup> “Iniotagodi Aneotedogoji,

nigina natigide,

ane eemoda gadiigexegi ja yakadi mikani me inipetini.

Ideleo mele yaalegena,

igataaga jigicota nigijo ane gagegitiwa.

<sup>30</sup> Igaataga nigida me ee ja jinadi nigidi ananiigeni ane godewikatidi.

<sup>31</sup> Inatawece noiigi icota monadi nigidi ananiigeni Iniotagodi Aneotedogoji.

<sup>32</sup> Nigidi maniigeni liciagi lokokena miditaga nigina ane daga judeutedi me ikeetiogi anewi.

Odaa jогоiwenigide gadoiigi Israel idiaagidi leegodi.”

<sup>33</sup> José ajaa Maria eliodi moyopo nigijoa lotaga Simeão me yalagata nigidi nigaanigawaanigi. <sup>34</sup>Simeão dipokotalo Aneotedogoji me ibinietediogi, odaa jegeeta Maria, eliodo Jesus, “Aneotedogoji niwakatee nigidi nigaanigawaanigi meliodi okotigi godoiigi Israel oyototedice Aneotedogoji, pida eliodi eledi godoiigi odopitalo. Aneotedogoji niwakatee me ikee nigica anodaageeteda. Codaa eliodi oko odotagatibige nigidi nigaanigawaanigi.

<sup>35</sup> Odaa joanigidaagee niginoa lowooko nigina noiigi ane dogoyiwagaditeda ja dinelogotee. Icota me eemiteetece mileeni gadaalegena leegodi gagecagalogo, micataga nigina me leegitinece gotaciledi me godapeegi nodaajo-ocagataga.”

<sup>36</sup> Onani aca iwaalo opake, ane yelogoditedibece lowooko Aneotedogoji.

Liboonagadi Ana, liona ica Fanuel, anida aneetege licogegi Asa. Nigijo me wado, naga ixomagatedice seete nicaagape, lodawa ja yeleo. Odaa ja wajekalo.

<sup>37</sup> Natigide jonigidiwa 84 nicaagape. Aonigica daga noditicogi ligeladi Aneotedogoji. Noko, codaa menoale, one dogetetalo Aneotedogoji. Aganiodi nigina me ideidi lodoe Aneotedogoji me yotaganege. <sup>38</sup> Acaagaca nagaca lakatatibece micota me diniotagodetalo Aneotedogoji, odaa ja yalagata nigaanigawaanigi yatematitiogi ijotawece nigijo anonibeotege Aneotedogoji me yatamagatee noiigitigi Jerusalém me yatamagateetege laxakawepodi.

<sup>39</sup> Odaa José ajaa Maria nogoigodi mowotema nigijo nigaanigawaanigi icoatawece nigicoa ane liigenatakanegeco Goniotagodi Aneotedogoji, odaa jogopiticogi ligeladi mani nigotaga Nazaré, nipodigi Galiléia.

<sup>40</sup> Odaa nigijo nigaanigawaanigi ja ili, ja yoniciwadi. Codaa jiginoa lixaketedi, Aneotedogoji eliodi meote aneletema.

### Jesus nenyagatedini minitaga Aneotedogoji ligeladi

<sup>41</sup> Inoatawece nicaagape eliododipi Jesus igotibeci Jerusalém odiita nigica nalokegi anodita “Páscoa”. <sup>42</sup> Nigijo Jesus negeote dooze

nicaagape, jigigotacibece naloogo ane lakatigitibece. <sup>43</sup>Nigidiaagidi nigijo nalokegi nogone dinelio, odaa jogopiticogi ligeladi. Odaa nigijoa nigaanigawaanigi, Jesus, ja nyenyagatedini mani nigotaga Jerusalém. Pida eliiododipi agoyowoogodi me nyenyagatedini. <sup>44</sup>Odiletibige diginoa liwigotigi nigijo lapo ane dopitibeci, odaa ja wiajeega ijotawece noko. Igaanaga domogodoletibige Jesus mijotaga nigijo litacepodi codaa mijoataga nigijoa lokaagetedipi, pida agicoa moyakadi. <sup>45</sup>Odaa nigijo naga digicoateda moyakadi, nigijo eliiododipi jogopitacicogi Jerusalém modoletibige.

<sup>46</sup>Igaanaga ixomagatedice itoatadigida nokododi, odaa jogoyakadi Jesus minitaga Aneotedogoji ligeladi. Nicotedini liwigotigi icoa niigaxinaganadi judeutedi anodiigaxinagatece icoa lajoinaganegeco Moisés ane iditedini. Jesus wajipatediogi codaa nigetediniwace. <sup>47</sup>Ijotawece nigijo anowajipatalo eliodi moyopo leegodi minoa lixaketedi, codaa me lotaga nigina me igiditediogi. <sup>48</sup>Nigijo eliiododipi nogonadi, aagaga oyopo. Odaa nagajo eliodo meetalo, “I-oonigi, igaamee ina midegemiitogowa? Alopoo! Gadiodi, eeyomoda, eliodi me jogowikomataagatibigagaji.”

<sup>49</sup>Naga ninigodi Jesus, meetediogi, “Igaamee ina moleetibigijitiwaji? Agowoogoti me leeditibige minaagejo ligeladi Eiodi?” <sup>50</sup>Pida agoyowoogodi nigica aneyatedigi ligegi.



(Lucas 2.46)

<sup>51</sup>Nigidiaagidi ja lixigagawepodi eliododipi, opiticogi Nazaré, idioka limedi meyiwagadi eliododipi. Odaa nagajo eliido idioka limedi me nalagatibige ijoatawece ane ixomagateetedijo. <sup>52</sup>Odaa Jesus ja ili, codaa minoa lixaketedi. Codaa idioka limedi Aneotedogoji me iwenigide codaa nigina oko moiwenigide.

### Lotaga João Batista

(*Mateus 3.1-12; Marcos 1.1-18; João 1.19-28*)

**3** <sup>1</sup>Negeote ciinze nicaagape Tibério ja ninionigi-eliodi romaanotedi codaa iige inoatawece iigotedi. Nigijo romaano ane iige nipodigi Judéia бага Pôncio Pilatos. Ninionigi-eliodi nipodigi Galiléia бага Herodes, nioxoa ica Filipe ninionigi-eliodi nipodigi Ituréia codaa me Traconites. Nipodigi Abilene, бага ninionigi-eliodi Lisânias. <sup>2</sup>Lacilo-sacerdotitedi бага Anás ijaa Caifás. Nigijoa nokododi Aneotedogoji ja yotaganee João, lionigi Zacarias. João idiaagi miditaga nipodigi ane digica nigeladimigipi. <sup>3</sup>João digetita iditawece nipodigi akiidi Jordão, odaa yatematitibece me leeditibige inatawece oko modinilaatece libeyacegeco, codaa me leeditibige me dinilegetibigiwaji, odaa Aneotedogoji ja iwilegitetema inoatawece libeyacegeco. <sup>4</sup>Nigida libakedi João, akaa eetece Isaías, nigijo ane yelogditedibece Aneotedogoji lowooko nigijo jotigide. Isaías iditeloco lotaganagaxi, mee,

“Ida ica ane igedi me dotaga miditaga nipodigi ane digica nigeladimigipi.

Mee me dotaga,

‘Oenitece naigi Goniotagodi menagi,

awii naicoli ane dixoketema!

<sup>5</sup>Inoatawece ane elagigi icota me dinoxoco,

codaa inoatawece wetiadi ane leegitibigimece oyakagidi.

Naicoli ane dinamage icota me dixoke,

codaa naicoli aninoa nalagatedi icota mabotiwage.

<sup>6</sup>Odaa inatawece oko onadi Aneotedogoji anodaagee me yewikatidi oko.”

(Joanigidaa Isaías ibogoditege nigijo me ilakidetice naigi Goniotagodi, João ane ilakideticoace laalegenali oko mowajipatalo lotaga Jesus.)

<sup>7</sup>Eliodi oko domogodiita João me dinilegetibigiwaji. Pida João meetiogi, “Akaamitiwaji lionaga laketedi. Amiijo aneo gabodigitiwaji ina nogoleetigi me gadiwokonitiwaji lélaga Aneotedogoji nige iloikatidi oko leegodi libeyacegeco?

<sup>8</sup>Iigitiwaji gadakataga amaleegaga ikeeni nagadinilaanitibece, macataga nagana niale ela me ikee anada nagada niale. Jinaga domegenitiwaji me ganelokodi Abraão, (Igaataga nigina anida aneetege licogegi Abraão leeditibige me dinilaatibece), igaataga ejitagawatiwaji Aneotedogoji yakadi me ibake nigidiwa wetiadi meote mida aneetege licogegi Abraão. <sup>9</sup>Codaa micataga nigina goneleegiwa baanaga igo me yakagidi niale negepaa litodi. Inoatawece nialeli ane degeleteda ela oyakagidi, odaagoyalegi.” (Joanigidaagee Aneotedogoji ja igo me iloikatidi oko aneo ane beyagi).

<sup>10</sup>Pida nigidi noiigi idioka limedi monigetice João, modita, “Amiida ica ane leeditibige me jaoga? (Odaa agalee godiloikatidi Aneotedogoji.)”  
<sup>11</sup>Odaa ja ninigodi, meetiogi, “Nigini anidiwa itiwataale noecagaxiidi, leeditibige me yajigota onaditeci nigijo ane dagaca noecagaxi. Codaa nigini anidi ane yeligo, leeditibige me yedia nigina ane digica ane yeligo.”

<sup>12</sup>Nigijo anodibatibigege ninyeelo ninionigi-eliodi romaanotedi, eledi icotiobece me domagaga dinilegetibigiwaji, odaa jogoige João, modita, “Goniigaxinogodi, oko amiida ane leeditibige magaga jaoga?”  
<sup>13</sup>Odaa jegeetiogi, “Jinagalee abanoonaganitiwaji caticedi ane iigetagawa najoinaganegeco mabanoonagani.”

<sup>14</sup>Codaa iodagawadi eletidi oige, modita, “Epogoko, amiida ane leeditibige me jaoga?” Odaa ja ninigodi, meetiogi, “Jinagatikani gadoniciwaga mabanoonaganitece dinyeelo, otegexaagaga awitaka oditaga jagabanoonagani. Pida adinanenitibece leegodi nigidoda ganigaanyegegi.”

<sup>15</sup>Nigijo noiigi eliodi mowalita João degeo anigetigida loenatagi anodoxicetema. Meetibige le nigidi noiigi ijoa nige nigidaagida João Nigicoa ane niige Aneotedogoji me godewikatidi.  
<sup>16</sup>Pida João meetiogi iditawece, “Gadilegenita ninyogodi. Pida enagi anida loniciwaga caticedi ee. Ajakadi me jaxawatece, otegexaagaga me jowilece liwelatedi, leegodi eliodi me gonegegi, aiciagi. Idi ane yajigotediogi Liwigo Aneotedogoji, idiaageledi nigina akaamitiwaji бага iloikatidi, micataga daga yalegi noledi.  
<sup>17</sup>Aneotedogoji ja igo me iomagadi oko, micataga nigina goneleegiwa baanigida najo libaagadi naga igo me ibinie lawodigijedi, odaa iomagaditege leyeema, lapadi. Iladie leyeema minitaga diimigi ane iladiete nijaacotedi. Pida napadi бага yalegi mini noledi ane daga ipe.”

<sup>18</sup>Odaa João ibodicaxitiogi nigidi noiigi mowidi eletidi lotaga me yaxawatiogi, nigina me yatemati nibodicetedi anele.

<sup>19</sup>Pida João ja dotagatibige Herodes inionigi-eliodi, leegodi Herodes dibanoonagatece aca Herodias lodawa nioxoa, codaa leegodi Herodes mowidi eletidi libeyacegeco.  
<sup>20</sup>Joanigidaa leegodi Herodes naga diigenatakata moixotiwece João niwilogonagaxi, pida joanigidaa leegodi negeote dagaxatace mowidi nigicoa loenataka ane beyagi.

### Jesus dinilege

(*Mateus 3.13-17; Marcos 1.9-11*)

<sup>21</sup>Nigica naga nigomaga ijotawece nigica noiigi me dinilegetibigiwaji, odaa Jesus jagaga dinilege. Nigijo naga yotaganege Aneotedogoji, nigica ditibigimedi domoke.  
<sup>22</sup>Odaa Liwigo Aneotedogoji ja dinikatelogo Jesus dinanatigi yotibi. Odaa jogowajipata ica ane dotaga digoida ditibigimedi, anee, “Akaami Ionigi aneliodi me gademaani, codaa eliodi me idinitibeci akaami leegodi.”

**Ica ane licogegi Jesus**

*(Mateus 1.1-17)*

<sup>23</sup>Nigijo nigidaa dinanatedigi Jesus me diba, ijoa 30 nicaagape. Odaa eliodi oko odiletibige daga lionigi José. Pida Jesus ida aneetetege licogegi Eli.

- <sup>24</sup> Eli eliodi ica Matate,  
 Matate eliodi ica Levi,  
 Levi eliodi ica Malqui,  
 Malqui eliodi ica Janai,  
 Janai eliodi ica José,
- <sup>25</sup> José eliodi ica Matatias,  
 Matatias eliodi ica Amós,  
 Amós eliodi ica Naum,  
 Naum eliodi ica Esli,  
 Esli eliodi ica Nagai,
- <sup>26</sup> Nagai eliodi ica Maate,  
 Maate eliodi ica Matatias,  
 Matatias eliodi ica Semei,  
 Semei eliodi ica José,  
 José eliodi ica Joda,
- <sup>27</sup> Joda eliodi ica Joanã,  
 Joanã eliodi ica Resa,  
 Resa eliodi ica Zorobabel,  
 Zorobabel eliodi ica Salatiel,  
 Salatiel eliodi ica Neri,
- <sup>28</sup> Neri eliodi ica Melqui,  
 Melqui eliodi ica Adi,  
 Adi eliodi ica Cosã,  
 Cosã eliodi ica Elmadão,  
 Elmadão eliodi ica Er,
- <sup>29</sup> Er eliodi ica Josué,  
 Josué eliodi ica Eliézer,  
 Eliézer eliodi ica Jorim,  
 Jorim eliodi ica Matate,  
 Matate eliodi ica Levi,
- <sup>30</sup> Levi eliodi ica Simeão,  
 Simeão eliodi ica Judá,  
 Judá eliodi ica José,  
 José eliodi ica Jonã,  
 Jonã eliodi ica Eliaquim,
- <sup>31</sup> Eliaquim eliodi ica Meleá,

- Meleá eliodi ica Mena,  
Mena eliodi ica Matata,  
Matata eliodi ica Natã,  
Natã eliodi ica Davi,  
32 Davi eliodi ica Jessé,  
Jessé eliodi ica Obede,  
Obede eliodi ica Boaz,  
Boaz eliodi ica Sala,  
Sala eliodi ica Nassom,  
33 Nassom eliodi ica Aminadabe,  
Aminadabe eliodi ica Admim,  
Admim eliodi ica Arni,  
Arni eliodi ica Esrom,  
Esrom eliodi ica Peres,  
Peres eliodi ica Judá,  
34 Judá eliodi ica Jacó,  
Jacó eliodi ica Isaque,  
Isaque eliodi ica Abraão,  
Abraão eliodi ica Tera,  
Tera eliodi ica Nacor,  
35 Nacor eliodi ica Seruque,  
Seruque eliodi ica Ragaú,  
Ragaú eliodi ica Faleque,  
Faleque eliodi ica Éber,  
Éber eliodi ica Sala,  
36 Sala eliodi ica Cainã,  
Cainã eliodi ica Arfaxade,  
Arfaxade eliodi ica Sem,  
Sem eliodi ica Noé,  
Noé eliodi ica Lameque,  
37 Lameque eliodi ica Metusalém,  
Metusalém eliodi ica Enoque,  
Enoque eliodi ica Jarete,  
Jarete eliodi ica Malaleel,  
Malaleel eliodi ica Cainã,  
38 Cainã eliodi ica Enos,  
Enos eliodi ica Sete,  
Sete eliodi ica Adão,  
ane lionigi Aneotedoꝑoji.

**Godaxakawa dineetalo Jesus**  
(*Mateus 4.1-11; Marcos 1.12-13*)

**4** <sup>1</sup>Aneotedogoji Liwigo ini miniwataga Jesus. Naga dopitedijo Jesus me icogotedicogi akiidi Jordão, oada Liwigo Aneotedogoji ja yadeegitedicogi miditaga nipodigi ane yadilo, ane digica nigeladimigipi. <sup>2</sup>Nigicoatigilo cwareenta nokododi, oada diaabo ja dineetalo Jesus me domegeo degeote libeyacegegi. Nigijoa nokododi agica ane yeligo, oada nigidiaagidi ja nigicile. <sup>3</sup>Oada godaxakawa jegeetalo, “Nigewi makaami Lionigi Aneotedogoji, awii niginoa wetiadi me paontedi.” <sup>4</sup>Oada Jesus ja igidi, meeteta, “Ajakadi, igaataga lotaganagaxi Aneotedogoji diniditelo me diginokina paon meo lewiga oko, pida oko ewi mida lewiga leegodi nigina meyiwaagadi inoatawece lotaga Aneotedogoji.”

<sup>5</sup>Oada diaabo ja yadeegitedicogi Jesus digoida maditaga aca anenegegi dagaxa me leegitibigimece wetiga. Oada anigica daga leegi, ja ikeetalo icoatawece nigicoa iigotedi. <sup>6</sup>Oada jegeetalo Jesus, “Jajigotagawa ganagatetigi me iigeni inoatawece iigotedi, codaa jajigotedagawa inoatawece ane libinico aneitelo. Igaataga inoatawece onajigotediwa, oada jakadi magaga jajigota okanicodaagica ane jema me jajigota. <sup>7</sup>Oada idiwatawece nigidiwa ganepilidi, nige amakitedini gadokotidi yodoe mogetetiwa.” <sup>8</sup>Oada Jesus ja igidi, meeteta, “Emii opili Satanás! Igaataga diniditelo Aneotedogoji lotaganagaxi, ‘Ogeetalo Ganiotagodi Aneotedogoji, codaa iniokiniwateda mogetetalo.”

<sup>9</sup>Oada diaabo ja yadeegitedicogi Jesus nigotaga Jerusalém, oada ideyate miditaga ica ane dagaxa me leegitibigimece mini ligeladi Aneotedogoji, oada meetalo, “Nigewi makaami Lionigi Aneotedogoji, adinaxokitinece natinedi. <sup>10</sup>Igaataga diniditelo Aneotedogoji lotaganagaxi, ‘Aneotedogoji me niige niaanjetedi modoweditagaloco’. <sup>11</sup>Codaa aagaga diniditini, ‘Moilokaditalo gabaagatedi modoweditagaloco me degetaciloteda gadogonaka midiwa wetiadi.”

<sup>12</sup>Oada Jesus ja igidi, meeteta, “Ajakadi, igaataga madi lotaganagaxi Aneotedogoji diniditelo, ‘Jinaga adineenitalo Goniotagodi Aneotedogoji.”

<sup>13</sup>Nigijo diaabo naga ika me dineetalo Jesus minoatawece nigicoa anigotalo, oada ja ikanawaanigi micanigigotalo.

**Jesus yojogotedini libakedi digoida nipodigi Galiléia**  
(*Mateus 4.12-17; Marcos 1.14-15*)

<sup>14</sup>Jesus opitacedicogi nipodigi Galiléia, nigica Aneotedogoji Liwigo jegeliodi me yajigotalo loniciwaga. Oada nigicoa nibodicetedi anoditece Jesus jonigilaagiteloco iditawece nigidi nipodigi. <sup>15</sup>Oada diigaxinaga midiwa liiakanagaxiidi judeutedi, oada ijotawece ica oko anowajipatalo oiwenigide.

**Nigeladimigipitigi nigotaga Nazaré agodibatege Jesus**  
(*Mateus 13.53-58; Marcos 6.1-6*)

<sup>16</sup>Jesus nigicotedicogi nigotaga Nazaré ane liidagadi. Odaa naga saabado, jigigo mani liiakanagaxi judeutedi ane lakatigitedibece. Odaa ja dabiditedini me dalomegenataka. <sup>17</sup>Oyajigotalo notaganagaxi ane idi Isafas, nigijo ane yelogoditedibece lowooko Aneotedogoji. Odaa Jesus naga yowiegi nagadi notaganagaxi, yowiegitedeloco midywa nidiko anee,

<sup>18</sup>“Liwigo Goniotagodi Aneotedogoji etini meetaga.

Igaataga ee liomagatagi,  
codaa me najigotiwa inimawenegegi me jelogoditedibece  
nibodicetedi anele midywa madewetedi.

Idiige me jelogoditiogi niwilogojedi me jikaticoace,  
codaa jelogoditiogi goladi me jao me yatetacibigiwaji,  
codaa me jao moiwoko nigijo anoiatetibeci.

<sup>19</sup>Idiige me jelogoditiogi nigica nicaagabi  
nige ikee Goniotagodi Aneotedogoji meliodi meletetema nigina oko.”

<sup>20</sup>Odaa Jesus ja ilpaditacediwage nagajo notaganagaxi, odaa ja yopilagadite nigijo nowienogodi niiakanagaxi. Odaa ja nicotacedini. Ijotawece oko mani niiakanagaxi owatacotece. <sup>21</sup>Odaa ja dotaga, meetediogi, “Nigina noko, nigidi ane diniditeloco nigidi liwai lotaganagaxi Aneotedogoji anajipaatiwaji natigide, jigicota. (Leegodi jigidaa idinanatigi me jiba.)”

<sup>22</sup>Iditawece oko ele modotagatibige Jesus, codaa oyopo leegodi lotaga libinienaga. Odaa modi, “Ica mele me dotaga, nigidooda lionigi José!”

<sup>23</sup>(Jesus naga yowoogodi me dogodibatege.) Odaa meetediogi, “Ajawienataka menitiwatiwaji nigijo nigege anee, ‘Dotowegi, akamaga adinilatiti!’ Codaa magaga enitiwa, ‘Awii digoina manataga nagana ganigotaga nigijoa ane jibodicagatalo mawiite manitaga nigotaga Cafarnaum.’” <sup>24</sup>Odaa mee, “Jelogoditagawatiwaji nigina anewi, agica ini ane yelogoditedibece Aneotedogoji lowooko anele modibatege miditaga epaa loiigi. <sup>25</sup>Diganajipaatiwatiwaji! Nigijo jotigide owidi wajekalodi digoina goniigo Israel malee yewiga Elias, nigijo ane yelogoditibece Aneotedogoji lowooko, nigijo me daga datiode itoatadigida nicaagape nigigo meeya. Odaa eliodi nigica nigigi inatawece goniigo. <sup>26</sup>Pida Aneotedogoji aiige Elias me yaxawa anigetegepidagaca nigina wajekalodipi judeutedi, digoina Israel. Pida iige Elias manitaga aca wajekalo ane daga godoiigi, ane ligeladi mani nigotaga Sarepta digoida nipodigi Sidom ane daga gonipodigi. <sup>27</sup>Eledi eliodi dawace-lolatedi judeutedi digoina Israel maleegijo Eliseu, inaagina ane yelogoditedibece lowooko Aneotedogoji. Pida agica ane icilatidi. Ijokijo Naamã, ane loiigi siiritedi, baga icilatidi.”

<sup>28</sup>Nigijo nogowajipatalo Jesus lotaga, ijotawece nigijo ane ideidi mani liiakanagaxi judeutedi eliodi me neligideega. <sup>29</sup>Odaa ja dabiditiniwace oixigitedicogi wetice nigotaga. Nagani nigotaga ideidi ditibigimedi ica lojotagadi,



odaa jogoyadeegitedicogi Jesus ditibigimedi lojotagadi domaga oyamagatedinece wakagi iigo. <sup>30</sup>Pida Jesus yakagiditediogi liwigotigi nigijo noiigi, odaa jogopi.

**Ica goneleegiwa ane dakatiogi niwigo abeyacegegi**  
(*Marcos 1.21-28*)

<sup>31</sup>Jesus one dinikatedinicogi manitaga aca nigotaga Cafarnaum nipodigi Galiléia. Odaa niigaxitediniwace nigidi noiigi me saabado. <sup>32</sup>Eliodi moyopo leegodi anodaageeteda me diigaxinaga, igaataga dotaga micataga anida epaa nagatetigi. <sup>33</sup>Manitaga niakanagaxi aneite me diigaxinaga onini ica goneleegiwa anodakatiogi, icoa lowooko one beyagi. Odaa igedi me dotaga, mee, <sup>34</sup>“Amiina anemaanitogodici, Jesus ane gadiigeladi Nazaré? Domige naganagi me godaagategegi? Jowoogodi anakaami! Jagakamagakaami ane niige Aneotedogoji, codaa iniokiniwateda mabaatema.”

<sup>35</sup>Odaa Jesus ja yapetege, meeteta, “Anotokiti, codaa anotitice nigida goneleegiwa!” Nigijo niwigo abeyacegegi yokoletinigi iigo nigijo goneleegiwa lodoe ijotawece nigijo noiigi, pida agica elaciledi nigijo goneleegiwa. Odaa ja noditice niwigo abeyacegegi.

<sup>36</sup>Iditawece nigica oko nawelatibigiwaji, odaa dinotaganene midiaagiditiwage, modi, “Ganigaaleeginoa niginoa lotaga! Igaataga ida nimawenegegi codaa me loniciwaga me iticoitedice niwicidi abeyacagaga. Nigina me iige, odaa ja noditicoaci.” <sup>37</sup>Odaa nibodicetedi anoditece Jesus jigilaagiteloco iditawece nigidi nipodigi.

**Jesus nicilatiditediniwace eliodi oko**  
(*Mateus 8.14-17; Marcos 1.29-34*)

<sup>38</sup>Jesus naga noditedice niakanagaxi, odaa jigigo ligeladi Simão. Aca loxiigate Simão one deelotika, dapicogo-lolaadi. Odaa jogodipokotalo Jesus me icilatidi. <sup>39</sup>Odaa Jesus jigigo. Nigicoteta nagajo iwaalo, odaa ja dakagitedeloco, ja iige me noditice dapicogo-lolaadi. Odaa agica daga leegi ja ici, odaa ja dabiditini, ja doolagatema Goniotagodi idiaa lokaagetedipi.

<sup>40</sup>Nigijo naga dalimeti aligege, nigica oko anini litaagi ane deelotika, oyadeegitalo Jesus. Adinatopiamico leelotika. Jesus dibatedeloco oninitedibeci ane deelotika, odaa ja icilatidi. <sup>41</sup>Niwicidi abeyacagaga noditicoaci mijotaga eliodi oko. Naga noditicoaci, dinigetagateetibigiwaji me notaganaga, modi, “Ja makamagakaami Lionigi Aneotedogoji!” Oyowoogodi nigidaagidoa nigicoa Cristo, ane niige Aneotedogoji me godewikatidi. Pida joanigidaa leegodi Jesus me yapetege, codaa aika modi nigijaagijoa icoa Cristo.

**Jesus yelogoditedibece nibodicetedi anele**  
(*Marcos 1.35-39*)

<sup>42</sup>Nigijo naga yelogotibige, Jesus ja noditedice nigotaga, igo miditaga nipodigi ane digica nigeladimigipi. Nigijo noiigi odoletibige, odaa nogodakapetege,

adomagaleegoikatedice mopi. <sup>43</sup>Pida Jesus meetediogi, “Leeditibige mejigo jelogoditedibece nibodicetedi anele midiwataga eletidi nigotadi. Igaataga idiige Aneotedogoji me jelogoditedibece nibodicetedi anele, me icota anigida noko iige inatawece nigina noigitiigi nigina iigo.” <sup>44</sup>Odaa ja yatematitedibece nibodicetedi anele midiwataga niakanagaxiidi nipodigiteloco Galiléia.

### Jesus eniditediogi nigica odoejedipi anodiotibece

(*Mateus 4.18-22; Marcos 1.16-20*)

**5** <sup>1</sup>Ica noko Jesus ideite liniogotibece niweiigi Genesaré (eledi liboonagadi me Galiléia), odaa nigica noiigi jogodiniligicetelogo, leegodi moyemaa mowajipatalo Aneotedogoji lotaga. <sup>2</sup>Odaa naga nadi icoa itiwataale niwateceli ane ideitedice liniogotibece weiigi. Nigijo nomiigomigipi waxoditicoace liwateceli, oiwilegi leelatiidi anoibake me nomiigomigipi. <sup>3</sup>Odaa Jesus jona waxoditedinigi aca niwatece ane Simão nebi. Odaa jona dipokote me yotonawaanigitice liniogotibece. Odaa naga nicotedini Jesus, ja niigaxitediniwace nigijo noiigi, ideite catinedi nagajo niwatece.

<sup>4</sup>Nigijo naga ika me niigaxitediniwace nigijo noiigi, odaa meeteta Simão, “Adeegiticogi gawatece digoida liwigotinigi, odaa okolenitinitiwaji gadeelatiidi abaatalo nogojedi.”

<sup>5</sup>Odaa Simão ja ninigodi, meetalo, “Goniigaxinogodi, ja jomiigaga ijotawece enoale, agica gobakajetege. Pida leegodi makaami godiigenegegi, jigidaa leegodi nige jokolenagatacedini godeelatiidi.” <sup>6</sup>Odaa nigijo nogoyokolededini leelatiidi, owidi nigicoa libakajetedi nogojedi, ja domaga daa nigijoa leelatiidi. <sup>7</sup>Odaa jogoyategitiogi icoa eletidi lokaagetedi maditaga aca eledi niwatece menagitibeci oyaxawatiogi. Negenagitibeci odaa jogoyetigilo nigijoa niwateceli nogojedi, jona domaga domololetedini, leegodi me dagaxa me iwaagadi nigijoa nogojedi. <sup>8</sup>Nigijo Simão Pedro naga nadi loniciwaga Jesus, odaa ja yamagatedini lokotidi lodoe Jesus, odaa meetalo, “Adiwikodeni, adotonitice Iniotagodi, igaataga eemoda goneleegiwa aninoa libatico!”

<sup>9</sup>Eo nigida ligegi leegodi Simão ijaagijoa eletidi ane idei mijotaga eliodi moyopo loniciwaga Jesus, igaataga onowidi nigicoa nogojedi anodibatalo. <sup>10</sup>Tiago ijaa João lionigipi Zebedeu, lokaagetedi Simão, eledi eliodi moyopo. Odaa Jesus jegeete Simão, “Jinagadoii! Natigidiwaga abaatalo nogojedi majicitiogi oko. Pida nigina natigide ja gabakedi mawii metidadiwagadi oko, odaa jagajicitalo Aneotedogoji.”

<sup>11</sup>Odaa nogoyadeegitedicogi liwateceli daato, odaa jogodiotece Jesus, jogoika ijoatawece ane libaketedini.

### Jesus icilatidi ica dawace-lolaadi

(*Mateus 8.1-4; Marcos 1.40-45*)

<sup>12</sup>Ica noko, Jesus me ideite manitaga aca nigotaga, odaa onini ica goneleegiwa ane dagaxatece ica dawace-lolaadi. Nigijo naga naditege Jesus,



(Lucas 5.6-7)

odaa ja dakagitinigi iigo negepaa itinigi iigo latobi, diniwikodetibece. Odaa ja dipokotalo Jesus, meetalo, “Iniotagodi, nigemaani madicilatiti, jowoogodi mida gadoniciwaga madicilatiti.” <sup>13</sup>Odaa Jesus ja dibatedeloco, meete, “Ee! Jemaa me gadicili!” Aonigica daga leegi jona icí nigijo goneleegiwa ane dawace-lolaadi. <sup>14</sup>Pida Jesus yajoi me digica ane yelogodita me icilatidi, meeteta, “Emii minitaga ane libakadi Aneotedogoji ligeladi, adinikeenita, codaa aboonitalo Aneotedogoji nigijo eijeegagi ane diigenataka Moisés me dinalegi, amaleegaga oyowoogodi nigina oko naga gadicili.”

<sup>15</sup>Pida nigijo okotigi anitawece nigotaga jegeliodi moyalagatalo Jesus, odaa nigica noiigi jogototalo mowajipatalo lotaga, codaa me nicilatiditadiniwace. <sup>16</sup>Pida idioka limedi me dinogatedicobece, migo miditaga nipodigi ane digica nigeladimigipi, yotaganene Aneotedogoji.

**Jesus icilatidi ica alejaado ane dagadiaa ditinege**

*(Mateus 9.1-8; Marcos 2.1-12)*

<sup>17</sup>Ica noko Jesus niigaxitediniwace ica noiigi. Nigica aneite, onidi me nicotiniwace icoa fariseutedi icaagicoa niigaxinaganadi anodiigaxinagatece lajoinaganegeco Moisés. Oicogoticogi inoatawece ane nigotadawaanaga nipodaga Galiléia aniaa Judéia, codaa me oicogoticogi nigotaga Jerusalém. Nigica loniciwaga Goniotagodi Aneotedogoji idei mijoataga Jesus nigina me nicilatiditediniwace eelotaginadi. <sup>18</sup>Odaa digawini niciagi, onicoa icoa goneleegiwadi anoyadeegi ica alejaado ane dagadiaa ditinege, one iwoteloco ligelate, odaa jogodoletibige nimawenegegi me dakatiobece catiwedi diimigi aneite Jesus, domogoyadeegiticogi nigijo goneleegiwa lodoe Jesus. <sup>19</sup>Pida agoyakadi me dakatiobece leegodi nigica noiigi-nelegi. Odaa jogonogeleetibigimece ditibigimedi diimigi lelága. Odaa jonogonoga deegajoli, owo lawimagajegi diimigi. Nogoigodi moyomoke nigijo diimigi lelága, odaa jogoyexagatinigi nigijo alejaado catinedi ligelate, odaa jogonikatini lodoe Jesus liwigotigi nigijo noiigi. <sup>20</sup>Nigijo Jesus naga nadi mida eliwagatakanegegi nigijoa lokaagetedi alejaado, odaa jegeete, “Yokaagedi, gabeyacegeco ja inapitagadi.”

<sup>21</sup>Odaa nigijo anodiigaxinagatece lajoinaganegeco Moisés, ijaagijoa fariseutedi dinotaganegetiwage, modi, “Amiidoa icoa goneleegiwa ane diniciaceeketetege Aneotedogoji? Igaataga iniokiniwateda Aneotedogoji me yakadi me napitagadi oko libeyacegeco.”

<sup>22</sup>Pida Jesus ja yowoogodi nigica anodinotaganegetigi, odaa jegeetediogi, “Igaamee ina mawii ida gadowoogotiwaji?” <sup>23</sup>Mige dagaxa me dakake mejita nigidi alejaado, ‘Ja inapitagadi gabeyacegeco,’ ogoa, domige dagaxa me dakake me jüige me dabiditini, odaa jegewaligi? <sup>24</sup>Pida natigide amaleegaga owoogotiwaji, jikeetagawa me Ee, Goneleegiwa ane jicogotibigimece ditibigimedi, mida iigenatakanegegi digoina iigo me inapitagadi libeyacegeco oko.” Odaa jegeete nigijo alejaado, “Adabititini! Abaata gadigelate, odaa opiliticogi gadigeladi!”

<sup>25</sup>Agica daga leegi nigijo goneleegiwa ja dabiditi lodoe ijotawece nigijo noiigi, naga dibata ligelate, odaa jogopiticogi ligeladi, diniotagotibigimece Aneotedogoji. <sup>26</sup>Ijotawece nigijo noiigi eliodi moyopo, codaa odogetetibigimece Aneotedogoji. Eliodi magaga doitibigiwaji, odaa modi, “Nigina noko, jinataga nibinico ane digicoa me jinataga!”

**Jesus enidite Levi me diotibece**

*(Mateus 9.9-13; Marcos 2.13-17)*

<sup>27</sup>Nigidiaagidi Jesus naga noditedice nigotaga, odaa ja nadi ica goneleegiwa ane liboonagadi Levi. One libakedi me dibatibigege ninyeelo ninionigi-eliodi romaanotedi. One nicote nigica aneitibige moyedia. Odaa Jesus jigigo minitaga, odaa jegeete, “Anagi, aniwitici!” <sup>28</sup>Odaa Levi ja dabiditini, ja yaladi ane libakedi, odaa ja diotece Jesus.

<sup>29</sup>Odaa Levi ja yaloke Jesus eo ica nalokegi nelegi mini ligeladi. Odaa eliodi nigica anodibatibigege ninyeelo ninionigi-eliodi romaanotedi, codaa meledi eliodi oko idi me nicogowepodi. <sup>30</sup>Icoa fariseutedi icaagicoa anodiigaxinagatece najoinaganegeco anida aneetege nigijo lapo fariseutedi eledi idi, jogoyalomege nigijo anodiotibece Jesus, moditiogi, “Igaamee ina me gagiiwepoditiwaji idi anodibatibigege ninyeelo ninionigi-eliodi romaanotedi, codaa me niginoa eletidi abeyacagaga?”

<sup>31</sup>Odaa ja igidi Jesus, meetediogi, “Nigina anicilegegipi agoyopotibige dotowegi, pida nigina ane neelotikanaga bogoyopotibige dotowegi. <sup>32</sup>Ajanagi daga jiniditiogi ane igenagatibigiwaji, pida janagi me jiniditiogi aninoa libeyacegeco amaleegaga odinilaatece libeyacegeco, odaa jogodopitalo Aneotedogoji.”

**Jesus diigaxinagatetece ica anodaagee me jikanakawaanigi me  
jiniodaga me jotaganegenaga Aneotedogoji**  
(*Mateus 9.14-17; Marcos 2.18-22*)

<sup>33</sup>Ica noko moditalo Jesus, “Nigijo anodiotibeci João Batista idatecibece aniodaga, owotibige menegegi yoniciwaditibigiwaji moyotaganege Aneotedogoji. Anagaga oniotogodici ane fariseutedi idaagee. Pida nigidi anodiotibigagadici baadigica dogoika me niodaga.”

<sup>34</sup>Odaa Jesus jegeetediogi, “Domigakatitiwaji molii me niodaga, nigina nodenigipi mido nadonegegi, ina nigini miditaga nigini ane wado? <sup>35</sup>Pida icota noko monogatice nigini ane wado me ideitice liwigotigi. Odaa nigida noko jogoika me niodaga.”

<sup>36</sup>Jesus eledi yatematitediogi ica natematigo anida ane godiigaxitece, meetediogi, “Agica ini ane dapadenagata nigina lipegetege liwai gela daga napadeteloco nowoodagagi oxiiigodi. Nigica anidaagee, ibeyacagadi nagadi lapadexe, codaa nigina napadenaganagadi me gela ageyotinigi nigina nowoodagagi oxiiigodi. <sup>37</sup>Eleditace migini ane yadotinigi viinyo gela nagana lagaagaxi ewacogo baanogopake. Nigica anidaagee, nigidiwa lagaagaxidi laxokodi datope, odaa jaganado nigica viinyo, codaa jagaga beyagi nigicoa lagaagaxidi. <sup>38</sup>Leeditibige moyetigi nigina viinyo gela nagana lagaagaxi gela. <sup>39</sup>Codaa agica ane yemaa viinyo gela, nigina naga eliodi me wacipeta viinyo oxiiigodi, igaataga yakadi mee, ‘Nigina viinyo oxiiigodi dagaxa mele.’” (Jesus yatemati nigida natematigo me ikee liigaxinaganegeco mepaga geladi.)

**Jesus diigaxinagatetece anodaagee saabado**  
(*Mateus 12.1-8; Marcos 2.23-28*)

**6** <sup>1</sup>Negeledi saabado Jesus jonaga yakagiditedeloco ica nixogotagi aninaa leyeema. Nigijo anodiotibece onotegi nogonigakala, odaa jogoyeligo lolacidi leyeema. <sup>2</sup>Odaa onicoa icoa fariseutedi anodi, “Igaamee ina mawiiitiwaji ida aneni, gonajoinaganegeco agodika me jaoga nigida aneni nigina me saabado? (Igaataga

ane daga godika me jaoga okanicodaagica nibakedi codaa me inigakalaga leyeema).”<sup>3</sup> Jesus naga igidi, meetediogi, “Agodigica malomegenitlocotiwaji, nigijo Davi loenatagi, naga nigicile, ijaagijoa lokaagetedi. <sup>4</sup>Davi geme dakatiwece lopegedi Aneotedogoji. Odaa ja dibatalo nigijoa paontedi anoyajigotalo Aneotedogoji, odaa ja yeligo, ligiiwepodi lokaagetedi. Pida gonajoinaganegeco modi midiokidi moyakadi moyeligo nigidi ane nibaaga mini Aneotedogoji lopegedi, nigidiwa paontedi anoibootalo Aneotedogoji.” (Pida agica daga nilaagedi Davi.)<sup>5</sup> Odaa Jesus jegeetediogi, “Ee, Goneleegiwa ane jicogotibigimece ditibigimedi, jegemaga jiiige nigina anoyakadi mowo nigina me saabado.”

### **Jesus icilatidi ica beyagi libaagadi me saabado**

*(Mateus 12.9-14; Marcos 3.1-6)*

<sup>6</sup>Negeledi saabado, Jesus one dakatediwece niikanagaxi me diigaxinaga. Odaa oninica goneleegiwa alejaado, beyagi libaagadi. <sup>7</sup>Icoa anodiigaxinagatece najoinaganegeco icoa fariseutedi, anagaga idi oigoaditalo Jesus, oyemaa moiwi mige dicilatitaga nigina me saabado. Owotibige moyakadi modotagatibige Jesus me daga yotetteda saabado. (Leegodi lakatigi judeutedi me daga nibaaga nigina me saabado.) <sup>8</sup>Pida Jesus yowoogoditediwe nigicoa lowooko. Odaa joanigidaa leegodi meete nigijo beyagi libaagadi, “Adabititini lodoe nigina oko!” Odaa nigijo goneleegiwa ja dabitidi.

<sup>9</sup>Odaa Jesus meetediogi, “Gadigeetiawaji, amiini ica ane diigenatakata gonajoinaganegeco me jaoga ina me saabado? Domige godiige me jaoga anele, ogoa, domige ane beyagi? Jakadi me inoga ane yeloadi oko, ogoa domige jakadi me jeloadi oko?” <sup>10</sup>Odaa iwitediogi iditawece nigidi anoyawiile. Odaa meete Jesus nigijo ane beyagi libaagadi, “Ixokenitice gabaagadi!” Naga ixoketice libaagadi, odaa ja icí. <sup>11</sup>Odaa eliodi me neligideega nigijoa lakapetedipi, codaa odinotaganegetiigi nigica anodigotalo Jesus.

### **Jesus iomagaditedice nigicoa dooze goneleegiwadi anodiotibece**

*(Mateus 10.1-4; Marcos 3.13-19)*

<sup>12</sup>Nigijoa nokododi, Jesus igo dalagatetedibigimece aca wetiga me yotaganegede Aneotedogoji. Odaa idiaa ixomagateetedice ijotawece enoale me yotaganegede Aneotedogoji. <sup>13</sup>Nogone yelogotibige, Jesus jegeniditediogi goneleegiwadi anodiotibece. Odaa ja iomagaditedice dooze, odaa jonigida ica aneyatedigi me “Liigexedi Aneotedogoji.” Odaa liboonagatedi nigicoa goneleegiwadi: <sup>14-16</sup>Simão aneote Jesus me liboonagadi me Pedro, ijaagijo nioxoa anodita André; Tiago, ijaa João, Filipe; ijaa Bartolomeu; Mateus ijaa Tomé; Tiago ane lionigi Alfeu; Simão analeegoyatigi me Zelotes; Judas ane lionigieledi Tiago; ijaa Judas Iscariotes aneyaa Jesus mijotaga nelogododipi.

**Jesus niigaxitediniwace codaa me nicilatiditediniwace oko**  
(*Mateus 4.23-25*)

<sup>17</sup>Odaa nogone dinikatedini Jesus me icogotedibigimece aca wetiga, odaa ja dabiditedini miditaga ica anabotiwage ijaagijo noiigi anodiotibece. Codaa onidi ica eliodi oko agicaadaga icogoticogi nigicoa nipodaga Judéia, codaa me nigotaga Jerusalém, codaa me nipodaga aca Tiro aniaa Sidom, anodipegitinece ica akiidi-eliodi. <sup>18</sup>Igotibeci mowajipatalo lotaga Jesus, codaa me nicilatiditediniwace leelotika. Icaagica ane diotibece niwicidi abeyacagaga anowote niginoa lowooko ane napioi, eledi igotibeci diniwakateetibigiwaji. <sup>19</sup>Ijotawece nigijo noiigi odoletibige modibatelogo Jesus, leegodi noditice ica loniciwaga ane icilatidi iditawece oko ane neelotikanaga.

**Jesus diigaxinagatetece anodaagee ica oko anida linikegi icaagica ica**  
**oko ane agecagalo**  
(*Mateus 5.1-12*)

<sup>20</sup>Jesus iwitediogi nigijo anodiotibece, odaa meetediogi,

“Nigida makaamitiwaji aniniitibeci,

anakaami madewetedi,

igataga Aneotedogoji ja iige gadaalegena.

<sup>21</sup>Aniniitibecitiwaji ane anigicile nigina natigide,

igataga icota me gaditiminitiwaji.

Aniniitibecitiwaji ane anoenitibece niginoa nokododi,

igataga icota malajikanitibece.

<sup>22</sup>Aniniitibeci nigina akaamitiwaji ane degetigademaani,

ane degele modibatagagi,

codaa metigadientibige,

nige odi makaami abeyacagaga,

leegodi maniwitici ane Ee,

Goneleegiwa ane jicogotibigimece ditibigimedi.

<sup>23</sup>Nigina nige ixomagateenitedijo niginoa nawikodico anejitalo, jema meliodi maniniitibecitiwaji. Igaataga Aneotedogoji ja yotetedagadomi ane dagaxa meletagadomitiwaji digoida ditibigimedi. Igaataga diganee natigide, jigidaagee nigijo jotigide litacepodi nigina oko moyametibigo nigijo anoyelogoditedibece Aneotedogoji lowooko.

<sup>24</sup>Pida akaamitiwaji bigicota meliodi mawikodeetiwaji,

anakaami liicotedi,

igataga jagabaatege icoatawece nigicoa anakati mabaatege,

agaleegabaatege eledi aneletagadomi.

<sup>25</sup>icota meliodi magaga awikodeetiwaji,

akaami anele manioditiwaji niginoa nokododi,

igataga icota me gadeloati nigigi.

Codaa icota meliodi mawikodee,  
 akaami ane alajikanitibece,  
 igaataga icota manoeni leegodi gagecagalogo.

<sup>26</sup> Eliodi magaga awikodee nigina akaami anetigadiwenigideni nigina oko,  
 igaataga nigica jotigide gadaamipi aagaga oiwenigide nigijoa  
 awitakagaga anodi moyelogoditedibece Aneotedogoji lowooko.  
 (Pida oinaale nigijo noiigi.)

**Leeditibige me jemaanaga gonelogododipi**  
*(Mateus 5.38-48)*

<sup>27</sup> Pida ejitagawatiwaji ane anajipaatiwa, me leeditibige memaani  
 gonelogododipi, codaa awii nigica aneletema nigijo anakaami nelegetedipi.  
<sup>28</sup> Ipokitalo Aneotedogoji me ibinietediogi nigina anodotagatibigagaji, codaa  
 otaganegenitetiwaji Aneotedogoji me ibinietediogi nigina anoyametibigagaji.  
<sup>29</sup> Nigica ane yabaketigi gadajice, ajicita nagani eledi gadajice magaga yabake.  
 (Me ikeeni me digica gadelagatema.) Nigica ane dibata ganicaapa ajici codaa  
 me ganoecagaxi. <sup>30</sup> Idioka limedi medianitiwaji nigina ane dipokotagawa  
 ganigica. Codaa nigina ane dibata ganigidi ane ganebi, jinigipoki  
 dogoyopilagaditagawa. <sup>31</sup> Ademii oko nigica anemaani modigotagawa.

<sup>32</sup> Niginoka emaani nigina anetigademaani, agica ganigaanye miniwataga  
 Aneotedogoji. Igaataga nigina oko ane beyagi aagaoyemaa nigina  
 nemaanogodi. <sup>33</sup> Codaa nigawii aneletema inokina nigina anowotagadomi  
 anele, odaa agicatace ganigaanye. Igaataga nigina oko abeyacagaga jigidaagee.  
<sup>34</sup> Codaa nigadilaganegenitiogi inokina nigina ane eni metigadediani, nigica  
 anigidi gadowoodagagi anonadila, agicatace ganigaanyetiawaji. Igaataga  
 nigina oko ane beyagi eo ladiligi nigina inaagina abeyacegegi eotibige me  
 dibatege liikoa. <sup>35</sup> Pida jema memaani ganelogododipi, codaa awii nigina  
 aneletema, awii ladiligi, pida nigina me daga aliitege me yopilagaditagawa  
 liikoa. Joanigidaagee odaa бага гадедланитетиваји Aneotedogoji, codaa akaami  
 lionigipi Aneotedogoji ane iige inoatawece. Igaataga eletetema codaa me  
 nigina oko ane daga diniotagodetibigiwaji codaa me abeyacagaga. <sup>36</sup> Iwikodeni  
 eledi oko, diganigotedagawa Aneotedogoji Gadiodi me gadiwikodenitetiwaji.

**Jinagawini eledi oko ane dogowoogoti nigica ane loenatagi**  
*(Mateus 7.1-5)*

<sup>37</sup> Jinagawini anee eledi oko nigina ane daga iwikodeni, odaa  
 Aneotedogoji aiwi anenitiwaji otegexaagaga gadiloikatititetiwaji.  
 Jinegeni me leeditibige moiloikatidi oko leegodi meo ane beyagi. Odaa  
 Aneotedogoji agee me leeditibige metigadiloikatititetiwaji. Adinaagititibige  
 okanicodaagica ane beyagi anowotagadomi. Odaa Aneotedogoji  
 yaagiditedibige nigijoa gadoenataka ane beyagi. <sup>38</sup> Ajicitatiwaji eledi oko  
 nigica ane yopotibige, odaa Aneotedogoji yajigotedagawatiwaji nigica



anopootibige. Digo micataga nigina oko ane yetigi nelegei leyeema negepaa niolakati, alee ipiati, joanigidaagee eliodi ane yajigotedagawa Aneotedogoji. Igaataga Aneotedogoji yajigotedagawa liciagi nigina anajicita eledi oko.”

<sup>39</sup>Jesus yelogoditediogi ica natematigo anida ane godiigaxitece, meetediogi, “Nigina golaga domige yakadi me digilagatedeta eledi golaga? Nige digilagatedeta, oada nigidoa itoata goladi yelogo me daxaboketinece digica begi. <sup>40</sup>Codaa nigina ane didiko anagaxateloce niigaxinogodi. Pida nigina nige igodi icoatawece nigicoa lidiko, oada ja liciagi nigini niigaxinogodi.

<sup>41</sup>Jinaga gadigoati lagamicagajegi ganioxoa catiwedi ligecooge, leegodi akamagakaami otegeaagaga emaanii mowoogoti nigidi iwogo liwai ane ideii catiwedi gagecooge. <sup>42</sup>Pida menita ganioxoa, ‘Inioxoa, anagi! Inoga gadagamicagajegi catiwedi gagecooge.’ Igaamee ina mawii ida gagegi, akamagakaami agemaani mowoogoti nigidi iwogo liwai catiwedi gagecooge? Gademaanigi mokawii makaami ele. Pida ele majela manogaa nigidi iwogo liwai catiwedi gagecooge, oada jegele manatiteloce lagamicagajegi ganioxoa manogaatema.

### **Jowoogotaga niale leegodi elali**

*(Mateus 7.16-20; 12.33-35)*

<sup>43</sup>Nagana niale anele, abeyagi elali. Oada nagana niale ane beyagi, agele elali. <sup>44</sup>Codaa jowoogotaga anada nagana niale leegodi niginoaa elali. Igaataga ainotecaga ilipege madataga lalepigigo, codaa ainogaaga ‘uuva’ maditaga omiigonaga. <sup>45</sup>Igaataga nigina anele icogotiwece laalegena nigina oko anele, leegodi laalegena nolee nigica anele. Pida nigina ane beyagi icogotiwece laalegena nigina oko ane beyagi, leegodi laalegena nolee ane beyagi. Igaataga nigina oko eetece inokina nigina ane ideii catiwedi laalegena.

### **Icoa itoa latopaco lipodagalatedi diimigi**

*(Mateus 7.24-27)*

<sup>46</sup>Igaamee ina menitiwatiwaji, ‘Goniotagodi, Goniotagodi,’ pida agawii nigina ane jiigetagawatiwaji? <sup>47</sup>Natigide jelogoditagawatiwaji anodaagee nigina oko anenagi meetaga, oada wajipatalo yotaga, codaa idadiwagadi. <sup>48</sup>Jiciaceketege nigina goneleegiwa ane dabitegetini ligeladi. Oada ilecatiditinece me naligitedini lawonadi ditibigimedi wetiga. Oada naga aboogo-akiidi, icota ninyogodi minitaga ligeladi. Pida ninyogodi ayakadi me igike nigini diimigi, leegodi datiteta moyojogotini. <sup>49</sup>Pida nigina oko ane wajipatalo yotaga, pida ageyiwigadi, baga liciagi eledi goneleegiwa ane dabitegetini ligeladi. Dabitegetini miditaga dotiwadi, pida bogodaa ayatitagaditedini lawonadi. Naga aboogo-akiidi, nigicota ninyogodi ligeladi. Oada jegenitini, agica nenyakigi.”

**Jesus icilatidi liotagi ica lacilo icoa niodagawadi romaanotedi**  
(*Mateus 8.5-13*)

**7** <sup>1</sup>Nigijjo naga nigotedini Jesus me yotaganeege nigidi noiigi, odaa jigigo manitaga nigotaga Cafarnaum. <sup>2</sup>Odaa oninica goneleegiwa ane iige onaniteci taalia iodagawadi. Ica liotagi ane dagaxa me yemaa, one deelotika, jona doletibige me yeleo. <sup>3</sup>Nigini ane iige niodagawadi romaanotedi naga dibodictalo Jesus, jona iige icoa lacilodi judeutedi migotibeci odipokotalo Jesus migo icilatidi nigijjo liotagi. <sup>4</sup>Nogototalo Jesus, odaa icaanogodigotalo mowotibige migo, moditalo, “Janagaga makaamitaga, jemaanaga micilatiti liotagi lacilo iodagawadi, igaataga nigini ane iige niodagawadi romaanotedi, goneleegiwa libinienigi. <sup>5</sup>Codaa eliodi me yemaa godoiigi, jegepaa diigenatakata modabitegetini godiikanagaxi.”

<sup>6</sup>Odaa Jesus jigigo lixigagawepodi. Pida nigijjo nigipegitedio ligeladi nigijjo lacilo romaanotedi, odaa ja iigetege icoa lokaagetedi migotibeci odakapetege Jesus. Odaa jogoyelogoditalo Jesus nigicoa lotaga nigijjo lacilo romaanotedi, monee, “Goniotagodi, ajemaa dagalee gadigiwoci. Eliodi ganiwaló, agakaami iciagi managi anakaatiwece igeladi. <sup>7</sup>Codaa joanigidaa leegodi me daga ejigo jipokotagawa managi degepaa digoina. Pida okexaa eni me icí idida iotagi, odaa ja icí inioneega. <sup>8</sup>Igaataga akaami iciagi, ee aagaga idi anetidiige, codaa idiwa iniodagawadi magaga jiige. Idatecibece ini anejita, ‘Emii’, odaagigo. Iniaageledi mejita, ‘Anagi’, odaa jegenagi. Idatecibece mejita iotagi, ‘Etidi anawii.’ Odaa jegeo.”

<sup>9</sup>Nigijjo Jesus naga wajipate nigijjoa lotaga, eliodi me yopo. Odaa naga nawiilitetedijo, meetediogi nigijjo noiigi anodiatece, “Ejitagawatiwaji, anigica oko jakapetege midí godoiigi Israel ane eliodi eliwaagatakaneegegi digo minitaga nigini goneleegiwa (ane daga godoiigi).” <sup>10</sup>Nigijjoa liigexedi nigijjo ane iige niodagawadi romaanotedi, nogopitiibeci ane icogoticogi. Nogotota, nigijjo niotagi ja icí.

**Jesus eote me yewigatace lionigi aca wajekalo**

<sup>11</sup>Ica noko Jesus onigo manitaga nigotaga Naim. Ijaagijjo anodiotibece icaagicaeledi noiigi-nelegi lixigagawepodi. <sup>12</sup>Odaa nogone odipegita nigica lapoagi nigica niwilanigi ane niotaa nagani nigotaga, odaa jogodakapetegege ica lapo-nelegi, anoyadeegi ica lioneege ane yeleo, oyadeegi monaligitini. Nigica émegegi onokijoteci me lionigi acoda wajekalo. Nigica noiigi-nelegi oigalatibece nagajo eliodo. <sup>13</sup>Nigijjo naga nadi Goniotagodi nagajoda wajekalo, eliodi me iwikode. Odaa jegeeteta, “Jinaga anoeni!” <sup>14</sup>Odaa jonegepaanaga ipegiteta, odaa ja dibatedeloco aca iwokodagaxi. Odaa nigijjo anoyadeegi ja dabiditiniwace. Odaa jeege Jesus, “Lioneege, Ee gadiigeni, anicootini!” <sup>15</sup>Odaa nigijjo émegegi jona nicotini, odaa ja dotaga. Jesus ja yopilagadite nagajo eliodo.

<sup>16</sup>Ijotawece nigijjo oko eliodi me doitiibigiwaji, odaa odogetetalo Aneotedogoji, modi, “Dinikeetogowa ane yelogoditedibece Aneotedogoji lowooko, codaa nigida eliodi nimawenegegi. Aneotedogoji ja dalitediogi

loiigi, odaa yaxawatediogi!” <sup>17</sup>Nibodicetedi anoditece Jesus jigilaagiteloco iditawece nipodigi Judéia, codaa me nigicoa nipodaga anipegitege.

**João iige nigijo anodiotibeci migotibeci midoataga Jesus**

*(Mateus 11.2-19)*

<sup>18</sup>Nigijo anodiotibeci João Batista oyelogodita icoatawece nigicoa baanegeote Jesus. <sup>19</sup>Odaa João eniditiogi icoa itoataale anodiotibeci, odaa ja iige moige Goniotagodi, meetiogi, “Nigicootalo, enitalo, ‘Manigakamagakaami icoa ane inibeonagatege menagi me godewikatidi, ogoa, domigalee inibeonagatege eledi oko?’”

<sup>20</sup>Nogototalo Jesus, odaa jogoige, moditalo, “Goniotagodi, João Batista godiige me gadigegegi manigakamagakaami icoa ane inibeonagatege menagi godewikatidi, ogoa, domigalee inibeonagatege eledi oko?”

<sup>21</sup>Ajaagajo nagajo lakata nigicotibeci nigijoa liigexedi João, Jesus ja icilatidi eliodi oko ane neelotikanaga, ina anodakatiogi, codaa eote me yatetacibigiwaji goladi. <sup>22</sup>Odaa Jesus ja igiditediogi nigijo ane iige João, meetediogi, “Opilitacicogi minitaga João, odaa elogoti niginoan ananati, codaa anajipaatalotiwaji. Elogoti me yatetacibigiwaji goladi, mewaligi ane beyagi laxace, codaa me icí dawace-loolatedi, aticilonadi ja wajipatacibigiwaji, émagaga newigatace, codaa me jatemati nibodicetedi anele miditaga madewetedi. <sup>23</sup>Nigina oko ninitibece nigina me daga dinibolikatatitici.”

<sup>24</sup>Nigijo nogopitibeci nigijoa liigexedi João, odaa Jesus ja yalagate João Batista, meetediogi nigidi noiigi, “Ijo me emiitiwaji mididi nipodigi ane yadilo ane digica nigeladimigipi, amiijo anemii awinitiwaji? Domigemii mawini goneleegiwa ane digica бага niiticogi ane liciagi nigina naanyogo ane igike niocodi? <sup>25</sup>Amiina anemii awinitiwaji? Domigemii awini goneleegiwa anele me dinixo? De jelogoditagawatiwaji! Nigijo anele me dinixotibigiwaji, ane digica ananiaditema, ane digeladetigi diimaga libinienaga, ligeladi niginoan inionaga-eloodoli. <sup>26</sup>Enice, amiijo ica anemii awinitiwaji? Domige emii awinitiwaji nigijo ane yelogoditedibece Aneotedogoji lowooko? Begewi! Jelogoditagawatiwaji mepegewi me emii awinitiwaji nigijo ane nagaxatologo nigijo anoyelogoditedibece Aneotedogoji lowooko nigijo jotigide. <sup>27</sup>Igaataga joanigijaa João nigijo aneeta Aneotedogoji lotaganagaxi, negee Aneotedogoji, ‘Jiwakatee iigexegi gadodoe, yoetece galigi’. <sup>28</sup>Jelogoditagawa, João me dagaxa me gonegegi catedi ijotawece nigijo eledi anoyelogoditedibece Aneotedogoji lowooko. Pida nigina oko iwikodaga ane iige Aneotedogoji laalegena, бага dagaxa me gonegegi cateditace João.”

<sup>29</sup>Nigina anodibatibigege ninyeelo ninionigi-eliodi romaanotedi, codaa me iditawece nigidi noiigi owajipatalo lotaga Goniotagodi, joanigidiaagidi nigica ane nilegetiniwace João, nogowajipatalo lotaga Jesus, odaa modi Aneotedogoji igenaga. <sup>30</sup>Pida nigijoa fariseutedi ijaagijo anodiigaxinagatece

lajoinaganegeco Moisés baadogoyemaa me nilegetiniwace João. Joanigidaa modowocetege nigica ane domaga yemaa Aneotedogoji mowo.

<sup>31</sup>Odaa Goniotagodi mee, “Nigina noiigi, amiini ica ane jakadi me jibogoditege? Natigide jelogoditagawatiwaji ane jibogoditege. <sup>32</sup>Liciagi nigaanigipawaanigi ane nicotiniwace me naloogo midi lalokaditibece. Ini lapo meeta, me dapaaweta niginieledi lapo, ‘Ja jatenagatigi natenegegi nadonegegi, pida aganibailetiwaji. Codaa ja domaga jigaanaga ica nanaagi monaligitini émegegi, pida aganoenitiwaji.’ (Odaa nigidi nigaanigipawaanigi idioka limedi me dinotigimade.) <sup>33</sup>Igaataga João Batista enagi, odaa ayeligo paon, otegeaagaga wacipeta viinyo. Odaa menitiwaji me dakatiogi niwigo abeyacegegi. <sup>34</sup>Odaa Ee, Goneleegiwa ane jicogotibigimece ditibigimedi, nagaga janagi, odaa бага jeligo paon, codaa me jacipe viinyo. Odaa menitiwaji, ‘Digawini! Nigidoa goneleegiwa olade, codaa me acipegegi. Lokaagetepi nigidi anodibatibigege ninyeelo ninionigi-eliodi romaanotedi, codaa lokaagetepi inatawece nigina oko anowidi libeyacegeco!’ (Odaa gadiciagitiwaji nigijo nigaanigipawaanigi leegodi midioka limedi madinotigimadenitiwaji.) <sup>35</sup>Pida nigina oko anida liwaxinigi, baanaga yowoogodi Aneotedogoji me diwaxinaga, codaa midioka limedi meo ane igenaga.”

### Jesus igo ligeladi ica fariseu anodita Simão

<sup>36</sup>Ica fariseu one node Jesus migo aniodi ligeladi. Odaa Jesus jigigo. Naga dakatediwece ligeladi, odaa ja nicotedi maditaga aca nameeja maniodi. <sup>37</sup>Manitaga nagani nigotaga onani aca iwaalo agopeloa. Naga dibodicetalo miniwatedigi Jesus ligeladi nigijo fariseu maniodi, odaa jigigo, yadeegi aca bootawaana wetiga, anodita “alabastro”. Nagaca bootawaana one nolee ladokojegi. <sup>38</sup>Nagajo iwaalo dabiditi lowidi Jesus micoataga logonaka, anoetibece. Odaa latiidi datikoletelogo logonaka Jesus. Odaa ja yatita lamodi me iwilegi Jesus logonaka, codaa eliodi me napicogotedice logonaka, ikee me diniotagodetalo. Codaa yadotelogo logonaka nigica ladokojegi. <sup>39</sup>Nigijo fariseu ane node Jesus naga nadi anee nagajo iwaalo, odaa meetibige le, “Nigina degewi niginiaaginiwa Nigicoa ane nelogoditedogowa Aneotedogoji lowooko, daganagawini yowoogodi anani nagani iwaalo ane dibatelogo, codaa tagaga yowoogodi nigicoa ligopeloageco, codaa ane libeyacegeco.”

<sup>40</sup>Odaa Jesus meeteta nigijo fariseu, “Simão, domigida igegei.” Odaa ja igidi, meetalo, “Digageni, niigaxinaganaga.” <sup>41</sup>Odaa Jesus jegeete, “Idiwa iniwataale goneleegiwadi onaalewe ica anidioka limedi me yajigo monadila ninyeelo. Onica ica ane dinaalewe ciinco taalia beexotedi, odaa icaeledi бага dinaalewe meya-taalia beexotedi. <sup>42</sup>Nigidi iniwataale agoyakadi moyedia nigijoo naaleweta nigijo goneleegiwa. Odaa joanigidaa meetiogi me dagadiaa leeditibige moyedia. Natigide gadige, amepidigica ijoa itoa ane dagaxa me yemaa ijo goneleegiwa anonaalewe?”

<sup>43</sup>Simão ja ninigodi, meetalo, “Ejime nigijo ane dagaxa me dinaalewe jigijaa dagaxa me demaanaga.” Odaa Jesus meete, “Ele motagani!”

<sup>44</sup>Odaa Jesus naga niwiteta nagajo iwaalo, odaa meete Simão, “Jaganati nagani iwaalo. Nigijo naga inakatiwece gadigeladi, aganjacitiwa ninyogodi me jiwilegi igonaka. Pida бага iwilegi igonaka yatitalo latiidi, odaa yatita lamodi me yadilonatidi igonaka. <sup>45</sup>Codaa nigijo naga janotio, agadapicigi me gadecoatitici. Pida nigijo naga nakatio, nagani iwaalo nagani me napicogotedice igonaka. <sup>46</sup>Codaa otegeaagaga adootigi najidi yacilo mikeeni mogeetetiwa, pida aniaagani бага yadotelogo igonaka ladokojegi. <sup>47</sup>Odaa jema mejitagawa Aneotedogoji ja iwilegi libeyacegeco nagani iwaalo anowidi. Odaa joanigidaa leegodi meliodi me idemaa. Pida nigina oko ane daga deemitece me leeditibige me doletibige Aneotedogoji me iwilegi libeyacegeco, aḡewi me idemaa.”

<sup>48</sup>Odaa Jesus jegeeteta nagajo iwaalo, “Aneotedogoji ja napitagadi gabeyacegeco.”

<sup>49</sup>Nigijo eledi oko anidiaagi madi nameeja, dinotaganegetiwege, modi, “Amiiniwa icoa goneleegiwa anee me yakadi me napitagadi gobeyacegeco?”

<sup>50</sup>Odaa Jesus jegeeteta nagajo iwaalo, “Aneotedogoji ja gadewikatiti leegodi madinakatoni. Odaa emii opili, mele gadaalegena!”

### Iwaalepodi anodiotibece Jesus

**8** <sup>1</sup>Nigidiaagidi Jesus ja diniwajetedicogi midiwataga icoa nigotadi icaagicoa nigotadawaanaga nigidi nipodigi, yelogoditedibece icoa nibodicetedi anele, anonelogoditogowa anodaageeteda Aneotedogoji me iige oko laalegena. Nigijo dooze anodiotibece eledi ijo me lixigagawepodi. <sup>2</sup>Codaa onica ica iwaalepodi anagaga igotibeci. Jesus one iticoitedice niwigo abeyacegegi ane dakatiogi anigepidagaca nigijo iwaalepodi, codaa one nicilatidi ica ane neelotikanaga. Aca anodita Maria aneledi oyatigi me Madalena. Joanagajaa Jesus ane icilatidi modakatiogi seete niwicidi abeyacagaga. <sup>3</sup>Acaagaca aca Joana lodawa ica Cuza ane dowediteloco ligeladi ica inionigi-eliodi Herodes. Codaa eledi igo aca Susana, icaagica eledi iwaalepodi, anoyaxawa Jesus ijaagijo anodiotibece, oyajigo liwai nigicoa ane nepilidi moyaxawatiogi.

### Jesus yatemati ica natematigigi ica anetanaga

(Mateus 13.10-23; Marcos 4.10-20)

<sup>4</sup>Ica oko ane icogoticogi inoatawece nigotadi ototalo, odaa ja dilapode nigica noiigi-nelegi. Nigijo naga dilapodetibigiwaji, odaa Jesus ja yatemati ica natematigo ane godiigaxi, meetediogi, <sup>5</sup>“Digawinitiawaji! Ica goneleegiwa onigo etanaga. Nigijo naga yokoletedibece nigijoa nolacidi, onicoa icoa ane enitedini midi naigi. Analee onipodi oko, codaa me ilaagaxodi aagaga oyeligo. <sup>6</sup>Ica eletidi nolacidi one enitedini midiwa icoa wetiadawaanaga. Odaa ja domaga ili, pida yadilo, leegodi ibeyacagadi me yadilo nigijo anei. <sup>7</sup>Pida icoa eletidi bogonenite midi ica ipelakijadi. Naga domaga ili, pida jonagaga ili nigijo ipelaga, odaa ja yapogoditedini. <sup>8</sup>Pida onicoa icoa eletidi anenitedinigi

miditaga ica iigo anele. Odaa bogone ili, codaa onele. One onidateci libatadi yajigo onaniteci taalia ligecidi.” Nigidiaagidi Jesus jonegeetediogi, “Ane yemaa me wajipatalo niginoa ane jiiigaxinagatece, enice atacolitecel!”

### **Jesus yelogodi nigica ane diitigi nigida natematigo**

<sup>9</sup>Nigijo anodiotibece jogoigetece Jesus nigica ane diitigi nigijo natematigo ane yatemati. <sup>10</sup>Jesus igidi, meetediogi, “Aneotedogoji бага ikeetedagawatiwaji anodaagee me iige oko laalegena, igaataga agica ane yowoogodi. Odaa nigina me jiiigaxi eledi oko, бага jatemati natematiko anida ane jiciaceeketege. Jaotibige moiwi pida agonadi nigica anewi, owajipata pida agoyowoogodi ane diitigi.

<sup>11</sup>Nigijo natematigo ane jatemati, digawini ane diitigi. Nigijoa lolacidi liciagi niginoa lotaga Aneotedogoji. <sup>12</sup>Nigijoa lolacidi anenite miditaga naigi, liciagi nigina oko anowajipatalo lotaga Aneotedogoji. Pida negenagi godaxakawa, odaa ja noga nigijoa notaga anowajipatalo ane ideite laalegena. Eotibige me dagadiaa oyiwigadi Nigijoa ane godewikatidi, odaa Aneotedogoji agaleegaga eote lewiga. <sup>13</sup>Nigijoa lolacidi anenite midiwa wetiadawaanaga, liciagi nigina oko anowajipatalo Aneotedogoji lotaga, odaa jogodibatege codaa eliodi me ninitibigiwaji. Pida nigidi oko agewi nigica eliwagatakanegegi. Liciagi niginoa enanigijedi ane daga leegitinece litodi. Odaa aleegi metiwagataka, negenagi godaxakawa dineeta, odaa jegeyamagaticoace leegodi lawikodico. <sup>14</sup>Nigijoa lolacidi anenite miditaga ipelakijadi, liciagi nigina oko anowajipatalo Aneotedogoji lotaga, pida idokee mowo niginoa lakataga nigina iigo, codaa nogowikomataaga, odoletibige me liicotedi, codaa odoletibige mowo nigica anepaagoyemaa. Joanigidaagee nigijo ipelakijadi ane dogoika me ili nigijoa enanigijedi, metaye, liciagi eliwagatakanegegi nigijo oko aili pida dinelio. <sup>15</sup>Odaa nigijoa aneniteloco iigo anele бага liciagi nigina oko anowajipatalo lotaga Aneotedogoji, odaa oyotete catiwedi laalegena. Odaa baadaga inaale laalegena, pida ele. Codaa me lewiga nigidi oko diniigi, owo nigina ane yemaa Aneotedogoji codaa odinatitalo lawikodico.

### **Aca lokokena** *(Marcos 4.21-25)*

<sup>16</sup>Agica ini ane yalegi loledagaxi oditaga yamagateloco ginogo ane leegitinece le, migetaga ixotiwece lipe le loledagaxi, pida ipeke loledagaxi ditibigimedi, odaa inatawece oko anodakatiwece diimigi onadi liwitiigi.

<sup>17</sup>Igaataga inoatawece niginoa ane dinagaditedini, icota me jowoogotaga, codaa inoatawece ane daga jowoogotagateda, icota me jinataga, codaa enagi manitaga aca nilokokena Aneotedogoji. <sup>18</sup>Enice anidakitawaji anodaageni majipaatalo Aneotedogoji lotaga. Igaataga nigina baanaga dibatege ganigidi, dibatacege caticeditace nigijo baanaga dibatege. Pida nigina ane digica, nigijo ane diletibige digidi me nebi, onogaticogi minitaga.”

**Ica loigiwepodi Jesus**  
(*Mateus 12.46-50; Marcos 3.31-35*)

<sup>19</sup>Nagajo eliodo ijaa nioxoadipi Jesus igotibeci midoataga. Pida agoyakadi modipegitalo, leegodi nigidi noiigi-nelegi. <sup>20</sup>Odaa jonigica ica aneo libodigi, meetalo, “Gadiodo, idiaa ganioxoadipi etidi digoida wetice nigina diimigi. Oyemaa metigadotaganegeni.” <sup>21</sup>Pida Jesus ja ninigodi, meeteta, “Eiodo, inioxoadipi, nigina anowajipatalo Aneotedogoji lotaga, anowo ane yemaa Aneotedogoji.”

**Jesus eote me notokoti niwocotaga**  
(*Mateus 8.23-27; Marcos 4.35-41*)

<sup>22</sup>Ica noko Jesus ijaagijo anodiotibece owaxoditinigi aca niwatece, odaa mee Jesus, “Iniga daato nigina weiigi.” Odaa jigigotibeci. <sup>23</sup>Egidaa diiticogi migotibeci, Jesus jona diote. Codaagida jonegenagi ica niwocotaga, odaa jona nolee ninyogodi aca niwatece. Eliodi modiiitege nigica ane doide. <sup>24</sup>Odaa nigijjo anodiotibece Jesus jonogodipegitalo moyojietelogo, moditalo, “Goniigaxinogodi! Goniigaxinogodi! Aiwoko moko ma!” Odaa jona niwodi Jesus. Odaa ja yapetege nigijjo niocodi, ijaagijoa ebekadi, codaa iige me notokotiniwace. Odaa nigijjo niwocotaga, ijaagijoa ebekadi ja notokotiniwace, jona watacoti. <sup>25</sup>Odaa Jesus jegeetediogi nigijjo anodiotibece, “Igaamee ina me dagadadiwagatitawaji?” Pida eliodi moyopo, codaa doitibigiwaji, dinotaganegetiwage modi, “Amiidoa icoa goneleegiwa? Igaataga iige niocodi, ebekadi me notokotiniwace, odaa jigidaagee!”

**Jesus icilatidi ica ane dakatiogi niwicidi abeyacagaga**  
(*Mateus 8.28-34; Marcos 5.1-20*)

<sup>26</sup>Nogotota nipodigi ica noiigi gadareenotedi, daato nigidi weiigi ane dilokotege Galiléia. <sup>27</sup>Naga waxoditedice Jesus nagajo niwatece, odaa jona dakapetege ica goneleegiwa anelatibige nagani nigotaga. Jona jotigide modakatiogi nigicoa niwicidi abeyacagaga. Aonagaleegicoa lowoodi, otegexaagagaleegica ligeladi, pida one lotokagadi midiwataga icoa lawimagajetedi-wetiadi minitaga ica apiigo. <sup>28-29</sup>Igaataga nigica niwigo abeyacegegi elioditibece me dibata. Codaa onidatecibeci nigica oko one oigoetece galeena libaagatedi, logonaka, pida idioka limedi me nakagidi. Codaa nigijjo niwigo abeyacegegi yadeegiticobige miditaga ica nipodigi ane yadilo ane digica nigeladimigipi. Nigijjo naga naditege Jesus, odaa jona dapaawe, odaagenitini logonaka Jesus, odaa mee me dinigetagatee, “Jesus, Lionigi Aneotedogoji ane iige inoatawece! Amiina ica anemaanitici? Jipokotagawa me dagadiloikatiti.” Eo nigida ligegi, leegodi Jesus ja iige me noditicoaci nigijjo niwicidi abeyacagaga.

<sup>30</sup>Odaa Jesus jona ige, oneete, “Igame gaboonaagadi?” Naga igidi, mee, “Iboonaagadi me ee, ‘Noiigi-nelegi’.” Eo nigida ligegi leegodi owidi nigicoa niwicidi abeyacagaga anodakatiogi. <sup>31</sup>Odaa nigicoa niwicidi abeyacagaga



(Lucas 8.27)

eliodi modipokotalo Jesus me daga iigetedicogi midataga libegi ane leegitinece, meote me nawikodeega.

<sup>32</sup>Onini ica lapo-nelegi nigidagiwadi noxicogonaga odipegitege aca wetiga. Odaa nigijoa niwicidi abeyacagaga odipokotalo Jesus me ika modakatiogilo nigijoa nigidagiwadi. Odaa ja ika. <sup>33</sup>Odaa nigijoa niwicidi abeyacagaga jogoika nigijoa goneleegiwa, odaa jogodakatiogilo nigidagiwadi. Odaa nigidiwa nigidagiwadi waleditiniwace ica elagigi, odaa jogodaxaboketinece ica weiigi, jogocegaga.

<sup>34</sup>Nigijoa anoyowie nigijoa nigidagiwadi nonganadi nigida niciagi, odaa jogodeleta nagani nigotaga, codaa me bajeendatedi, oyatemati nigida niciagi. <sup>35</sup>Eliodi oko igotibeci oiwi nigica niciagi. Nogodipegitalo Jesus, odaa jogonadi nigijoa ane icilatidi modakatiogi niwicidi abeyacagaga, odaa eliodi me doitibigiwaji, leegodi nigijoa goneleegiwa ini me nicoti micoataga Jesus logonaka, jonigidoa lowoodi, codaa agaleegicoa nigijoa lowooko yetoledi. <sup>36</sup>Nigica anonadi nigida niciagi, oyatematitigi nigidi noiigi ica anodaagee nogoicilatidi nigijoa goneleegiwa. <sup>37</sup>Odaa iditawece noiigi ane nigeladimigipitigi nipodigi icoa gadareenotedi odipokotalo Jesus me noditedice nipodigi, igaataga one eliodi me doitibigiwaji. Odaa jonogowaxoditacinigi aca niwatece, odaa jogopitacigogi daato weiigi.



<sup>38</sup>Nigijjo Jesus naga nipegi me dawace liwatece, odaa nigijjo goneleegiwa ane icilatidi eliodi me dipokotibigalo migo diotece. Pida Jesus naga ibode, meeteta, <sup>39</sup>“Emii opiliticogi gadigeladi, odaagatematii nigica anigotedagawa Aneotedogoji.” Nigidiaagidi nigijjo goneleegiwa jigigoteloce anitawece nigotaga, yatematitibece nigica anigote Jesus lewiga.

**Jesus icilatidi aca iwaalo, acaagaca nigaanawaana**

*(Mateus 9.18-26; Marcos 5.21-43)*

<sup>40</sup>Nigijjo Jesus nigicotacedicogi daato weiigi, ica noiigi ele modibatege, codaa ninitibigiwaji leegodi ijotawece akaagonibeotibigege. <sup>41</sup>Jonigigo dakapetege Jesus ica goneleegiwa anodita Jairo. Jonigijaa dowediteloco liikanagaxi judeutedi manitaga nagani nigotaga. Naga yamagatedini lokotidi lodoe Jesus, odaa ja dipokotalo migo ligeladi. <sup>42</sup>Leegodi Jairo onajoteci me liona, onaleekeote dooze nicaagape, pida eliodi me deelotika, jona doletibige me yeleo.

Odaa Jesus jigigo, pida nigica noiigi jogodiniligicetelogo. <sup>43</sup>Odaa ja dakapetege aca iwaalo awodina. Jonegeote dooze nicaagape me deelotika, codaa jona yaagadi icoatawece nigicoa ane nepilidi me yedia dotowexedi. Pida agica ane yakadi me icilatidi. <sup>44</sup>Odaa nagajo iwaalo jona nowidila Jesus, odaa dibatigi laxabi nijayogo, odaa jona wakagitege lawodi. <sup>45</sup>Odaa Jesus ja digika, onee, “Amiijo ane dibatiloco?” Pida nigijjo noiigi modi me digica ane dibatelogo. Odaa Pedro meetalo, “Goniigaxinogodi, inatawece nigina noiigi etigadawiileni, codaa metigadiligiceni.” <sup>46</sup>Pida Jesus mee, “Ogoa ijo ica ane dibatiloco, igaataga jeemitetece me noditice yoniciwaga ane godicilatidi.” <sup>47</sup>Nagajo iwaalo naga nadi me dagadiaa yakadi me yagaditi nigijjo loenatagi, odaa jonigigo dawigicetijo, yamagatedini lokotidi lodoe Jesus. Codaa yatemati lodoe ijotawece nigijjo noiigi ane leegodi me dibatelogo Jesus, codaa yatemati nigica me daga leegi odaa ja ici me awodina. <sup>48</sup>Odaa Jesus meeteta, “Iona, ja gadicili leegodi madadiwagati. Emiita opili, mele gadaalegena!”

<sup>49</sup>Egidaageeteda Jesus me dotagatedibece, jonigica ica ane icogoticogi ligeladi Jairo, nigijjo ane dowediteloco niikanagaxi, odaa jegeeta, “Gadiona ja yeleo. Jinagaleeganigiwoci Goniigaxinogodi.” <sup>50</sup>Naga wajipate Jesus nigijjoa lotaga, odaa jegeeteta Jairo, “Jinagadoii! Bigida adinakatoni, odaa jegeletace gadiona.”

<sup>51</sup>Nigicotediwece diimigi, agica ane ikatedio me dakatio, pida ijokijo Pedro, Tiago, ijaa João, ijaagijjo eliododipi nagajo nigaanawaana бага ikatediobece me dakatiobece. <sup>52</sup>Ijotawece nigijjo oko nacaagagateloco, codaa me notaganagateloco leegodi nagajo nigaanawaana. Odaa Jesus meetediogi, “Jinagacaagetibecetiawaji! Nagadi nigaanawaana ayeleo, pida diote.”

<sup>53</sup>Odaa jonogoyame, igaataga oyowoogodi negewi me yeleo nagajo nigaanawaana. <sup>54</sup>Odaa ja imonyatedicoace me noditicoaci, odaa naga dibatedigi libaagadi nagajo nigaanawaana, odaa jegee nigina me dinigetagatee, “Nigaanawaana, anicootini!” <sup>55</sup>Odaa nigica liwigo jonaga dopiteloco, aonigica ica daga leegi jona nicoti. Odaa Jesus ja

diigenatakate mowo liweenigi. <sup>56</sup>Nigijo eliododipi eliodi moyopo. Odaa Jesus ja yajoi me dogoyatematitibece nigida niciagi.

**Jesus iige nigijo dooze anodiotibece moyelogoditedibece nibodicetedi anele**  
(*Mateus 10.5-15; Marcos 6.7-13*)

**9** <sup>1</sup>Jesus eniditidiogi nigijo dooze anodiotibece me dinatocogotee, odaa yajigotediogi ica loniciwaga codaa me nagatetigi moiticoitedice inoatawece ane niwicidi abeyacagaga, codaa moicilatidi eelotaginadi. <sup>2</sup>Odaa ja iigetediogi moyelogodi anodaagee Aneotedogoji me iige laalegenali oko, codaa moicilatidi eelotaginadi. <sup>3</sup>Odaa jegeetediogi, “Jinigica ananibaatinetiwaji maniwiaje. Jinagadeegi gagiilagadi, otegexaagaga gadowoodagaxi, niweenigi, dinyeelo, otegexaagagaeledi ganoecagaxi. <sup>4</sup>Adeoni minitaga diimigi anele modibatagagitiwaji, nigepaa limedi manotitice nagani nigotaga. <sup>5</sup>Odaa nigaca nigotaga anicootatiwaji ane degele modibatagagitiwaji nigeladimigipi, odaa niganotiticitiwaji nagani nigotaga, iticigi lamogo gadogonaka, amaleegaga ikeeni Aneotedogoji me yelatetema nigidi nigeladimigipi.”

<sup>6</sup>Odaa jigigotibeci nigijo anodiotibece odigotece icoatawece nigicoa nigotadawaanaga, oyelogoditedibece nibodicetedi anele, codaa oicilatidi eelotaginadi nigica anodigotece.

**Herodes dogowikomata**  
(*Mateus 14.1-12; Marcos 6.14-29*)

<sup>7</sup>Herodes ane ninionigi-eliodi nigica nipodigi dibodicetalo icoatawece nigicoa Jesus loenataka. Odaa eliodi me dogowikomata, agaleegica бага lowoogo, leegodi onica ica anodi Jesus me João Batista naga yewigatace. <sup>8</sup>Icaeledi modi mone Elias, naga dinikeetaci, odaa icaeledi onodi Jesus minaaagina nigina ane yelogoditedibece Aneotedogoji lowooko, baanaga yeleo anokaanaga yewigatace. <sup>9</sup>Odaa Herodes mee, “Jegemaga jiigenatakata moyakagidi lacilo João. Enice, amiida ica goneleegiwa? Igaataga jibodicetalo nigicoa loenataka.” Odaa Herodes ja doletibige nimawenegegi me nadi Jesus.

**Jesus niodegetedini noiigi-nelegi**  
(*Mateus 14.13-21; Marcos 6.30-44; João 6.1-14*)

<sup>10</sup>Naga dopitijo nigijo liigexedipi, odaa jogoyelogoditalo Jesus icoatawece nigicoa ane loenataka. Odaa ja yadeegi igotibeci manitaga aca nigotakawaana ane liboonagadi Betsaida, ijokijo nigijo anodiotibece me yadeegi. <sup>11</sup>Pida nigijo noiigi nogoyowoogodi ane diitedicogi Jesus, odaa jogoigalatece. Odaa ja dibatetege Jesus, yatematitidiogi anodaagee Aneotedogoji me iige oko laalegenali, codaa icilatidi nigijo ane neelotikanaga.

<sup>12</sup>Nigijo naga gocidi, nigijo dooze anodiotibece Jesus jigigotibeci midoataga, odaa moditalo, “Jegele me iigeni mopitibeci nigina noiigi, amaleegaga igotibeci minoataga niginoa nigotadawaanaga, bajeendatedi, odoletibige nigica aniwote,

codaa amaleegaga oyakadi anoyeligo. Igaataga nigina anejonaga yadilo, agica nigeladimigipi.” <sup>13</sup>Pida Jesus naga igidi, meetediogi, “Akamagakaamitiwaji, ajicitioigi ane yeligo!” Odaa modi, “Agicoda goweenigi, idiwa mina ciinco paontedi, idiaagidioda itiwataale nogojedi. Ajakataga daga jajicagatiogi anoyeligo, ajibogotege me jinooteegatibige niweenigi.” <sup>14</sup>Owo nigida ligegi, leegodi jona domaga iwida ciinco miili goneleegiwadi (we nigaanigipawaanigi codaa me iwaalepodi). Odaa Jesus oneetediogi nigijo anodiotibece, “Iigeni me nicotiniwace nigidi noiigi, mowo lapotibece meya-taaliatibece oko.”

<sup>15</sup>Nigijo anodiotibece jigidaagee, jogoiige nigijo noiigi me nicotiniwace. <sup>16</sup>Odaa Jesus ja dibate nigijoa ciinco paontedi ijaagijoa itiwataale nogojedi. Naga iwitedibigimece ditibigimedi, odaa ja diniotagodete Aneotedogoji leegodi niweenigi. Nigidiaagidi ja ninoketadini nigijoa paontedi, ijaagijoa nogojedi. Odaa ja yajigotediogi nigijo anodiotibece monediatiniwace nigidi noiigi. <sup>17</sup>Ijotawece niodaga, codaa nitiminaga. Odaa nigijo anodiotibece jogoyetigilo dooze etacanitedi nigicoa liwailidi ane iigotedice.

**Pedro yelogodi anijoa Jesus**  
(*Mateus 16.13-19; Marcos 8.27-29*)

<sup>18</sup>Ica noko one oniniwatece Jesus, yotaganeege Aneotedogoji. Odaa jonogototalo nigijo anodiotibece. Odaa jonaga nigetediniwace, meetediogi, “Amiijo anodi me Ee, ina noiigi?” <sup>19</sup>Odaa jogoigidi, moditalo, “Initecibece oko modi makaami João Batista. Pida ina eledi modi makaami Elias. Codaa ina eledi modi makaami anigepidigica nigijo anoyelogoditedibece Aneotedogoji lowooko jotigide, anokaanaga yewigatace.” <sup>20</sup>Odaa ja nigetediniwace, meetediogi, “Bigida makaamitiwaji, ame Ee me enitiwaji?” Odaa Pedro ja igidi, meetalo, “Oko бага jowoogotaga nagakamagakaami ane niige Aneotedogoji me godewikatidi.”

**Jesus eetetece lemegegi, codaa yalagate me yewigatace**  
(*Mateus 16.20-28; Marcos 8.30-9.1*)

<sup>21</sup>Odaa Jesus ja yajoi me dogoyatematitibece niginiaaginiwa Nigicoa ane niige Aneotedogoji. <sup>22</sup>Odaa meetediogi, “Ee, Goneleegiwa ane jicogotibigimece ditibigimedi, leeditibige meliodi me jawikode. Odibatigi, nigina anoiige godoiigi, codaa me nigidi anoiige sacerdotitedi, idiaagidi nigidi anodiigaxinagatece lajoinaganegeco Moisés. Codaa etideloadi, pida nigicotalo itoatadigida nokododi, odaa ja idewigatace.”

<sup>23</sup>Odaa Jesus jegeetediogi ijotawece, “Nigica ane yemaa me niotici, leeditibige me daga doletibige nigica anepaa yemaa, codaa leeditibige me igotema me dawikode codaa me yeleo, inoatawece nokododi. Odaa ja yakadi me niotici. <sup>24</sup>Igaataga nigina ane yemaa lakataga nigina oko digoina iigo, yeleo nigidiaagidi. Pida nigina ane yeleo Ee leegodi, bigicota noko me yewigatace. <sup>25</sup>Codaa nigina oko daga dinigaanyetece niginoa aninoa digoina iigo, nige yeleo, Aneotedogoji iloikatidi, codaa agaleegica niwaló, jaganiatagigi. <sup>26</sup>Igaataga nigina oko nige

dinibolikatiditici, codaa me yotaga, odaa Ee, Goneleegiwa ane jicogotibigimece ditibigimedi, aagaga idinibolikatiditece nige janagi inadeegi yoniciwaga, codaa nige jatale iciagi miniwataga Eiodi me datale, codaa iciaco me datale aanjotedi ane idioka limedi modibatema. <sup>27</sup>Ejitagawatiwaji mewi mina oko digoina anaga nigo, nigonadi Aneotedogoji nige iige laalegenali oko.”

### Jesus dakapetetege Moisés ijaa Elias

*(Mateus 17.1-13; Marcos 9.2-8)*

<sup>28</sup>Nigidiaagidi ejinaga ixomagatedice oito nokododi me yelogodi Jesus nigijoa lotaga, odaa ja yadeegi me lixigagawepodi Pedro, João, ijaa Tiago. Odaa ja dalagatededibigimece aca wetiga ane leegitibigimece, igo me yotaganege Aneotedogoji. <sup>29</sup>Egidaa diitigi me yotaganege Aneotedogoji jona diniigi anodaagee latobi, lowoodi jonagaga yapacaga, codaa me datale. <sup>30</sup>Codaagida icoa itoa goneleegiwadi naga dinikeetibigiwaji, odaa jogoyotaganege Jesus. Nigidoa itoa goneleegiwadi one Moisés, ijaa Elias. <sup>31</sup>Nigidoa itoa aagaga dataletibigiwaji. Odaa jogoyotaganegatibigo Jesus, oyalagata ica lemegegi ane nibikota Aneotedogoji micota digoida Jerusalém. <sup>32</sup>Pedro ijaagijoa nigijoa lokaagetedi jonaga nibaciga, odaa ja niotaga. Pida naga niwoditibigiwaji, odaa jigonadi Jesus me datale, ijaagijoa itoataale goneleegiwadi midoataga. <sup>33</sup>Nigijoa



*(Lucas 9.30)*

naga nipegi mopitibeci nigidiwa itoataale goneleegiwadi, Pedro meetalo Jesus, “Goniigaxinogodi, nigica mele minaagejonaga! Jaogate iniwatadigini gadopeteciititiwaji, oniniteci ganebi, ini eledi Moisés, iniaageledi Elias.” Eo nigida ligege, pida ayowoogodi nigica ane diitigi.

<sup>34</sup>Pedro egidaagee me dotaga, naga dinikatiogi ica lolaadi, odaa ja yapogoditiniwace. Nigijo anodiotibece Jesus dootibigiwaji nigijo naga nowicetiogi nigijo lolaadi. <sup>35</sup>Odaa jogowajipata ica ane dotaga catiwedi nigijo lolaadi, onee, “Nigidoa, jigidaagidoa Ionigi aneliodi me jema. Ajipaata ane ligege!”

<sup>36</sup>Nigijo naga nigotini ica ane dotaga, nigijo anodiotibece Jesus jogonadi mokaanigidoatece. Odaa ja notokotiniwace, odaa nigijoa nokododi agica anoyelogodi nigijo anonadi.

### **Jesus icilatidi nigaanigawaanigi ane dakatiogi niwigo abeyacegegi**

*(Mateus 17.14-21; Marcos 9.14-29)*

<sup>37</sup>Negeledi noko ja daxoditiniwace me ideidi itibigimedi wetiga. Odaa ica noiigi-nelegi jigigotibeci odakapetege Jesus. <sup>38</sup>Odaa onica ica goneleegiwa ane ideidi liwigotigi nigidi noiigi, onee me dinigetagatee, “Goniigaxinogodi, jipokotagawa managi icilatiti ionigi, igaataga onididateci me ionigi. <sup>39</sup>Niwigo abeyacegegi ane dakatiogi, nigina me dibata, odaa eo me codaagidata naga dapaawe, dinawigice nigica niwigo, natiomagaditigi nioladi nigidi nigaanigi. Nigica niwigo abeyacegegi idioka limedi me yawigice, ayemaa me noditice. <sup>40</sup>Ja domaga jipokotiogi nigidi anodiotibigagadici moiticoitice niwigo abeyacegegi, pida agoyakadi moiticoitice.”

<sup>41</sup>Jesus naga dotaga, mee, “Akaami oko ane daga adinakatonitiwaji, akaami abeyacagaga. Agaleegowidi nokododi minaagejo makaamitagatiwaji. Amigida ica noko nige dagadiaa jakadi me idinatitagawatiwaji?” Odaa jonegeete nigijo goneleegiwa, “Anadeegi gadionigi digoina meetaga!” <sup>42</sup>Nigica naga yadeegi nigijo nigaanigawaanigi, niwigo abeyacegegi jona yokoletinigi iigo, codaa me yawigice. Pida Jesus ja iige me noditice nigijo niwigo abeyacegegi, odaa ja icilatidi nigijo nigaanigawaanigi. Odaa ja yopilagadite nigijo eliodi. <sup>43</sup>Ijotawece nigijo oko eliodi moyopo, leegodi me nelegi nigica notoetiigi Aneotedogoji.

### **Jesus yalagatace ica lemegegi**

*(Mateus 17.22-23; Marcos 9.30-32)*

Egidaagee modoxicetema nigijoa loenataka Jesus, negeetediogi nigijo anodiotibece, <sup>44</sup>“Digatacolitece yotagatagawatiwaji. Ee, Goneleegiwa ane jicogotibigimece ditibigimedi, etidajigota loniciwaga goneleegiwadi.” <sup>45</sup>Pida nigijo anodiotibece agoyowoogoditece nigijoa lotaga, leegodi Aneotedogoji anegeote moyowoogodi. Odaa joanigidaa leegodi me dogoyowoogodi nigica ane diitigi nigijoa Jesus lotaga. Pida odoitalo dogoigetece nigica ane diitigilo nigijoa lotaga.

**Nigica ane dagaxa me diniwaloe**  
(*Mateus 18.1-5; Marcos 9.33-37*)

<sup>46</sup>Nigijo anodiotibece Jesus jonogodinotigimadetigi nigica ane dagaxa me diniwaloe. <sup>47</sup>Pida Jesus yowoogodi nigica anoyowo catiwedi laalegenali. Odaa jona dibate ica nigaanigawaanigi. Naga nicoogete liwai, <sup>48</sup>Odaa jegeetediogi, “Nigina ane dibatege nigini nigaanigawaanigi, leegodi nagatetigi Iboonagadi, nigini dibatigi. Odaa nigini ane dibatigi, aagaga dibatege ane idiige. Igaataga nigina ane dagaxa me iwikodaga gadiwigotigitiwaji, joaniginiaa dagaxa mida niwaló.”

**Nigica ane daga godakapetegi, godicaajo**  
(*Marcos 9.38-40*)

<sup>49</sup>Odaa João oneetalo, “Goniigaxinogodi, jinataga ijo goneleegiwa ane iticoitedice niwicidi abeyacagaga datika Gaboonagadi. Odaa ja joxokojogo me iticoitedice niwicidi abeyacagaga, igaataga adiotibigadici digo anejinaga me jiwagatagadici.” <sup>50</sup>Pida Jesus meeteta, “Igaamee ina moxoki? Igaataga nigina ane daga godakapetegi, godicaajo.”

**Samaritaanotedi agodibatege Jesus**

<sup>51</sup>Naga nipegi nigica noko Jesus mopitedibigimece ditibigimedi, odaa ja lowoogo mewi migo Jerusalém. <sup>52</sup>Jonegeote lienigipi migotibeci odoe. Odaa nigigotibeci jogodakatiwece aca nigotakawaana samaritaanotedi, domogodoletibige ane lotokagadi Jesus. <sup>53</sup>Pida nigijo nigeladimigipi agodibatege Jesus, leegodi moyowoogodi me lowoogo migo Jerusalém. <sup>54</sup>Nigijo anodiotibece Jesus, Tiago ijaa João nagonadi me dogodibatege, odaa modi, “Goniotagodi, emaan me jiigenaga me dinikatini noledi icogotibigimece ditibigimedi me yaagadi nigidi noiigi, anee Elias nigijo jotigide?”

<sup>55</sup>Pida Jesus naga nawiilitetege, odaa ja napetegetediniwace, meetediogi, “Nigida makaamitiwaji agowoogodi anodaageni. <sup>56</sup>Igaataga Ee, Goneleegiwa ane jicogotibigimece ditibigimedi, ajanagi me jaagadi oko, pida janagi me jao lewiga.” Odaa jonigotibeci manitaga acaeledi nigotakawaana.

**Ica oko onodi moyemaa modiotibece Jesus**  
(*Mateus 8.18-22*)

<sup>57</sup>Nigijo Jesus naga ideite naigitinece ijaagijo anodiotibece, ica goneleegiwa oneetalo Jesus, “Iniotagodi, jema me jiotagadici okanicodaagica anemaani me aaticogi.” <sup>58</sup>Odaa Jesus jegeeteta, “Nagana eti ida epaa libegi, codaa me ilaagaxodi ani epaa libato. Pida Ee, Goneleegiwa ane jicogotibigimece ditibigimedi, baadigicanejo me inipetini.”

<sup>59</sup>Odaa Jesus oneete icaeledi goneleegiwa, “Anagi aniwitibici!” Pida onee, “Iniotagodi, ecogotace ejigo igeladi, inaligitini eioidi.” <sup>60</sup>Odaa Jesus jegeete,

“Ikani nigina ane liciagi émegegi me naligitini némegegi. Pida akaami baanaga akamaga emii, elogoti anodaagee Aneotedogoji me iige oko laalegenali.”

<sup>61</sup>Odaa ica eledi goneleegiwa oneetalo Jesus, “Iniotagodi, ee ejigo jiotagadici, pida ecogotace ejigo jibodenaga digoida igeladi.” <sup>62</sup>Pida Jesus naga igidi meeteta, “Nigina ane gela me yaboogodi iigo, odaa niwiticogi lowidi, Aneotedogoji ayakadi daga yajigote me libakedi me yelogoditibece anodaagee me iige laalegenali oko.”

### Jesus imonya seteenta goneleegiwadi moyelogodi nibodicetedi anele

**10** <sup>1</sup>Nigidiaagidi Goniotagodi Jesus naga igiditiediogi nigijoa goneleegiwadi anodi moyemaa modiotibece, odaa ja iomagaditedice eletidi seteenta goneleegiwadi. Odaa ja imonya itoataaletibece migotibeci dinewadetibigiwaji, midiwataga nigotadi, codaa me midiwataga icoa nigotadawaanaga ane lowoogo Jesus migotetece. <sup>2</sup>Odaa meetediogi, “Eliodi oko anonibeotege mowajipatalo nibodicetedi anele, micataga nigina nixogotagi nelegi baanaga limedi monopilagaditedio nawodigijedi, pida ageliodi ane nibaaga. Joanigidaa leegodi ipokitalo Aneotedogoji me niwakatee eletidi liotaka. Micataga nigina ane nebi nixogotagi me iige niginoa eletidi liotaka me naxawanatakanaga monopilagaditedio lawodigijedi. <sup>3</sup>Emiitiwaji! Gadiigeni micoataga niginoa waxacocoli miditaga noiigi ane liciagi diwilecogoni. <sup>4</sup>Jinagadeegi ganinyeelagaxi, otegexaagaga ganiboco ane nolee niweenigi, migetaga eletidi gawelatedi. Codaa jinigica ananicenitiwaji oko gadakapetegitinece naigi.

<sup>5</sup>Nigakaatiwece diimigi, odoejegi ane alitigi gagegi, eni, ‘Jemaanaga Aneotedogoji meote mele gadaalegenali akaamitawecetiwaji ane gadigeladi nigina diimigi.’ <sup>6</sup>Nigica oko anoyemaa Aneotedogoji meote mele laalegena, odaa Aneotedogoji ibinie ane gadipoketegi. Pida nige digica ane yemaa Aneotedogoji meote mele laalegena, odaa Aneotedogoji aibinie nigica nigeladimigipi, ane domaga gadipoketegiteloco. <sup>7</sup>Idiaagonitetiwaji minitaga nigini diimigi, odaa elici anoyajigotagawatiwaji. Igaataga igenaga nigina nibakecajo me dibatege nigaanyegegi.

<sup>8</sup>Codaa nigina nigakaatiwecetiwaji nigotaga, odaa nigele modibatagagi, elici nigica anoyajigotagawa. <sup>9</sup>Icilatititiwaji eelotaginaditigi nagani nigotaga, codaa enitiogi nigidi nigeladimigipitigi nagani nigotaga, ‘Aneotedogoji ja igo me iige laalegenali noiigitigi nagana nigotaga’. <sup>10</sup>Pida nigakaatiwece nigotaga ane degele modibatagagi, emiitelogo ladicotiidi, odaa enitiwaji, <sup>11</sup>‘Nigina amogotigi nagana nigotaga ane yexogotece godogonaka, jiticogojogo amaleegaga jikeenagatagawatiwaji me yelatedagadomi Aneotedogoji. Domaga jemaanaga mowoogotitiwaji naga igo Aneotedogoji me iige gadaalegenalitiwaji, pida agemaanitiwaji.’” Odaa Jesus meetediogi nigijoa seteenta liigexedi, <sup>12</sup>“Ejitagawatiwaji, Aneotedogoji dagaxa meote me nawikodeega nigijo nigeladimigipitigi nagani nigotaga ane degele modibatagagi, caticedi nigijo oko nigeladimigipitigi nigotaga Sodoma, ane yaagadi Aneotedogoji nigijo jotigide.

Eliodi me nawikodeega nigidi oko ane degele modibatagagi nigica noko nige limedi me iloikatidi Aneotedogoji nigina noiigi leegodi libeyacegeco.”

### **Icoa nigotadi anei me dogoyiwagaditeda Jesus**

*(Mateus 11.20-24)*

<sup>13</sup>Jesus idokee me niigaxitediniwace nigidi oko, odaa meetediogi, “Akaamitiwaji ane gadigeladi Corazim, icota meliodi mawikodeetiawaji. Codaa akaamitiwaji ane gadigeladi Betsaida aagaga icota meliodi mawikodeetiawaji, leegodi me daga adadiwagati. Igaataga nigijoa godoxicegetedi aneote Aneotedogoji mani ganigotagatiwaji, degeote mijoataga nigotadi Tiro aniaa Sidom, noiigitigi nigijoa nigotadi togoika mowo ane beyagi nigijoa jotigide. Taqa nicotiniwace, odinixotinigilo lowoodi jaacogoli, codaa togoyatita lojienigi lacilodi, moikee modinilaatece libeyacegeco. <sup>14</sup>Pida nigica noko nige iloikatidi Aneotedogoji nigina oko leegodi libeyacegeco, gadiloikatitititewaji caticedi nigidi nigeladimigipitigi Tiro aniaa Sidom. <sup>15</sup>Odaa akaami noiigitigi Cafarnaum, domige gadiwenigideni Aneotedogoji digoida ditibigimedi? Otegeaagaga onateciginini! Pida бага gadokolenitediogi minitaga noledi ane daga ipe, mawikodeetiawaji.”

<sup>16</sup>Odaa Jesus jegeetediogi nigijoa anodiotibece, “Nigina ane wajipatagawatiwaji, aagaga najipatiwa. Codaa nigina ane daga dibatagagitiwaji, Ee idaagigotiwa. Odaa nigina ane daga dibatigi, adibatege Aneotedogoji ane idiige.”

### **Nigijoa seteenta liigexedi Jesus ja dopitijo**

<sup>17</sup>Nigijoa seteenta liigexedi naga dopitijo, odaa eliodi me ninitibigiwaji. Odaa moditalo Jesus, “Goniotagodi, codaa me niginoa niwicidi abeyacagaga etigodadiwagadi nigina me jiticodagaticoace, jibakenaga Gaboonagadi me jiticodagaticoace modakatiogi oko.”

<sup>18</sup>Pida Jesus naga igidi, meetediogi, “Jinadi godaxakawa Satanás yediiga menitini icogotibigimece ditibigimedi, micataga nigina nalebepaga ane yediiga. <sup>19</sup>Diganajipaatiwawaji! Ja jajigotagawa ganimawenegegi me ipoditeloco lakeedi, codaa me nelá. (Odaa agica anigotagawa.) Codaa agekeni icatawece nigica domaga loniciwaga godaxakawa, odaa agica anigotagawatiwaji nigina ane beyagi. <sup>20</sup>Pida jinaga aniniitibecitiwaji leegodi metigadadiwagati niwicidi abeyacagaga. Pida jemaanininiitibeci leegodi naga iditedini Aneotedogoji gaboonagatedi digoida ditibigimedi madi lotaganagaxi aneite liboonagatedi loiigi.”

### **Jesus ninitedibece**

*(Mateus 11.25-27; 13.16-17)*

<sup>21</sup>Nagajo lakata Liwigo Aneotedogoji eo nigica meliodi me ninitedibece Jesus. Odaa mee, “Eiodi, jagakamagakaami ane iigeni ditibigimedi, codaa me iigo, jogetetibigimagadici, leegodi jigikeenitigi nigina oko iwikodadi nigica anagatitema nigina oko aninoa lixaketedi, codaa me



nigina aneliodi me nidikonaga. Joanigidaa anakamaga emaani mawii, odaa ica mele. Joanigidaa leegodi me iniotagodetagawa.”

<sup>22</sup>Odaa Jesus meetediogi nigijo oko anidi miniwataga, “Eiodi najigotediwa inoatawece. Agica ane yowoogodi Aneotedogoji Lionigi, inikiniwatada Eliodi. Agica ane yowoogodi nigicoa Eliodi, iniokinoiwateda Lionigi me yowoogodi, codaa nigina ane yemaa Lionigi me ikeete anodaageeteda Eliodi.”

<sup>23</sup>Odaa Jesus ja nawiilitetetege nigijo anodiotibece. Odaa meetediogi nigica midiokiditiwage, “Ninitibigiwaji nigina oko anonadi niginoa ananatitiwaji! <sup>24</sup>Igaataga ejitagawatiwaji, nigijo jotigide eliodi nigijo anoyelogoditedibece Aneotedogoji lowooko, codaa owidi inionaga-eloodoli nigijo jotigide, domogoyemaa monadi nigina analeeganatitewaji, pida agonadi. Codaa domogoyemaa mowajipatalo niginoa analeegajipaatalo, pida agica dogowajipatalo.”

### Ica samaritaano anele

<sup>25</sup>Digawinitiawaji! Ica niigaxinaganaga lajoinaganegeco Moisés, nigini dabiditi, odaa igeteda Jesus mina dineetalo, mee, “Goniigaxinogodi, amiina ane leeditibige me jao, odaa ja jakadi midioka limedi me idewiga miniwataga Aneotedogoji?” <sup>26</sup>Jesus naga igidi, meeteta, “Amiidi ica ane diniditeloce midiwa lajoinaganegeco Moisés? Amiidi ica baanaga alomegeniteloce?”

<sup>27</sup>Odaa mee nigijo goneleegiwa, me igidi, “Emaani Ganiotagodi Aneotedogoji manitawece gadaalegena, codaa minoatawece nigicoa ane eemiteetece, codaa minitawece gadoniciwaga, codaa minoatawece gadowooko. Codaa leeditibige memaani gadipecegawa digo aneni madinemaani.” <sup>28</sup>Odaa Jesus meete, “Jagadigititece nigina anewi. Awii nigida anenita, odaa idioka limedi me gadewiki miniwataga Aneotedogoji.”

<sup>29</sup>Pida nigijo goneleegiwa domaga dinikeenaganegce me igenaga. Odaa ja digikataci, mee, “Pida, amiijo ica ipecegawa?”

<sup>30</sup>Jesus naga igidi, meete, “Ica goneleegiwa one dinikatini manitaga nigotaga Jerusalém, one igo Jericó. Naigitinece jona dakapetege icoa olicagaga, odaa jonogonoga lowoodi, codaa eliodi monalaketibige, pida nogoika, jona doletibige me yeleo, odaa jogopitibeci. <sup>31</sup>Pida ganigepidigica nigijoo sacerdotitedi ane libakadi Aneotedogoji ligeladi, jonagaga dinikatini mijotaga nigijo naigi. Odaa naga nadi nigijo goneleegiwa, odaa ja nawiile, inigotinece eledi liwai nigijo naigi. <sup>32</sup>Ica leviita eledi jonagaga inaagigotinece. Naga nadi nigijo goneleegiwa, odaa onexaa iwiteloco, odaa jagaga ixomagatijo. <sup>33</sup>Pida ica samaritaano onagaga diniwajaje, odaa nigicoteloco. Naga nadi nigijo goneleegiwa eliodi me iwikode. <sup>34</sup>Odaa jona diiteloco nigipegi, odaa jegeo liwetadi, one yatita najidi inaa viinyo nigicoa elaciletedi. Nigidiaagidi ja yexagateloco nigijo goneleegiwa nemadica, odaa jona yadeegiticogi manitaga aca godiotagaxi, odaa jigidiaagi me dowediteloco. <sup>35</sup>Negeledi noko jona yajigota nigijo ane nebi nagaca



(Lucas 10.33-34)

godiotagaxi iniwataale beexotedi ane lojedi modowediteloco. Odaa meeta, ‘Adowetiteloco, codaa nigicoa eletidi laakataka, nige idopitijo, odaa jediateda.’”

<sup>36</sup>Odaa Jesus jegeeteta nigijo goneleegiwa ane ige, “Amiida ica anakati? Amepidigica idi itoatadigida anewi me lipecagawa nigijo anonaxacogotibige?” <sup>37</sup>Odaa nigijo ane diigaxinagatece lajoinagananegeco Moisés ja igidi Jesus, mee, “Nigijo anenegegi iwikode nigijo goneleegiwa, codaa me yaxawa.” Odaa Jesus jegeete, “Dice awii liciagi.”

### Jesus dalite Marta ajaa Maria

<sup>38</sup>Jesus ijaagijo nigijo anodiotibece odioteci naigi, odaa jogotota manitaga aca nigotakawaana. Odaa aca iwaalo anodita Marta ja nodetedicogi Jesus minitaga ligeladi. <sup>39</sup>Aca nioxoa anodita Maria, odaa jona dilokotege Goniotagodi Jesus, odaa ja wajipatalo nigicoa liigaxinagananegeco. <sup>40</sup>Pida Marta baga yajolitagatologo nigicoa libaketedi mini ligeladi. Odaa nigigo miniwataga Jesus, odaa oneetalo, “Iniwa-aagodi, agodagana-aati, nagani ininyooxa naga idika moka eeyotece me jaote digawi-iinitologo iba-aaketedi? Iigeni menagi idaxawanawaanigi!”

<sup>41</sup>Pida Goniotagodi ja igidi meeteta, “Nigida makaami gadajolitakitibece, codaa me agowikomataatibece, leegodi niginoa

anicinoa. <sup>42</sup>Pida leeditibige mokidatece nigica gadoenatagi, odaa Maria baanaga iomagaditice nigica ane dagaxa mele, codaa agica ane ibanootece.”

**Jesus diigaxinagatetece ica anodaagee me jotaganegenaga Aneotedogoji**  
(*Mateus 6.9-15; 7.7-11*)

**11** <sup>1</sup>Ica noko Jesus ganigidi ica aneite me yotaganege Aneotedogoji. Odaa naga nigotedini me yotaganege Aneotedogoji, ganigepidigica nigijo anodiotibece dipokotalo Jesus, mee, “Goniotagodi, godiigaxinegegi me jotaganegenaga Aneotedogoji, digo anee João Batista me iigaxitioigi anodiotibeci.”

<sup>2</sup>Odaa meetediogi, “Nigina motaganegeni Aneotedogoji, enitiwaji, ‘Godiodi anadeoni ditibigimedi, jemaanaga minatawece oko odogeteta Gaboonagadi. Jemaanaga me iigeni laalegenali inatawece oko. Awii nigica anemaani mawii digoina iigo, liciagi mowo anemaani digoida ditibigimedi.

<sup>3</sup>Anajicitoḡowa ḡoweenigi ane jopoḡatibige inoatawece nokododi.

<sup>4</sup>Ixomagateenitedice ḡobeyaceḡeco, igaataga nigida moko jixomagateenagatice nigina anowotoḡodomi ane beyagi. Codaa jinigikani daga dineetḡowa ḡodaxakawa. Pida ḡodogaagegiticogi miditaga loniciwaga nibeyacaga.”

<sup>5</sup>Odaa Jesus meetediogi, “Digica nigina akaamitiwaji anigo ligeladi lokaagedi nigina me liwigo-enoale me doletibige ladiligi, oditaga eeta, ‘Yokaagedi, awiitate yadilaga itiwatadigidi paantedi. <sup>6</sup>Igaataga ini yokaagedi gela meno me diniwija, pida agica anigetigidi ane jajigota me yeligo.’ <sup>7</sup>Pida idei catiwedi ligeladi me igidi, onee, ‘Jinagawii igecagalogo! Ja jinoxoco yapoagi, codaa ionigipi ja niotaga, aḡalee jakadi daga idicoti oditaga jajigotedagawa paantedi.’ <sup>8</sup>Odaa ejitagawatiwaji anicotini daga leegodi me lokaagedi, pida jajigota ane dipokotibige, leegodi jegeo ligecagalogo me daga yakamagadi.

<sup>9</sup>Joanigidaa leegodi mejitagawatiwaji, ipokitalo Aneotedogoji, odaa jagabaatege ane gadipoketegi. Oleetibige Aneotedogoji nigina midi ananiaditibige makaamitagatiwaji, odaa akatitiwaji. Atokeni epoagi, odaa domoketagadomi. <sup>10</sup>Jigidaagee inatawece nigina anodipokotalo Aneotedogoji, yajigotediogi anodipokotibige, codaa inatawece nigina anodoletibige, oyakadi. Codaa epoagi domoketema nigina ane yatoke.

<sup>11</sup>Domigica ina akaamitiwaji anakaami eniododipi ane yajigota lionigi lakeedi, ina me dipokotigi nogojeḡi? <sup>12</sup>Oḡoa, domige ajicita nelá ina me dipokotigi okogokoodi ligetegi? <sup>13</sup>Odaa nigida makaamitiwaji, anakaami abeyacagaga, owoḡoti majici gadionigi anele. Odaa Gadiodi ane itiniwa digoida ditibigimedi dagaxatace me yajigotediogi Liwigo nigina anodipokotalo!”

**Onica ica anodi mini niwigo ane beyagi midoataga Jesus**  
(*Mateus 12.22-30; Marcos 3.20-27*)

<sup>14</sup>Jesus one iticoitedice ica niwigo abeyacegegi ane dakatiogi ica goneleegiwa, aneo mewalogonaga. Nigijo naga noditice nigijo niwigo abeyacegegi, odaa nigijo goneleegiwa jonaga yakaditace me dotaga. Odaa nigidi noiigi eliodi moyopo. <sup>15</sup>Pida onidi ica oko anodi, “Naganati! Belzebu ane iige niwicidi abeyacagaga eo notoetiigi nigidoa goneleegiwa me iticoitedice niwicidi ane beyagi. (Belzebu aneledi liboonagadi Satanás).”

<sup>16</sup>Odaa ica eledi oko odineetalo odipokotalo meote loenatagi anodoxicetema, me ikee me icogoticogi nimawenegegi miniwataga Aneotedogoji. <sup>17</sup>Pida Jesus yowoogodi lowooko, odaa meetediogi, “Nigijo noiigi anowotibece lapoawaanigi me dakapetibigiwage, nigidi noiigi icota me ma. Codaa nigina dinoiigiwepodi ane daga ilagatiwage aagaga icota me ma. <sup>18</sup>Codaa nigijo ane iige Satanás, nige diniomagadi me dinidelege, baadaga yeyagaticoace. Igaamee ina meni me Belzebu najigotiwa inotoetiigi me jiticoitedice niwicidi abeyacagaga? <sup>19</sup>Pida daantigidaagee, amiijo ane yajigotiogi notoetiigi nigijo anodiotibigagadici moiticoitedice niwicidi abeyacagaga? Joanigidaa leegodi nigijo anodiotibigagadici ijaagoikeetagawa meliodi mabataa. <sup>20</sup>Pida jatika loniciwaga Aneotedogoji me jiticoitedice niwicidi abeyacagaga. Odaa nigida ikee naga diigenataka Aneotedogoji digoina gadiwigotigitiwaji.

<sup>21</sup>Nigina goneleegiwa loniciwengenigi anele manigoe, dowediteloco epaa ligeladi, codaa icoatawece nigicoa ane nepilidi dotete. <sup>22</sup>Pida nigicota nigina ane dagaxa me loniciwengenigi, odaa ja dinigaanyetece nigijo loniciwengenigi, odaa ja yadeegi icoatawece nigicoa likanaganagatedi, nigijoa ane nakato nigijo goneleegiwa loniciwengenigi. Odaa ja yawalace nigicoa latekatece nigijo loniciwengenigi.

<sup>23</sup>Nigina ane daga icaajo, dice yakapetegi, codaa nigina ane daga idaxawatece me jatecogotee iniwaxacocoli anilaagitedibece, odaa ja miniaa ilaagagaditedibece.

**Anodaagee niwigo abeyacegegi mopitacicogi ane icogoticogi**  
(*Mateus 12.43-45*)

<sup>24</sup>Nigina niwigo abeyacegegi naga noditicogi oko, onigotelogo nipodaga ane yadilo, ane digica nigeladimigipi, doletibige ane lotokagadi. Nigina naga digica yakadi, odaa meetibige le, ‘Jopitacicogi igeladi ane idoditicogi.’ <sup>25</sup>Odaa jogopitaceloco nigijo oko, anakaagijo me dakatiogi, odaa yakadi me micataga nigina diimigi ane dinoladitice, codaa anoyoetibigo. <sup>26</sup>Odaa ja noditice, odaa igotiogi eletidi seete niwicidi abeyacagaga, nigidiwa dagaxa me beyagi caticedi nigijo odoejegi. Nogodakatiogi nigini goneleegiwa, odaa jigidiaagiticoace. Odaa nigica anee nigijo goneleegiwa ja dagaxa me beyagi caticedi nigijo anee maleekoka dakatiogi nigijo niwigo abeyacegegi.”

### Nigica anepewi me ninitibece

<sup>27</sup>Egidaageeteda me dotaga Jesus, aca iwaalo ane idei liwigotigi nigidi noiigi mee, nigina me dinigetagatee me yotaganeege Jesus, “Ninitibece nagaca iwaalo ane dinigajetagadici, codaa ane gadilipegeni!” <sup>28</sup>Pida Jesus naga igidi, meete, “Dagaxa me ninitibigiwaji nigijo anowajipatalo Aneotedogoji lotaga, codaa moyiwagadi.”

### Odipokotalo Jesus meote loenataka godoxicegetedi me ikee anijoa (Mateus 12.38-42; 16.1-4)

<sup>29</sup>Nigijo noiigi naga diniligice, moyawiile Jesus, odaa jona dotaga onee, “Nigina noiigi niginoa nokododi dagaxa me abeyacagaga. Odipokotalo Aneotedogoji meote godoxicegedi me ikee me niginiaa idiige. Pida Aneotedogoji ageote eledi loenatagi, igaataga jegeote nigijo anigote Jonas nigijo jotigide, nigijo ane yelogoditedibece Aneotedogoji lowooko. <sup>30</sup>Igaataga Jonas ikeetiogi nigeladimigipitigi Nínive miniaaginiwa Aneotedogoji iige migo nagani nigotaga, odaa jogoyowoogodi nigicoa ane ninyaco Jonas. Jigidaageji Ee, Goneleegiwa ane jigogotibigimece ditibigimedi, idinikeetiogi nigina noiigi me idiige Aneotedogoji. <sup>31</sup>Nagajo iniona-eloodo ane icogoticogi micataga niocodi niwetaga, icogoticogi ditigedi enagi me wajipatalo lotaga Salomão, nigijo aninoa owidi lixaketedi. Odaa nigica noko nige limedi Aneotedogoji me iloikatidi oko leegotedi libeyacegeco, ajaagajo nagajo iwaalo dabiditini, ikee me abataatiwaji, igaataga ite Ee gadiwigotigitiwaji ane dagaxa me inoa ixaketedi catedi Salomão. Pida agemaani mabaategetiwaji inoa yotaga, otegeaagaga adinilaanitibece. <sup>32</sup>Nigijo nogowajipatalo Jonas lotaga nigijo nigeladimigipitigi Nínive, odaa jogodinilaatece libeyacegeco. Odaa nigica noko nige limedi Aneotedogoji me iloikatidi oko leegotedi libeyacegeco, odaa nigeladimigipitigi Nínive dabiditiniwace, oijke makaami nilaagetedipi, igaataga ite Ee gadiwigotigitiwaji, codaa yotaga dagaxa me gonegaga aliciaco lotaga Jonas. Pida akaamitiwaji agabaatege inoa yotaga, codaa agadinilaanitibecetiwaji.

### Nigica ane nalo catiwedi godaalegena (Mateus 5.15; 6.22-23)

<sup>33</sup>Agica ini oko ane yalegi loledagaxi oditaga yapogoditini, domigetaga yapogoditeloce baxia. Pida ideyate loledagaxi ditibigimedi, eotibige minatawece oko anodakatiwece diimigi onadi liwitiigi. <sup>34</sup>Niginoa ligecooge nigina oko micataga daga lokokenatema laalegena. Niginoa ligecooge nigele, odaa anitawece laalegena nalo. Pida nige degeleteda ligecooge, laalegena idaagee, idei nexocaga. <sup>35</sup>Pida anidakitiwaji, amaleegaga nagani lokokena anani makaamitagatiwaji adinanatigi me nexocaga. <sup>36</sup>Niganitawece gadaalegena nolee lokokena, otegeaagaga idei nexocaga, odaa atale macataga nagana lokokena me nalo catiwedi gadaalegena.”

**Jesus eetedeloco icoa fariseutedi icaagicoa anodiigaxinagatece  
lajoinaganegeco Moisés**

*(Mateus 23.1-36; Marcos 12.38-40)*

<sup>37</sup>Naga nigotedini Jesus me dotaga, odaa ica fariseu jonaga node migo aniodi ligeladi. Odaa Jesus jonigigo, odaa jona nicotedi maditaga aca nameeja. <sup>38</sup>Nigijo naga nadi nigijo fariseu Jesus me digica daga aniwilegi ane lakatigi codaaganioditeda, eliodi me yopo. <sup>39</sup>Odaa Goniotagodi oneete, “Nigida makaamitiwaji anakaami fariseutedi, inoka iwileci ganigoopa, ganiginogo wetice. (Odaa idagaga enitiwaji aniwileci me wetice.) Pida catiwedi gadaalegena, inokemaani molice, codaa mawii ane beyagi. <sup>40</sup>Akaami yetoledi! Igaataga Aneotedogoji jigijaa eote wetice, codaa me yoe catiwedi. <sup>41</sup>Pida dagajicitiogi madewetedi gaweenigi ane nolee ganiginogo, ganigoopatiwaji. Odaa inoatawece yapiditedagadomitiwaji.

<sup>42</sup>Aneotedogoji gadiloikatititewaji anakaami fariseutedi! Igaataga ajicitalo liwai gadawodigijedi ane ganidiizimo, ‘hortelā’, ‘arruda’, codaa meletidi niale-laamotiidi ane jelicaga. Pida nigida makaamitiwaji agoleetibige makaami eletemaeledi oko, codaa agemaanitiwaji Aneotedogoji. Leeditibige makaami eletemaeledi oko, codaa memaani Aneotedogoji, codaa niginoa anicinoa eletidi ajicitalo Aneotedogoji.

<sup>43</sup>Aneotedogoji gadiloikatititewaji anakaami fariseutedi! Leegodi dagaxa me gademaanigitiwaji manicooteloco nibaanco nigina oko anida nagatetigi midywa niakanagaxiidi, codaa gademaanigi modeemitetibigagaji metigadicensi miditaga ane licoogaditibece oko me dakapetibigiwage.

<sup>44</sup>Aneotedogoji gadiloikatititewaji anakaami fariseutedi, codaa makaamitiwaji ane iigaxinaganitece lajoinaganegeco Moisés, oko ane daga dinikee nigica anee. Gadiciagitiwaji nigina anonalgite émegegi, pida ayelogo, odaa nigina oko odagaxatibigeloco, pida agoyowoogodi midy.”

<sup>45</sup>Odaa ica ane diigaxinagatece lajoinaganegeco Moisés jona igidi Jesus, oneetalo, “Goniigaxinogodi, nigina mawii nigida gagegi, jagaga enitogoloco.”

<sup>46</sup>Jesus oneeteta, “Aneotedogoji aagaga gadiloikatititewaji ane iigaxinaganitece lajoinaganegeco Moisés. Leegodi micataga dagawii loyagagieledi oko, leegodi magaxakeni gadiigaxinaganegeco, niginoa ane iwaagadi, ane dagadiaa domigica anabotege. Pida akamagakaamitiwaji agaxawani nigina oko moyotete icoa gadiigaxinaganegeco daga micataga madoti maxawanitiwaji me yadeegi loyagagi.

<sup>47</sup>Aneotedogoji gadiloikatititewaji leegodi miwilaniteloco aniwote nigijo anoyelogoditedibece Aneotedogoji lowooko najjedi gaditacepodi nigijo jotigide. Akamagakaamitiwaji jigiwilaniteloco niginoa libecoli manalakitibige.

<sup>48</sup>Nigina miwilaniteloco niginoa libecoli, jigikeenitiwaji maniwotitema anee nigijo jotigide, nigijo nogonigodi nigijo anoyelogoditedibece lowooko Aneotedogoji. Odaa natigide jigiwilani aniwote, codaa jagawii me libinienigi.

<sup>49</sup>Joanigidaa leegodi Aneotedogoji ane dagaxa nigica lowoogotakanegegi,

meete, ‘Jiwakateetiogi nigidi noiigi anoyelogoditedibece yowooko, codaa nigina ane jiiigetibigiwaji mowo ibakedi. Odaa nigidi noiigi idi anonigodi, idiaageledi oiatetibeci nigidi anoyelogoditedibece yowooko.’<sup>50</sup> Odaa leegodi nigida niciagi, Aneotedogoji icota me iloikatidi nigina noiigi niginoa nokododi, leegodi ijotawece nigijo anoyelogoditedibece Aneotedogoji lowooko ane nigo, nigijo maleekoka yoeteda nigina iigo.<sup>51</sup> Abel, jigijaa odoejeji anoyeloadi, codaa me eletidi anonigodi, odaa owidijegi anoyeloadi Zacarias digoida lagitege nameeja wetiga minitaga nigijo eledi diimigi-le aneitedice Aneotedogoji. Ejitagawatiwaji mewi micota me iloikatidi Aneotedogoji nigina noiigi aninaa niginoa nokododi, leegodi lemegegi nigijo liotagipi.

<sup>52</sup> Aneotedogoji icota me gadiloikatititewaji ane iigaxinaganitece lajoinaganegeco Moisés. Igaataga gadiciagitiwaji nigina ane noxoco lapoagi ligeladi, odaa aika oko me dakatiobece. Joanigidaagenitiwaji agikani oko moyowoogodi anodaagee moyakadi migotibeci lodoe Aneotedogoji, pida otegexaagaga akaamitiwaji agemaani makaatiobece.”

<sup>53</sup> Nigijo Jesus naga noditedice, odaa nigijo anodiigaxinagatece lajoinaganegeco Moisés ijaagijoa fariseutedi jogoyalomege. Odaa eliodi moyelatema, codaa eliodi monigetedice.<sup>54</sup> Domogodoletibige daga dibatá nigina me dotaga, domogowo moyakadi me nilaagedi.

**Jesus yalagate ica oko ane lemaanigi me yelogo, pida ayelogo**  
(*Mateus 10.26-27*)

**12** <sup>1</sup>Icoa fariseutedi onigetedice Jesus, odaa eliodi oko yatecogo codaa jogoipoditibigeloco eledi. Odaa Jesus ja yajoitediogi nigidi anodiotibece, meetediogi, “Onexaa anidakitiogi fariseutedi anoyotete ane beyagi catiwedi laalegena, ane ibeyacagadi lewiga. Liciagi nigina labookojegi leyeema ane idej catiwedi paon, ajinataga, pida eo me dabo.<sup>2</sup> Inoatawece ane dinapogoditedini, icota me dinowiegi, codaa inoatawece anoyowiegitelogo, icota me jowoogotaga.<sup>3</sup> Joanigidaagee ijoatawece ane gadotaga digoida nexocaga, icota me jajipaagatalo digoina getaga. Inoatawece icoa gadotaga ane domaga agatitedini catiwedi diimigi-le ane dinoxoco, icota nigidiaagidi oyatemati owotibige minatawece oko owajipatalo.

**Ica ane leeditibige me idoiiga**  
(*Mateus 10.28-31*)

<sup>4</sup> Ejitagawa yokaagetedi, anagadoiita nigina ane yakadi me yeloadi gadolaadi, leegodi agalee yakadi meo eledi anigotagawa.<sup>5</sup> Pida jelogoditagawatiwaji anepaga leeditibige madoiita. Adoiitalo Aneotedogoji anepigida loniciwaga me gadokolenitedicogi minitaga noledi ane daga ipe, nigicota me yaagadi gadewiga. Jopitacagalocoti waji mejitagawa, adoiitalo niginiwa anejitedagawa.

<sup>6</sup> Nigina moyaa ciinco imikola, agicoda loojedi, loojedi iniwataale beexotedi. Pida Aneotedogoji idokee ayaagiditedibige otaganitece

imikola. <sup>7</sup>Eleditace jemaa mejitagawa Aneotedogoji me yowoogodi ane liwokodi gadamodi aneitigi gadacilo. Enice jinagadoitiwaji, igaataga dagaxa meliodi ganiwaló, agadiciagitiwaji nigijoa imikola anowidi.

**Nigica oko anida aneetege Jesus, icaagica ane digica aneetege**  
(*Mateus 10.32-33; 12.32; 10.19-20*)

<sup>8</sup>Ejitagawatiwaji nigina oko anee lodoeeledi oko mida anejitege, odaa Ee, Goneleegiwa ane jicogotibigimece ditibigimedi, eji lodoe niaanjotedi Aneotedogoji mewi mida anejitege. <sup>9</sup>Pida nigina oko ane dinagaditi lodoeeledi oko mida anejitege, odaa Ee, Goneleegiwa ane jicogotibigimece ditibigimedi, aagaga eji lodoe Aneotedogoji codaa me aanjotedi mewi me digica anejitege. <sup>10</sup>Nigina ane beyagi me dotagatibigiji, Ee, Goneleegiwa ane jicogotibigimece ditibigimedi, Aneotedogoji бага yakadi me ixomagateetedice loenataka ane beyagi, nige dinilaatece libeyacegeco. Pida nigina ane beyagi me dotagatibige Aneotedogoji Liwigo, Aneotedogoji baadaga ixomagateetedice loenataka ane beyagi. <sup>11</sup>Nigina nigetigadadeegi metigadalomegeni midiwataga liikanagaxiidi judeutedi, ogoa, domige lodoe goniwinogododi idiaa lacilodi judeutedi, jinaga agowikomataa leegodi me dogowoogoti me ojetee otegexaagaga owoogoti magitatakani. <sup>12</sup>Igaataga nagan lakata, Aneotedogoji Liwigo ikeetagawa nigica ane leeditibige me gagegi.”

**Ica liico ane liciagi nigina yetole ane digica liwaxinigi**

<sup>13</sup>Ica goneleegiwa anidiaagi liwigotigi nigidi noiigi-nelegi meetalo Jesus, “Goniigaxinogodi, adiwikodeni, iigeni inioxa me iniwaigawatece nigidiwa ane nenyagaditedogodomi ijoolatibige godiodi.” <sup>14</sup>Pida Jesus meeteta, “Yokaagedi, amiijo ica aneetagawa me Ee ganiwinogodi, ogoa amiijo ica aneo me Ee gadacilo me jawalace icoa ganepilidi?” <sup>15</sup>Odaa Jesus meetediogi iditawece nigijoko, “Atacolitecetiawaji, codaa adowetitiawaji inegewianaga memaani gaantigini ane nebieledi oko. Igaataga Aneotedogoji ayemaa me yewigatema nigina oko minokina me dinigaanyetece nillicagajetegi nigina iigo.”

<sup>16</sup>Odaa Jesus ja yatemati ica natematigo ane godiigaxi, meetediogi, “Ica goneleegiwa liico, onidiwa icoa lixogotaka anoyajigo owidi nawodigijedi. <sup>17</sup>Odaa meetibige le, ‘Igamige ele mejigotalo? Igaataga agica anejate niginoa yawodigijedi.’ <sup>18</sup>Odaa jegeo lowoogo, mee, ‘Ja jowoogodi anejigotalo, jojiketedi niginoa idiimaga nelecoli aneite me jotete yawodigijedi, odaa jaotace geladi diimaga dagaxatace me nelecoli, odaa ja jotete niginoa yawodigijedi ela. Odaa catiwedi idiimaga geladi jotete idiwatawece yawodigijedi codaa me niginoa eletidi ane inepilidi.’ <sup>19</sup>Odaa meetibige le, ‘Nige jotete idiwatawece ane jopotigi me jixomagateetedice owidi nicaagape. Odaa ja inipetini, ele me jiniodi, jacipe, jaote icoa ane inikeco.’ <sup>20</sup>Pida Aneotedogoji meeteta, ‘Nigida makaami, akaami yetole! Igaataga inaagina nigina enoale ja gadelewi. Odaa amiijo ica aneote



nepilidi idiwatawece icoa gadotetenataka?’ <sup>21</sup> Joanigidaagee nigina oko ane nioda nillicagajetecidi nigina iigo, lodoe Aneotedogoji baadaga liico.”

### **Leeditibige me jinakatonaga Aneotedogoji**

*(Mateus 6.25-34)*

<sup>22</sup>Odaa Jesus meetediogi anodiotibece, “Joanigidaa mejitagawatiwaji jinaga gadigecagalegeni niweenigi anopootibige me gadewiki, otegeaagaga gadowoodagagi anopootibige madinixomitinigi. <sup>23</sup>Igaataga gadiwigo dagaxa me gonegegi aliciagi niweenigi. Gadolaadi dagaxa me gonegegi aliciagi nowoodagagi. <sup>24</sup>Digawini ilaagaxodi! Agenanaganaga, otegeaagaga onioda liweenaga. Codaa agica lidiimigi anoyate liweenaga moyotete. Pida Aneotedogoji idokee me yajigotediogi liweenigi. Pida akaamitiwaji dagaxa makaami gonegegi caticedi niginoa ilaagaxodi. <sup>25</sup>Amiijo ina akaamitelocotiwaji ane yakadi me iigitedice nokododi me yewiga, leegodi gadogowikomatiigitiwaji? <sup>26</sup>Enice nige dagakati mawii gadoenatagi lionicawaanigi, igame leegoditiwaji ina me gadigecagalegeni inoa eletidi ane dagaxa me dakake?

<sup>27</sup>Digawini niginoa niale lawogo libinienaga! Anibaaga, agoyoe lipegetege. Pida ejitagawatiwaji ijaagijo Salomão midiwatawece ane nillicagajetecidi, pida agica daga dinixotinigilo nowoodi libinienaga daga nagaxatologo niginoa niale lawogo. <sup>28</sup>Aneotedogoji eote nadegogo micataga diginoa lowoodi libinienaga. Nadegogo ane ili nigina noko, natiinigoj jogoyalegi. Odaa ajawienataka me yajigotedagawa gadowoodi anele, akaamitiwaji ane degeliogi gatiwagatakanegegi.

<sup>29</sup>Enice jinaga adinigecalogotiti, digidokee moleetibige me gadigecagalegeni nigica anelici, codaa anacipeta. <sup>30</sup>Igaataga noiigi anida aneetege nigina iigo idokee modoletibige inoatawece niginoa anicinoa. Leegodi Gadioditetiwaji Aneotedogoji yowoogodi inoatawece nigicoa anopootibige. <sup>31</sup>Enice jinaga gadigecalogotiti niginoa ganicinao, pida odoejege oleetibige mawii Aneotedogoji me iige laalegenali oko, odaa Aneotedogoji jagaga yajigotedagawa inoatawece anopootibige.

### **Nigicoa nillicagajetecidi nigica ditibigimedi**

*(Mateus 6.19-21)*

<sup>32</sup>Akaami yoiigi anakaami onatecigidi, jinagadoii. Igaataga Gadiodi Aneotedogoji yakadi mele meote makaami lacilodi nigina loiigi. <sup>33</sup>Aani nigicoa ane ganepilidi, odaa anedianitiniwace madewetedipi dinyeelo. Oleetibige ganagaagaxi ane daga daa, odaa oteteni ganiliicagajetecidi digoida ditibigimedi, aneite me dagadiaa daa. Igaataga digoida ditibigimedi olicegegi agicoticogi me dolice, otegeaagaga ipilagawaana agaca daga yaagadi. <sup>34</sup>Igaataga aneite ganiliicagajetecidi, jigidiaa yemaa gadaalegenalitiwaji me onite.

**Icoa niotaka ane nigomagatema okanicodaagica**

<sup>35</sup>Leeditibige madinoetiwaji me gadigomitema okanicodaagica gaantigica anenagi, ipiciati ganigoenagadi, codaa aleci gadoledagaxiidi. <sup>36</sup>Awii liciagi nigijoa niotaka anowalitibigege necalailegi me icogotocogi miditaga nadonegegi. Nige yatoke epoagi me doletibige me dakatio, odaa aleegi jogoyomoketege. <sup>37</sup>Nigijoa niotaka ane icotiogi necalailegi malee niwotaga, ane nigomaga modibatema, odaa ninitibigiwaji nigijoa niotaka. Ejitagawatiwaji, nigijoa necalailegi diniikoage, iikoage lowoodi me mediatiniwace, odaa ja iige me nicotiniwace madi nameeja, odaa epaa nogatema liweenigi. <sup>38</sup>Eleditace degeno me liwigo enoale, migetaga iniwatadagani lakata me nigoitijo, idokee micotiogi me niwotaga, idokee me nigomaga me nibaaga, odaa ninitibigiwaji nigijoa niotaka. <sup>39</sup>Pida leeditibige mowoogotitiwaji nigina nigeladimigi daga yowoogodi nagaca lakata micotio olicegegi, odaa agotaga ika me yawime ligeladi me dolice. <sup>40</sup>Odaa nigida makaamitiwaji leeditibige me gadigomi, igaataga Ee, Goneleegiwa ane jigogotibigimece ditibigimedi, janotagawatiwaji nagaca lakata maleedaga anibeonitege me yanokegi.”

**Ica niotagi ane yakadi me jinakatonaga, icaagica ane daga  
yakadi me jinakatonaga  
(Mateus 24.45-51)**

<sup>41</sup>Odaa Pedro ja ige Jesus, meetalo, “Goniotagodi, okomokoko manatematiitogowa ica natematigo ane godiigaxi, ogoa, aagaga atematiitigi inatawece oko?”

<sup>42</sup>Goniotagodi naga igidi, meeteta, “Amiijo ica liciagi nigijoa niotagi ane yakadi me jinakatonaga, aninoa lixaketedi? Necalailegi nenyagaditini me yowie nigicoa eletidi niotaka, codaa me yediatece liweenigi me ditibigimedi lakata. <sup>43</sup>Odaa nigijoa niotagi aneo idiwatawece nigicoa necalailegi ane nenyagaditini me libaketedi, nigeno necalailegi, nigijoa niotagi eliodi me ninitibece. <sup>44</sup>Ejitagawatiwaji mewi mepaanaga ixotio necalailegi me doweditelogo icoatawece ane nepilidi. <sup>45</sup>Pida nigijoa niotagi dagaeledi lowoogo, oditaga dotagati le, degee, ‘Necalailegi ja leegi anigica me dopitijo’, oditaga ja nalaketiniwace nigijoa eletidi niotaka, daga dagaxa me aniodi, wacipe, yemagatibece. <sup>46</sup>Odaa necalailegi nigijoa niotagi dopitijo nigina me dagadiaa nibeotege, nagaca aligege me dagadiaa yowoogodi. Odaa necalailegi taga nakagiditibige eote liwailidawaanaga. Odaa joanigidaagee nigijoa niotagi oiloikatidi nigeppaa anigicatibige, oyawanagaditege nigina ane dogoyiwagaditeda Aneotedogoji.

<sup>47</sup>Nigina niotagi ane yowoogodi necalailegi ane yemaa, pida adinoe, ageo necalailegi ane yemaa, icota meliodi monalaketibige. <sup>48</sup>Pida nigijoa eletidi niotagi ane daga yowoogodi ica necalailegi ane yemaa, diba, pida beyagi libaketedi, odaa idokee me leeditibige me dinalake, pida onatecigini me dinaxacogo. Aneotedogoji

idaagee, eliodi me ipiciadi nigina oko aneliodi ane yajigote. Codaa me walitetege me dibatetege me nagaxataceloco ane liwokodi nigina anowidi me yajigote.

### **Ina oko dawalacetiwage leegodi Jesus**

*(Mateus 10.34-36)*

<sup>49</sup>Janagi nigina iigo micataga nigina oko ane dálogo me yalegi nipodigi, codaa eliodi me jemaatibige dogodaa yabidi ane jalegi. <sup>50</sup>Leeditibige meliodi me jawikode. Joanigidaa leegodi eliodi me jogowikomata nigepaa enotiloco nigida niciagi. <sup>51</sup>Migaleetibigetiwaji daga janagi nigina iigo daga jaotibige nigina oko me dagadiaa nidelaga? Anigidaa ibakedi me janagi. Pida ejitagawatiwaji ane leegodi me janagi, jaotibige oko me dawalacetiwage. <sup>52</sup>Igaataga digidi ciinco oko dinoiigiwepodi icota me dawalacetiwage, iniwatadigini oko dakapetege iniwata oko, codaa iniwataale dakapetege iniwatadigini. <sup>53</sup>Eniodi ja lakapetegi lionigi, nionigi jagaga lakapetegi eliodi; eniодо ja lakapete liona, niona ja lakapete eliodo; noxiigate ja lakapete liigate, niigate jagaga lakapete loxiigate.”

### **Niginoa ane jinataga niginoa nokododi ikee Aneotedogoji ane yoe**

*(Mateus 16.2-3)*

<sup>54</sup>Odaa Jesus meetediogi ica noiigi, “Digoina goniigotedi, nigina nige ica manatitece lolaadi ane icogoticogi niocodi wajenaga, odaageni, ‘Natigidawaanigi datiode!’ Odaa ewi nigidaagee. <sup>55</sup>Odaa niocodi nige icogoticogi natinedi, odaagenitiwaji, ‘Nilága!’ Odaa ewi me nilága. <sup>56</sup>Owoogotitiwaji anodaa diitigi ane ixomagatice nigina iigo, codaa me ditibigimedi. Enice, igaamee me dogowoogoti ica Aneotedogoji anigote inoa nokododi? Akaamitiwaji nigina anodi mowo Aneotedogoji ane yemaa, pida agawii.

### **Adinilakidenitege nigina ane daga gadilakiitege**

*(Mateus 5.25-26)*

<sup>57</sup>Igaamee dagakamagakaamitatiwaji awii gadowoogo ane igenaga? <sup>58</sup>Nigica ane beyagi me dotagatibigajitiwaji, codaa ane domaga gadadeegiticogi lodoe goniwinogodi, oleetibige ganimawenegegi madinilakidenitege digoida naigitece, amaleegaga dagadiaa gadadeegiticogi lodoe goniwinogodi. Igaataga nige dagadinilakidenitege, ja gadajicita iodagawadi libaagadi, odaa iodagawadi jegetigadiwilo. <sup>59</sup>Ejitagawatiwaji aganotiticogi niwilogonagaxi nigepaa ediani owidije beexo goniwinogodi ane diigenatakata mediani.”

### **Nige daga idinilaanagatibece, odaa idokee me godeleo nigepaa ganigaticibige**

**13** <sup>1</sup>Ajaagajo nagajo lakata ica oko ototalo Jesus, odaa jogoyatematitalo ica anodaagee Pilatos me diigenataka monigodi anigepidigica nigijoa

galileutedi, maleegidaa diitigi monigodi waxacocoli moibootema Aneotedogoji leegodi libeyacegeco. <sup>2</sup>Odaa Jesus ja ninigodi, meetediogi, “Migakati mijo ijo ninyaagi ijoa galileutedi me leegodi mowote libeyacegeco caticedi me liciagi niginoa eletidi galileutedi? <sup>3</sup>Ejitagawatiwaji agica libeyacegegi ane caticedi me liciagi eletidi galileutedi. Codaa nigida makaamitiwaji nige dagadinilaanitece gabeyacegeco, akaami eleditetiwaji gadelewi anee me nigo, odaa idokee me leegitalo Aneotedogoji motonitedice. <sup>4</sup>Nigijo 18 oko ane nigo anenitelooco aca niwilana ane leegitibigimece nigijo eledi liwai Jerusalém ane liboonagadi Siloé. Migakati me nigo leegodi me dagaxa me nilaagetedipi lodoe Aneotedogoji caticedi nigidiwa eletidi nigeladimigipitigi Jerusalém? <sup>5</sup>Ejitagawatiwaji nigijo ane nigo adagaxa me nilaagetedipi lodoe Aneotedogoji daga liciagi nigina eledi oko. Pida nige dagadinilaanitecetiwaji gabeyacegeco, akaami eleditetiwaji gadelewi digo anee me nigo, odaa idokee me leegitalo motonitedice Aneotedogoji.”

### Aca fiigoigo ane dagaca ela

<sup>6</sup>Odaa Jesus ja yatemati ica natematigo anida ane godiigaxitece, odaa meetediogi, “Ica goneleegiwa ada lawodigije fiigoigo midiwataga elanigijedi ‘uuva’. Odaa negenagi domaga doletibige ela nagada niale, pida agaca yakadi. <sup>7</sup>Odaa meeta nigica ane yowie lawodigijedi, ‘Digawini! Jigijoo itoatadigida nicaagape ixomagatedijo, idokee nigina me janagi joletibige ela nagada niale, pida agaca jakadi. Natigide akagiti nagada niale! Jinagalee jikanaga nagada niale daga iteloco iigo anele, ane yakadi mejanagate eletidi nawodigijedi.’ <sup>8</sup>Pida nigijo ane yowie lawodigijedi ja igidi, mee, ‘Inecalilegi, ecogotace jikanaga nagada niale jiwinaaga nigina nicaagabi, jaboogodi libatadi, amaleegaga yaxawa me ili. <sup>9</sup>Nagada niale nigetaye nigina nicaagabi anenagi, odaa jikanaga me ili. Pida nige dagacata ela, odaagepaanaga adiigenita me jakagidi.”

### Jesus icilatidi aca iwaalo awenanaga me saabado

<sup>10</sup>Ica saabado Jesus diigaxinaga manitaga aca liikanagaxi judeutedi. <sup>11</sup>Digawini! Onani aca iwaalo jonegeote dezoito nicaagape me awenanaga leegodi ica niwigo abeyacegegi ane dakatiogi. Aona yakadi me dinegenagadi. <sup>12</sup>Odaa Jesus ja nadi aca iwaalo, negenidite, meeteta, “Iwaalo, ida makaami ja gadicilitema gadeelotagi!” <sup>13</sup>Odaa ipeketedeloco libaagatedi, odaa agica daga leegi ja icí me diwena, odaa ja dogetetibigimece Aneotedogoji.

<sup>14</sup>Pida ica nowienogodi niikanagaxi ja deligide, leegodi Jesus me icilatidi nagajo iwaalo me saabado. Joanigidaa leegodi meetiogi nigidi noiigi, “Idiwa dibatio gobaagadi nokododi me jakataga me jibaaga. Odaa anagi niginoa eletidi nokododi me diniwakateeni, pida jinaganagi nigina me saabado.”

<sup>15</sup>Odaa Goniogodi ja igidi, meeteta, “Akaamitiwaji nigina anodi moyotete liigenatakanegeco Aneotedogoji, pida agotetenitetiwaji! Nigina me saabado okanicodaagica nigina akaamitiwaji iigo aneite neijedi ane noxocotege, odaa ikatedice nogodinadi, ogoa, domige nemadicali

yadeegitinigi ninyogodi me yacipegetedi. <sup>16</sup>Pida nagada iwaalo anida aneetege licogegi Abraão, niwilo Satanás 18 nicaagape. Igame leegodi ina me eni me daga yakadi me jicilatidi ina me saabado?” <sup>17</sup>Odaa Jesus naga igiditediogi, ijotawece nigijo nelogododipi niboligatibigiwaji. Pida ijo eledi noiigi бага ninitibigiwaji leegodi nigijoa godoxicegetedi aneote.

### **Lolagi aca mostaada**

*(Mateus 13.31-32; Marcos 4.30-32)*

<sup>18</sup>Odaa Jesus jegee, “Igamigodaagee Aneotedogoji nige iige laalegenali ina oko? Amigini ica ane jiciaceeketege? <sup>19</sup>Digawini! Aneotedogoji nige iige nigina oko laalegenali, jiciaceeketege lolagi ‘mostaada’ ane dagaxa me lionawaana. Ica goneleegiwa dibata, odaa jegeyateloco niogó. Odaa nagajo elanigije ja ili, odaa ja niale nelegi. Odaa ilaagaxodi jogowote libatoli midoataga libiweli.” (Odaa jigidaagee me ili nigina lapo oko ane nepilidi Aneotedogoji).

### **Natematigigi labookojegi leyeema**

*(Mateus 13.33)*

<sup>20</sup>Jesus naga dotagatace, odaa mee, “Amigetigini ane jiciaceeketege ica Aneotedogoji nige iige ina oko laalegenali? <sup>21</sup>Nigina Aneotedogoji nige iige nigina oko laalegenali, liciagi nigina ane yaboogodi leyeema anoibake moyoe paon, odaa jogoyawanagaditege leyeema oiatigi itoatadigida baxiatedi, odaa nigidiaagidi ijoatawece baxiatedi ja nolee leegodi jiginaa ane yaboogodi leyeema.”

### **Ica epoacawaanigi**

*(Mateus 7.13-14, 21-23)*

<sup>22</sup>Jesus yakagiditedeloco nigotadi nelecoli, codaa me nigotadawaanaga, niigaxitediniwace oko, egidaagee me diniwiajetedicogi nigotaga Jerusalém. <sup>23</sup>Odaa jonigica ane ige, oneetalo, “Goniotagodi, migeliodi ica oko Aneotedogoji ane yajigote lewiga?”

<sup>24</sup>Odaa Jesus ja igidi, meeteta, “Adinoniciwagatitiwaji makaatiwece nigida epoacawaanigi amaleegaga yajigotedagawa Aneotedogoji gadewiga. Leegodi ejitagawatiwaji eliodi oko anodoletibige me dakatiobece, pida agoyakadi.

<sup>25</sup>Nigidiaagidi nige dabiditini nigeladimigi, odaa ja noxoco epoagi, odaa akaamitiwaji jigidiaagonitice we. Odaa jaganatokenitice epoagi, manidita, odaa menitiwaji, ‘Goniotagodi, omokeni epoagi amaleegaga jakatio.’ Odaa ja gadigititewaji, meetedagawa, ‘Ajowoogodi ane icogiticogitiwaji!’ <sup>26</sup>Odaa menitiwaji, ‘Gemakaami gogiiwa, codaa geme aniigaxinitiniwace oko niginoa gonigotadawaanaga.’ <sup>27</sup>Pida nige gadigititewaji, meetedagawa, ‘Genegejitagawa, ajowoogodi ane icogiticogi. Adotonitice akaamitawece anawii ane beyagi!’ <sup>28</sup>Niganatitiwaji Abraão, Isaque, Jacó, codaa mijotawece nigijo anoyelogoditedibece Aneotedogoji lowooko digoida Aneotedogoji ninioxadi,

pida bagakaamitawece etigadokoleniticogi we, odaa jaganoenitibece, acigiceni gadowe leegodi me dagaxa me eligideetiawaji. <sup>29</sup>Odaa ina oko ane enagitibeci agicaadaga icogoticogi, icogoticogi nigoi, gocidi, wajenaga, codaa me niwetaga. Odaa ja nicotiniwace madi nameeja me niodaga minitaga ninioxadi Aneotedogoji digoida ditibigimedi. <sup>30</sup>Digawini! Nigina oko iwikodadi, ane ideitice lowiditice, nigidi jigidiaa ideitice odoe. Odaa nigina oko ane diniwaloetibigiwaji ane ideitice odoe, nigidi jigidiaa ideitice owiditice.”

**Jesus agecagalo leegodi nigeladimigipitigi Jerusalém**  
(Mateus 23.37-39)

<sup>31</sup>Aniaagani aca lakata jonogototalo Jesus icoa fariseutedi, odaa moditalo, “Anotitice, emii opili leegodi Herodes doletibige me gadeloati!”

<sup>32</sup>Odaa Jesus ja igidi, meetediogi, “Herodes liciagi nigina eijeegagi ane diwaxinaga. Emii, nigicoota, odaa enita, ‘Digawini! Niginoa onateciginoa nokododi, jiticoitedice niwicidi abeyacagaga, jicilatidi oko eelotaginadi. Odaa nige ixomagatedice itoatadigida nokododi, ja jigodi ibaketedi.

<sup>33</sup>Pida leeditibige me jitece inaigi niginoa nokododawaanaga. Igaataga ayakadi digica anigetegepidigica nigina anoyelogoditedibece Aneotedogoji lowooko daga lemagadieledi nipodigi ditigedi nigotaga Jerusalém.’

<sup>34</sup>Akaamitiwaji nigeladimigipitigi Jerusalém, jagakamaga anigoti nigijo anoyelogoditedibece Aneotedogoji lowooko, eleditace anigidaatiniwace nigijo Aneotedogoji ane niwakateetedibigagaji. Anigenaga liwokodi domaga jema me gadatecogoteenitiwaji meetaga, leegodi me domaga jema me idoweditagalocotiwaji, macataga nagana okogokoodi me ixomodatediwece lionaga catiwedi labadi. Pida agemaanitiwaji. <sup>35</sup>Natigide, digawini! Ganigotagatiwaji agaleegica ane dowediteloco. Odaa ejitagawatiwaji, agaleegica madatitiwaji nigepaagicota nigica noko menitiwaji, ‘Ninitedibece Niginoa anenagi, anida nagatetigi Liboonagadi Goniotagodi Aneotedogoji!’”

**Jesus icilatidi eelotaginaga me saabado**

**14** <sup>1</sup>Ica noko me saabado, Jesus dakatediwece ligeladi ica lacilo fariseutedi ane node maniodi. Odaa icoa fariseutedieledi onidi moigoaditalo Jesus. <sup>2</sup>Jigigo Jesus lodoe ica goneleegiwa eelotaginaga, nadedi libaagatedi, logonaka. <sup>3</sup>Odaa Jesus ja igetediogi nigidiwa niigaxinaganadi anodiigaxinagatece lajoinagananegeco Moisés, idiaagidiwa fariseutedi, meetediogi, “Mige oyoli gonajoinagananegeco daga jicilatidi nigina eelotaginaga ina noko me saabado, ogoa, agoyoli?”

<sup>4</sup>Pida agoigidi. Odaa Jesus ja dibate nigijo goneleegiwa. Naga icilatidi, odaa ja imonya mopi. <sup>5</sup>Odaa Jesus ja igetediogi, meetediogi, “Ina digica gadionigi ane daxaboketinece nalice, migetaga ganogodinagatiwaji, odaa migetaga adinopagatitibece manogaa leegodi me saabado? Ogoa domige odaa aganogaa leegodi me saabado?” <sup>6</sup>Odaa agoyakadi moigidi.

### Jesus yalagate ica oko ane diniwikodetibece

<sup>7</sup>Jesus iwitediogi nigica oko nodenigipi oniwitedi limetiidi odoletibige nigina nimedi ane dagaxa mele. Odaa ja yatemati natematigo anida ane godiigaxi, meetediogi, <sup>8</sup>“Nigina nigakaami nodenigi mido nadonegegi, jinaganicooteloco baancotedi ane dagaxa mele. Igaataga eji meledi onode eledi oko ane dagaxa me gonegegi ane daga gadiciagi. <sup>9</sup>Odaa nigijo ane gadodeni, digicotagawa ijaagijo nigijo eledi nodenigi, odaa meetagawa, ‘Ajicita gamedi nigida eledi yodenigi.’ Odaa jaganiboliki, odaa jaganicooteloco nimedi ane degele. <sup>10</sup>Pida nigina nigakaami nodenigi naloogo, anicooteloco nigidi nimedi ane daga gonegegi. Odaa nigida ane gadodeni igo makaamita, meetagawa, ‘Yokaagedi, anagi, anicooti digoina miditaga nimedi anele.’ Joanigidaagee gadelogoteeni lodoe iditawece nigidi lodenigipi. <sup>11</sup>Igaataga nigina oko anepaa doletibige me yelogo, nigidiaagidi icota me diniwikodetibece. Pida nigina ane diniwikodetibece, nigidiaagidi icota me yelogo.”

<sup>12</sup>Jesus meeteta nigijo ane node, “Ina nigawiite niweenigi nelegi me yaxogonoko, ogoa, mige gocidi, jinaganodeni gadokaagetedi, ganioxoadipi, codaa me gaditacepodi, migetaga gadipecegawepodi ane liicotedi. Leegodi nigidiaagidi jagaga etigadodeni, odaa ja micataga degetigadediani. <sup>13</sup>Pida nigica mawii nalokegi, anodeni madewetedipi, alejaadotedi, inoa ane daga yakadi mewaligitibigiwaji, etoinadi. <sup>14</sup>Odaa Aneotedogoji gadibinieni. Igaataga agica nimawenegegi nigidi degetigadediani. Odaa Aneotedogoji yajigotedagawa anele nigica noko nigeote me newigatace nigina oko ane igenagatibigiwaji.”

### Natematigigi ica nalokegi nelegi

*(Mateus 22.1-10)*

<sup>15</sup>Anigepidigijo nigijo oko anidiaagi maditaga nameeja miniwataga Jesus wajipatalo nigijoa lotaga, odaa meetalo, “Nigica ane nicotiniwace maditaga nameeja me naloogo digoida ninioxadi Aneotedogoji, nigidi icota me dagaxa me ninitibigiwaji.”

<sup>16</sup>Pida Jesus meeteta, “Ica goneleegiwa one dodenaga node eliodi oko miditaga lalokegi aneote. <sup>17</sup>Nigicota aca lakata nalokegi, odaa ja iige liotagi me nodetece oko, mee, ‘Anagitiwaji, inoatawece ja igo.’ <sup>18</sup>Pida iditawece idokida lowoogo, jegecogotace owote inoa linetedi. Nigica odoegegi nodenigi meeta nigida niotagi, ‘Ibeyacagadi jinoojeteta nipodigi, leeditibige mejigo jiwi. Jipokotalo ganiotagodi me daga yakaditeda me beyagi.’ <sup>19</sup>Odaa nigini eledi nodenigi meeta, ‘Jinoojeteta dooze lacilodi ewalaile. Ecogotace ejigo jiwi migele me nibaaga. Jipokotalo ganiotagodi me daga yakaditeda me beyagi.’ <sup>20</sup>Odaa nigica eledi mee, ‘Ajakadi mejigo, ibeyacagadi gela me jado. Joanigidaa leegodi daga jakadi mejigo.’

<sup>21</sup>Odaa nigijo niotagi ja dopitijo, ja yatematita nigini niotagodi, odaa ja deligide. Odaa meeta liotagi, ‘Emii gadediiki, emiitece ladicotiidi, ina ladicotiidawaanaga diimaga, odaa anadeegi niginoa madewetedi, inoa

alejaadotedi, ina ane degewaligi, etoinadi.’ <sup>22</sup>Nigidiaagidi ja dopitijo nigijo niotagi, odaa mee, ‘Iniotagodi, ja jaote ijoatawece ane gadiigenatakanegeco, pida egidiwa nimetiidi iigotedice.’ <sup>23</sup>Odaa nigijo niotagodi meeta nigijo liotagi, ‘Emii iwitece naicoli, naicolawaanaga wetice nigotaga. Awii me nakatiobece oko digoina igeladi nigepaa nolee. <sup>24</sup>Igaataga ejitagawatiwaji, otiginitece nigijo odoejegipi nodenigipi aniodi digoina yalokegi.”

### Ica ane yakadi me diotibece Jesus

*(Mateus 10.37-38)*

<sup>25</sup>Eliodi oko anodioteece Jesus me diniwiaje, naga noletedijo, meetediogi, <sup>26</sup>“Nigina anenagi meetaga, ayakadi me niotibici, nige degewi me idemaa caticedi me liciagi me yemaa eliodi, eliodo, lodawa, lionigipi, nioxoadipi, niwaalepodi, codaa miniaagini. <sup>27</sup>Nigina ane daga igotema me dawikode nigepaa yeleo, codaa aniotici, nigini ayakadi minigina ane niotibici.

<sup>28</sup>Nigina akaamiteloco nige gadowoogo mawii gadigeladi nelegi, odoejegi leeditibige manicooti owoo ane liwokodi yajigo odaa awini migabo mediani. <sup>29</sup>Nige dogowoo ane liwokodi, doidetibige me idioka oeni lipodagaladi, pida aginitawece agoti diimigi. Odaa nigina oko anonadi nigida niciagi oyame. <sup>30</sup>Odaa jogodi, ‘Nigini goneleegiwa domaga yoe ligeladi, pida aigodi libakedi.’

<sup>31</sup>Nigina digini inionigi-eliodi anidiwa deez miili niodagawadi daga doletibige me idelege niginieledi inionigi-eliodi ane iwitidegeta, nadeegi onokotece godigoti miili iodagawadi. Odoejegi ecogotace nicotini, doletibige me yowoogodi migica loniciwaga me idelege niginieledi inionigi-eliodi. <sup>32</sup>Nige yakadi ina me daga abotege, odaa niboloitee malee leegitege niginieledi, odaa ja imonya liigexedi igetece niginieledi inionigi nigica ane yemaa eotibige me dagalee idelege. <sup>33</sup>Joanigidaagee agica nigina akaamiteloco ane yakadi me niotibici nige daga ika idiwatawece icoa ane nepilidi.”

### Ica yoci ane degele

*(Mateus 5.13; Marcos 9.50)*

<sup>34</sup>Odaa egidaa diitigi me dotaga Jesus, mee, “Nigina yoci eletema inoatawece, pida niganiaditema libayodaga, agica gonimawenegegi daga jaogatace me bayodi. <sup>35</sup>Odaa agaleegeletema iigo, otegexaagaga eletema me iniboloiteenaga, pida idoka eletema me jalataga. Ane yemaa me wajipatalo iigaxinaganegeco, atacolitece!”

### Natematigigi waxacoco ananiadi

*(Mateus 18.12-14)*

**15** <sup>1</sup>Ica noko eliodi nigijo anodibatibigege ninyeelo ninionigi-eliodi romaanotedi, idiaagidi icaeledi oko anodi me dagaxa me abeyacagaga, igotibeci odipegitalo Jesus mowajipatalo latematiko. <sup>2</sup>Pida idiwa icoa fariseutedi,



icaagicoa niigaxinaganadi anodiigaxinagatece lajoinaganegeco Moisés, eliodi moyalomge Jesus, modi, “Nigidoa goneleegiwa dibatege niginoa goneleegiwadi abeyacagaga, codaa ligiwepodi.”<sup>3</sup> Odaa Jesus ja yatemati ica natematigo ane godiigaxi, meetediogi,<sup>4</sup> “Nigida makaamitiwaji digini anidiwa onaniteci taalia niwaxacocoli, odaa dagaca ananiaditibige. Ajawienatakanaga me igo doletibige, ecogotace yoya nigijoa eletidi ane yeyagatedice digoida nipodigi. Odaa jigigo doletibige nagajo waxacoco ananiadi nigepaa yakadi.<sup>5</sup> Nigidiaagidi nige yakadi nagajo waxacoco, odaa ja yoyagadi, eliodi me ninitibece.<sup>6</sup> Nigicota ligeladi, odaa jegeniditigi lokaagetedi, lipecagawepodi, odaa meetiogi, ‘Jemaa makaami inikagawepodi, leegodi idinitibeci me jakadi nagajo iniwaxacoco ananiadi.’<sup>7</sup> Ejitagawatiwaji jigidaagee, iditawece ane ideidi digoida ditibigimedi ninitibigiwaji nigina mini ane dinilaatece libeyacegeco nigina oko abeyacegegipi, pida baadaga ninitibigiwaji leegodi nigina eledi oko anodiletibige daga igenagatibigiwaji, codaa anodi me dagalee leeditibige me dinilaatibigiwaji.

### Natematigigi aca beexo ananiadi

<sup>8</sup>Daga aca iwaalo anidiwa deez nibeexotedi daganiadi onaniteci, ajawienatakanaga migo doletibige. Yalegi loledagaxi, yoladitice ligeladi, doletibige nigepaa yakadi nagajo beexo.<sup>9</sup> Naga yakadi nagajo beexo, odaa jegeniditigi lokaagetedi, lipecagawadi, odaa meetiogi, ‘Jemaa makaami inikagawepodi leegodi idinitibeci me jakadi inibeexo ananiadi.’<sup>10</sup> Ejitagawatiwaji, jigidaagee Aneotedogoji niaanjotedi me ninitibigiwaji leegodi me dinilaatece libeyacegeco nigina oko aniatagigi.”

### Natematigigi ica nionigi aniatagigi

<sup>11</sup>Odaa Jesus meetetiogi, “Ica goneleegiwa onidiwa iniwataale lionaga.<sup>12</sup> Ica noko nigica bagalee lioneege lionigi meeta eliodi, ‘Eiodi, jemaa manajicitediwa nigicoa ane inepilidi ane domaga jibatege nige gadelewi.’ Odaa ja yawalace ane nepilidi nediatiwace nigidoa itoataale lionaga.

<sup>13</sup>Agica dogowidi nokododi nigijo bagalee lioneege lionigi ja nioda idiwatawece ane nogetedi, odaa ja noditice, jigigo ica eledi iigo ane leegita. Odaa oneliodi me dalotibece, wacipetibece, codaa me itinege awicijipi, yaagadi ijoatawece nigicoa nogetedita eliodi.<sup>14</sup> Nigidiaagidi naga yaagadi ijoatawece icoa ane nepilidi, pida jagaga icota nigigi nigidi nipodigi. Odaa ja dawikode.<sup>15</sup> Nigidiaagidi jigigo doletibige libakedi miditaga nigeladimigipitigi nigidi nipodigi, odaa ja yakadi necalailegi iige me yowie nigidagiwadi.<sup>16</sup> Odaa leegodi me dagaxa me nigicile, ja domaga yemaa me yeligo nigidagiwadi liweenigi, leegodi agoyediatece ane yeligo.

<sup>17</sup>Pida naga eliodi me dowooko, meetigi le, ‘Eiodi idiwa owidi liotaka, inoa liweenaga catedi me liciagi ane jopotibige, emegee ite ee digoina ja ideloadi nigigi.<sup>18</sup> Natigide ja jopita eiodi ligeladi. Nigejota, odaa ejita, “Eiodi, jao ane beyagitema Aneotedogoji, codaa makaami.<sup>19</sup> Natigide agalee yakadi



(Lucas 15.17)

degenitiwa me ee gadionigi, leegodi agee oko anele. Pida jemaaw mawii ibakedi liciagi niginoa gadiimetedi.”<sup>20</sup> Naga ika me dowooko, odaa jigigo opita eliodi.

Odaa nigijjo lioneeega eleegitege, odaa nigijjo eliodi ja naditege. Odaa eliodi me iwikodetege. Naga walokoditege lionigi, ibedotece, napicogo.<sup>21</sup> Odaa nigijjo lioneeega meeta eliodi, ‘Eiodi, jao ane beyagitema Aneotedogoji, codaa makaami. Agalee yakadi degenitiwa me ee gadionigi, leegodi agee oko anele.’<sup>22</sup> Pida nigijjo eliodi, meetiogi liotaka, ‘Gadediiki manadeegi nagaca ane dagaxa me libiniena jayogo anixomegenitinigi. Awii libaagateje ixomitiwece nibedona, codaa awiite liwelatedi.<sup>23</sup> Codaa awii abaata wacawaanigi ane dagaxa majakalo, eloati, jaoga nalokegi, godinitibece.<sup>24</sup> Igaataga nigida ionigi ane dopitijo, micataga daga yeleo, odaa ja yewigatace, codaa aniadi, nogokaanaga jakataga.’ Odaa jogowo nalokegi.

<sup>25</sup> Nigijjo lionigi bogoxiigodi ideitice nipodigi, naga dopitio, nigipegitio ligeladi, ja wajipatalo natenaganegeco, ica oko dayaagetioigi me naloogo.<sup>26</sup> Odaa jegenidita anigepidigijjo nigidiwa liotaka, naga ige, meeta, ‘Amiidi ica ayaagi?’<sup>27</sup> Odaa ja igidi, meeta, ‘Ganioxoa ja dopitijo, mele. Joanigidaa leegodi gadiodi diigenataka moyeloadi wacawaanigi ajakalo.’

<sup>28</sup> Nigijjo bogoxiigodi lionigi ja deligide, odaa ayemaa me dakatio. Odaa eliodi ja noditicogi we, domaga yemaa me yadeegitio, yocaganegetibigo.<sup>29</sup> Pida naga igidi eliodi, meeta, ‘Digawini! Jogowidi nicaagape me

jibatagadomi, liciagi niginoa gaotaka. Agica daga gadotigimadeni. Pida agica daganajicitiwa otegexaagaga waxigida me jeloadi daga jao nalokegi me inode yokaagetedipi. <sup>30</sup>Nigini gadionigi ane yaagadi ganinyeelo, yaagaditeloco iwaalepodi agopeloaga, odaa negeno, jegeloatitema wacawaanigi ajakalo.’ <sup>31</sup>Odaa nigijo eliodi meeta, ‘Ionigi, idioka limedi makaami meetaga. Odaa inoatawece ane inepilidi, akaami ganepilidi. <sup>32</sup>Pida бага leeditibige me jaoga nalokegi me godinitibece. Leegodi nigida ganioxoa micataga daga yeleo, odaa nigidiaagidi ja yewigatace. Micataga daganiadi, nigidiaagidi nogoyakadi!’”

### Natematigigi ica niotagi ane daga yakadi me jinakatonaga

**16** <sup>1</sup>Jesus meetediogi nigijo anodiotibece, “Ica goneleegiwa liico, oninica liotagi ane iige icoa libaketedi. Odaa jonigica anenagitibeci minitaga nigini goneleegiwa liico, odaa jogoyatematita nigijo liotagi me yaagadi ninyeelo. <sup>2</sup>Odaa jegenidita nigijo liotagi, meeta, ‘Ewi ijo anonatematitiwa? Natigide jemaa manelogotitediwa icoatawece nigicoa gadaakataka, jilakidenagatedi ganaalewe, leegodi nigina natigide agalee iigeni niginoa ibaketedi.’ <sup>3</sup>Odaa nigijo liotagi meetibige le, ‘Inecalailigi ja idikaticce. Amigini ica ane jao? Ajakadi me jiba daga inaligi iigo, codaa idiboliga daga jipokotibige dinyeelo. <sup>4</sup>Pida ja jowoogodi ane inimawenegegi modibatigi nigina nigeladimigipi midiwataga ligelatedi, nige idiige inecalailigi me jopi.’

<sup>5</sup>Odaa nigijo niotagi jegeniditiogi nigijo anonaalewe necalailigi. Odaa jegeeta nigijo odoejegi, ‘Igame liwokodi manaaleweeni inecalailigi?’ <sup>6</sup>Odaa nigijo goneleegiwa mee, ‘Jinaalewe onaniteci taalia bootitedi najidi.’ Nigijo niotagi mee, ‘Digawini analee liwokodi ganaalewe. Idiitini manaaleweeni meya-taalia bootitedi najidi.’ <sup>7</sup>Odaa jegeeta nigijo eledi anenotio, ‘Apaga akaami, igrage liwokodi ganaalewe?’ Odaa jegee, ‘Jinaalewe onaniteci taalia jaacotedi leyeema.’ Odaa nigijo niotagi mee, ‘Idiitedini manaaleweeni onexaa oiteenta jaacotedi leyeema.’

<sup>8</sup>Igaanaga yowoogodi nigijo necalailigi nigijo niotagi ane daga yakadi me jinakatonaga, odaa ja iwenigide leegodi nigida anee. Leegodi nigina oko anida aneetege nigina iigo, бага dagaxa me niwaxinaganaga, nigina mowote noojetekico catedi me liciagi nigina oko anida aneetege nilokokena Aneotedogoji.

<sup>9</sup>Ejitagawatiwaji mabakeni niliicagajetecidi nigina iigo bidige ina gadokaagetedipi, awiitibige nige dagaleegicoa nigijoa ganiliicagajetecidi, odaa Aneotedogoji ja dibatedagagi me gadigeladi digoida ditibigimedi. <sup>10</sup>Nigina ane yakadi me jinakatonagatema niginoa anicinoa ane digica jaogate, odaa yakadi me jinakatonagatema niginoa anicinoa anida ane jaogate. Pida nigina ane daga yakadi me jinakatonagatema niginoa anicinoa ane digica jaogate, odaa ayakadi daga jinakatonagatema niginoa anicinoa anida ane jaoga. <sup>11</sup>Enice nige daga yakadi metigadinakatonitema niginoa niliicagajetecidi nigina iigo, amiijo ica ane gadinakatonitema nigicoa begewi me goniliicagajetecidi? <sup>12</sup>Nigina nige dagawiiwetiwaji nigica ane igenagatema niginoa ane nepilidi eledi oko, amiijo ica ane yajigotagawa ica ane ganebi?”

<sup>13</sup>Agica ane yakadi me dibatema iniwataale necalaixedi, igaataga ini ane daga yemaa, odaa iniaageledi бага lemaanigi, domige ini ane nienaganenge, odaa iniaageledi agalee deemitetibige. Odaa joanigidaagee agakati mabaatema Aneotedogoji, nige leedi mawiite inoatawece onidaagida manigaanyetece dinyeelo.”

**Liigenatakanegeco Aneotedogoji adiniigi**  
(*Mateus 11.12-13; 5.31-32; Marcos 10.11-12*)

<sup>14</sup>Icoa fariseutedi anowajipatalo lotaga Jesus, jonogoyame leegodi dagaxa moyemaa dinyeelo. <sup>15</sup>Odaa Jesus meetediogi, “Nigina makaamitiwaji oleetibige nigina oko modi ica makaami oko ane igenaga, pida Aneotedogoji бага yowoogoditediwece gadaalegenali. Igaataga niginoa ganicinoa analeetibige daga diniwaloe, Aneotedogoji yakadi me digica ane jaoga.

<sup>16</sup>Aneotedogoji domaga yemaa nigina oko me niigaxinaganagatece lajoinaganegeco Moisés, codaa modiiigaxinagatece lotaga nigijo jotigide Aneotedogoji liigexedi anoyelogoditedibece lowooko. Aneotedogoji domaga yemaa dogodiigaxinagatece niginoa notaga degepaageno João Batista. Pida nigijo maleegijo João, idokee me jelogotaga gobodicetedi anele anodaageeteda Aneotedogoji me iige laalegenali oko. Odaa natigide digawinteloco inatawece oko ja dinoniciwagaditibigiwaji me dinawanagaditege nigina noiigi ane iige Aneotedogoji laalegenali. <sup>17</sup>Icota me daa ditibigimedi, codaa me iigo, pida бага dakake monidateci ligegi inogaaga liigenatakanegeco Aneotedogoji.

<sup>18</sup>Digica goneleegiwa ane iticoitice lodawa, odaa ja lodawa eledi iwaalo. Odaa nigini goneleegiwa ja dogolagataka. Odaa digica eledi ane lodawa nagani iwaalo ane oiticoitice, odaa jagaga dogolagataka.

**Natematigigi ica liico iniaa ica madewedi Lázaro**

<sup>19</sup>Ica goneleegiwa liico ane dinixotinigilo nowoodi libinienaga ane dakake loojedi. Eotibiga nalokeco, codaa ele maniodi. <sup>20</sup>Pida onagagini ica goneleegiwa madewedi ane liboonagadi Lázaro, one diwexege lolaadi. Idiaagitibige lapoagi ligeladi nigini goneleegiwa liico. <sup>21</sup>Lázaro walitibigege latijedi nigini liico maniodi nagaleekoka aagaga aniodi. Icoa necexodi one onapitibece liwexegadi Lázaro.

<sup>22</sup>Nigijo goneleegiwa madewedi nigidiaagidi ja yeleo, odaa aanjotedi jogoyadeegi liwigo me nicote liwai Abraão miditaga naloogo digoida ditibigimedi. Nigidiaagidi nigijo goneleegiwa liico jagaga yeleo, odaa jogonaligitini. <sup>23</sup>Odaa begeliodi me dawikode digoida lawikodadi émagaga. Igaanaga noletibige, odaa ja nadi Abraão digoida ditigedi, iniaa Lázaro liwai Abraão. <sup>24</sup>Odaa ja dapaawe mee, ‘Eiodi Abraão, adiwikodeni! Anieni Lázaro me itiminatidi nibedona, amaleegaga ilege yoceligi, igaataga ja dagaxa me jawikode minataga nigina noledi.’

<sup>25</sup>Abraão naga igidi, meeta, ‘Ionigi, analakitibige makati inoatawece anele malee gadewiki digoida iigo, iniaa Lázaro inoka dibatege ane beyagi. Pida

natigide Lázaro ja ilagatini, akamagakaami baanaga awikodee. <sup>26</sup>Codaa eleditace ida nelegi wakagi iigo ane godawalacetiwage digoina godiwigotigi, aneotibige me daga yakadi me digetita ane domaga yemaa migo digoida daato makaamitaga, otegexaagagica ane yakadi me nigetita digoina naato mokotaga.’

<sup>27</sup>Odaa nigijo liico mee, ‘Enice, eiodi Abraão, jipokotagawa, iigeni Lázaro digoida ligeladi eiodi. <sup>28</sup>Igaataga idiwa nigotini gobaagadi inioxoadipi. Iigeni Lázaro me ibodicaxi inioxoadipi me degenagitibeci nigina anejo me jawikode.’

<sup>29</sup>Abraão naga igidi, meeta, ‘Miditaga ganioxoadipi idiwa notaganagaxiidi ane iditedini Moisés, ijaagijoa anoidi nigijo anoyelogoditedibece Aneotedogoji lowooko. Ikani ganioxoadipi mowajipatalo lotaga nigijoa notaganagaxiidi.’

<sup>30</sup>Nigijo liico mee, ‘Ogoa, eiodi Abraão, agowajipatalo. Pida digica ane yewigatace, digigo datematikatema, odaa bogodinilaatece libeyacegeco.’

<sup>31</sup>Pida Abraão naga igidi, meeta, ‘Nige dogowajipatalo nigijoa notaga ane iditedini Moisés, ijaagijoa lidiko nigijo anoyelogoditedibece lowooko Aneotedogoji, odaa idaagee digica ane yewigatace, idokee dogoyiwagadi.’”

### Jesus diigaxinagatetece ica anodaagee ica ane beyagi

(Mateus 18.6-7, 21-22; Marcos 9.42)

**17** <sup>1</sup>Jesus meetediogi nigijo anodiotibece, “Ajawienatakanaga midioka limedi menagi aneo nigina oko mowo loenatagi ane beyagi! Pida Aneotedogoji eliodi me iloikatidi nigina aneo eletidi oko mowo ane beyagi.

<sup>2</sup>Nigina aneo anigepidigica nigina nigaanigipawaanigi mowo ane beyagi, domegeletema dogoigoetece lotoinagadi nagana wetiga ane iwaagadi, oditaga oyokoletinigi akiidi-eliodi. Pida dagaxa me beyagitema nigina meo nigina nigaanigipawaanigi moyoe ane beyagi. <sup>3</sup>Ina бага adinoetitiwaji!

Nigina ganioxoa degeo ane beyagitagadomi, oxoki. Odaa nige dinilaatibece, ixomagateenitedice icoatawece nigicoa aneotagadomi ane beyagi. <sup>4</sup>Degeo seete ane beyagitagadomi noko, odaa seete magaga igo makaamitaga, odaa meetagawa, ‘Ja idinilaatibece’, odaa ixomagateenitedice icoatawece nigicoa aneo ane beyagitagadomi.”

### Jesus diigaxinagatetece ica anodaagee gotiwagatakanegegi

<sup>5</sup>Nigijoa liigexedi jogodipokotalo Goniotagodi, odaa moditalo, “Goniotagodi, godaxawanegegi aleeni gotiwagatakanegegi.” <sup>6</sup>Odaa Goniotagodi jegeetediogi, “Nigokatecigini gatiwagatakanegegi, macataga nagana lolagi ‘mostaada’ ane dagaxa me lionawaana, odaa akatitiwaji me iigeni niale nelegi, me enitatiwaji, ‘Adinawaceni, odaa emii adinananti digoida miditaga akiidi-eliodi!’ Odaa nagada niale gadadiwagati.

### Libakedi ica niotagi

<sup>7</sup>Digica ganigepidigijo nigina akaamitiwaji anini gaotagi ane dibateloco nixogotagi, ogoa, migetaga yowie waxacocoli. Nigina naga dopitio me

icogoticogi nipodigi, migetaga enita? ‘Anagi, anicooti madi nameeja, aniodi.’ <sup>8</sup>Pida agenita! Pida бага enita, ‘Oenitomi iweenigi, codaa iikoeni gadowoodi manadeegitiwa iweenigi, aliitiwa nigepaa idiaadi me jiniodi, codaa me jacipe. Odaa nigidiaagidi bagakamaga adinediani maniodi, codaa macipe.’ <sup>9</sup>Aleeditibige me iniotagodeegata niotagi leegodi nigina meo nigina anoiigeta me yoe. <sup>10</sup>Odaa akaamitiwaji idaageni. Nigidiaagidi nigagoti mawiite icoatawece nigicoa anetigadiigenitalo mawiite, odaa enitiwaji, ‘Aleeditibige dogodiniotagodetogowa, leegodi oko niotagipi, codaa jaogate inokinoa niginoa anoniigetetedogowa me jaogate.’”

### **Jesus icilatidi deez goneleegiwadi dawace-loolatedi**

<sup>11</sup>Jesus egidaa diitedicogi me diniwajetedicogi manitaga nigotaga Jerusalém. Odaa inaagigotetece midiwa nipodaga Galiléia, aniaa Samaria. <sup>12</sup>Nigijo naga nipegi me dakatediwece aca nigotakawaana, odaa jigigotibeci odakapetege icoa deez goneleegiwadi dawace-loolatedi. Odaa ja dabiditiniwace, pida leegitiogi moyetecetedice Jesus. <sup>13</sup>Odaa ja napaawaga dinigetagateetibigiwaji, modi, “Jesus, Goniotagodi, godiwikodenegegi!”

<sup>14</sup>Nigijo Jesus naga naditediogi, odaa jegeetediogi, “Emii midiwataga sacerdotitedi, adinikeenitiogi naga gadicilitiwaji.” Odaa egidaa diiticogi mewaligitibigiwaji, codaagida naga nicilaga.

<sup>15</sup>Odaa ganigepidigica nigijoa goneleegiwadi naga nadi me ici, odaa ja dopitege Jesus, igedi me dotaga, dogetetibigimece Aneotedogoji. <sup>16</sup>Nigicotalo Jesus, odaa ja yamagatedini lokotidi lodoe, diniotagodetalo. Nigijo goneleegiwa ane diniotagodetalo, samaritaano. <sup>17</sup>Jesus mee, “Ijoa deez goneleegiwadi ane nicilaga. Odaa igame digetedigi ijoa eletidi noove? <sup>18</sup>Agodigicaeledi ane dopitijo me dogetetibigimece Aneotedogoji, pida tibiginiokini nigini ane daga godoiigi?” <sup>19</sup>Odaa Jesus jegeeteta, “Adabititini, odaagemii opili! Ja gadicili, leegodi me iwagati Aneotedogoji.”

### **Nigica noko Aneotedogoji nige iolatedicoace oko**

*(Mateus 24.23-28, 37-41)*

<sup>20</sup>Icoa fariseutedi jogoige Jesus ica Aneotedogoji nige iige inatawece nigina oko. Naga igidi, meetediogi, “Aneotedogoji aginatawece ikeetediogi nige limedi me iige laalegenali oko. <sup>21</sup>Agica anee, ‘Digawini! Goninionigi-eliodi etiniwa digoina!’ Ogoa, domigetaga ee, ‘Goninionigi-eliodi etiniwa digoidane!’ Igaataga Aneotedogoji iniwa me diigenataka catiwedi gadaalegenali.”

<sup>22</sup>Odaa jegeetediogi nigijo anodiotibece, “Icota meliodi memaani madatitace nigica noko Ee, Goneleegiwa ane jicogotibigimece ditibigimedi, nige janagi jiige inatawece iigo, pida agadatitiwaji. <sup>23</sup>Odaa niginaeledi oko moditagawa, ‘Digawini! Etiniwa digoida!’ Ogoa, migetogodi, ‘Etiniwa digoina!’ Pida jinegemiitiwaji, otegexaagaga iwitece. <sup>24</sup>Igaataga liciagi nalebepaga me ídi, me naloteloco ditibigimedi onidateci liwai nigepaageledi liwai, joanigidaagee nigica noko Ee,

Goneleegiwa ane jicogotibigimece ditibigimedi, nige janagi me jüigenataka. <sup>25</sup>Pida odoejeji, leeditibige me jawikode, codaa nigina oko niginoa nokododi agodibatigi.

<sup>26</sup>Nigica niciagi liciagi nigijoa nokododi Noé, nigijo jotigide, odaa jigidaagee nigicoa nokododi maleedaga idopitijo Ee, Goneleegiwa ane jicogotibigimece ditibigimedi. <sup>27</sup>Nigijo jotigide nigica oko niodaga, owacipeta viinyo, nadonaga, codaa moyajigo inoa lionaga me nadonaga. Odaa joanigidaagee negepaa nigijo noko Noé naga dakatiwece nagajo etogo-nelegi. Odaa negeno aboogoninyogodi, ja yaagadi ijotawece nigijo oko. <sup>28</sup>Eleditace jigidaagee nigicoa nokododi Ló, nigijo jotigide. Ica oko niodaga, owacipeta viinyo, oojeteege, oyaa elaanaga, codaa moyoe diimaga. <sup>29</sup>Pida nigijo noko Ló naga noditicogi nigotaga Sodoma, odaa Aneotedogoji jegeote menitelo noledi, codaa me wetiadi ane ídi, odaa ja nigodi ijotawece nigijo oko. <sup>30</sup>Joanigidaagee nigica noko Ee, Goneleegiwa ane jicogotibigimece ditibigimedi, nige idinikee.

<sup>31</sup>Nigica noko, nigijo ananipeti ditibigimedi ligeladi, ele me daga dinikatini me dakatiwece ligeladi daga dibatalo nigijo ane nepilidi anele, ade dinopagadi melodi. Odaa nigijo ane ideitice nipodigi agele daga dopitio daga dibatalo ane nepilidi. <sup>32</sup>Analakitibigetiawaji ane ninyaagi nagajo Ló lodawa! (Ane yeleo, leegodi me dinopagadi meo ane liigenatakaneegegi Aneotedogoji). <sup>33</sup>Nigina oko anidioka limedi me doletibige mepaa iige lewiga, nige yeleo, odaa jaganiatagigi. Pida nigina oko ane yeleo me Ee leegodi, odaa бага yewigatace nigidiaagidi. <sup>34</sup>Natigide jelogoditedagawatiawaji niginoa notaga anida ane jaogate. Nigica enoale itiwataale oko dinoomatewamigi, niotaga. Onijoteci oyadeegitibigi, idiaageledi бага nenyagati. <sup>35</sup>Iniwataale iwaalepodi onidi leyeema. Onaniteci oyadeegitibigi, aniaageledi бага nenyagati. <sup>36</sup>Itoataale goneleegiwadi nibaaga nipodigi. Odaa onidateci oyadeegitibigi, odaa idaageledi бага nenyagati.”

<sup>37</sup>Odaa nigijo anodiotibece jogoige, moditalo, “Goniotagodi, igamei nige jinataga ida niciagi?” Odaa jegeetedioji, “Anei anigidi émegegi, odaa jigidiaagi me dilapode opoedi.” (Odaa jigidaa me jowoogotaga ane digetigi ganigidi émegegi, leegodi me jinataga opoedi).

### Jesus yatemati ica natematigo ane yalagata ica goniwinogodi acaagaca wajekalo

**18** <sup>1</sup>Jesus yatemati ica natematigo ane godiigaxitece me leeditibige nigina oko midioka limedi me dogoibagitema moyotaganeege Aneotedogoji. <sup>2</sup>Odaa jegeetedioji, “Manitaga aca nigotaga onini ica goniwinogodi ane daga deemitetibige Aneotedogoji, codaa agica ane deemitetigi. <sup>3</sup>Nagani nigotaga onani aca wajekalo. Anidioka limedi me doletibige nigini goniwinogodi, dipokota me yaxawa, codaa idioka limedi meetibiga, ‘Adaxawani, codaa awii nigica ane ilagatice me jakapetege yaxakawa.’ <sup>4-5</sup>Igaanogowidi nokododi ixomagatedijo me daga ninigodi ane yemaa. Odaa nigidiaagidi epaa dinotaganeege, mee, ‘Digo aneji me daga idoitalo Aneotedogoji, codaa me digica ane jeemitetibige, jaxawa nagajo

wajekalo, leegodi jegeliodi me idigiwogotice. Daaditaga jaxawa, odaa idioka limedi me doletibigiji, pida jegeliodi me idigiwogotice.”

<sup>6</sup>Odaa Goniotagodi jegeetediogi, “Dige atacolitece lotaga nigijo goninogodi aigenaga. <sup>7</sup>Ajawienataka Aneotedogoji me yaxawa loiigi, anodipokotibigalo, noko codaa menoale, me yaxawatediogi, odaa eotetema nigica ane igenaga modakapetege laxakawepodi. Ogoa domige dinopagadi nige yaxawatediogi idi loiigi? <sup>8</sup>Pida ejitagawatiwaji me age me yaxawa, codaa meote ane igenaga modakapetege laxakawepodi. Odaa Ee, Goneleegiwa ane jicogotibigimece ditibigimedi, nige janagitace, migica jakadi oko anetidadiwagadi digoina iigo?”

**Jesus yatemati ica natematigo ane yalagata ica fariseu, icaagica ica ane dibatibigege ninyeelo ninionigi-eliodi romaanotedi**

<sup>9</sup>Jesus yatematitediogi icaeledi natematigo nigica oko anodiletibige daga dagaxa meletibigiwaji, pida inaagina anoiligoiticoaceeledi oko.

<sup>10</sup>Odaa jegee, “Icoa itoataale goneleegiwadi igotibeci Aneotedogoji ligeladi moyotaganege. Onijoteci fariseu, icaeledi baga nigina ane dibatibigege ninyeelo ninionigi-eliodi romaanotedi.

<sup>11</sup>Nigijo fariseu naga dabiditi odaa dinigetagee mepaa dinotaganege, mee, ‘Aneotedogoji, iniotagodetagawa, leegodi agee oko adodigomadaga, otegexaagaga ee oko ane daga igenaga, otegexaagaga ee oko ane itinege lodawaeledi, digo ane niginoaletidi goneleegiwadi. Eleditace iniotagodetagawa aiciagi nigida goneleegiwa ane dibatibigege ninyeelo ninionigi-eliodi romaanotedi. <sup>12</sup>Idinatita nigigi itoataale nokododi inoatawece domiingotedi, codaa me inidiizimo jajigotagawa.’

<sup>13</sup>Nigijo ane dibatibigege ninyeelo ninionigi-eliodi romaanotedi, idiaagaga itice, pida agipegetege. Odaa otegexaagaga iwitibigimece ditibigimedi. Pida yabaketibigeloco elipije me ikee magecagalo, odaa jegee, ‘Aneotedogoji, adiwikodeni, leegodi eemoda abeyacegegi.’ <sup>14</sup>Ejitagawatiwaji, nigijo goneleegiwa nogopiticogi minitaga ligeladi, Aneotedogoji jegeote me igenaga. Pida nigijoeledi Aneotedogoji ageote me igenaga. Leegodi nigijo oneo mida ane jaoga, icota moyame, pida nigijo ane diniwikodetibece, Aneotedogoji icota me iwenigide.”

**Jesus dibatetege nigaanigipawaanigi**  
(*Mateus 19.13-15; Marcos 10.13-16*)

<sup>15</sup>Ica noko eliodi oko oyadeegi nigaanigipawaanigi midoataga Jesus, owotibige me dibatedeloco me ibinie. Pida nigijo anodiotibece nogonadi, odaa jogoyolitege nigijo anonadeegi nigaanigipawaanigi. <sup>16</sup>Pida Jesus eniditediogi nigijo nigaanigipawaanigi mototalo, odaa jegee, “Ikani nigina nigaanigipawaanigi menagitibeci meetaga, codaa jinogoliitege, leegodi Aneotedogoji iige laalegenali nigina ane liciagi nigina nigaanigipawaanigi. <sup>17</sup>Ejitagawatiwaji nigina anewi, nigina ane ikatece Aneotedogoji me iige laalegena, liciagi nigina



nigaanigawaanigi me dibatege nigina anodita, odaa nigini oko бага yakadi me dakatiwece Aneotedogoji aneitedice digoida ditibigimedi.”

**Ica goneleegiwa liico**

*(Mateus 19.16-30; Marcos 10.17-31)*

<sup>18</sup>Ica goneleegiwa ane lacilo judeutedi, igo ige Jesus, meetalo, “Goniigaxinogodi anele, amiida ica ane leeditibige me jao, odaa jigidaa yewiga digoida ditibigimedi miniwataga Aneotedogoji?” <sup>19</sup>Jesus naga igidi, meeteta, “Igame leegodi ina menitiwa me Ee ele? Oniniwatece Aneotedogoji mele, agica eledi anele. <sup>20</sup>Codaa nogowoogoti ijoa liigenatakanegeco Aneotedogoji, anodi, ‘Jinagaolagatakani, jinaga aijee, jinogolice, jiniginaaleni eledi oko. Codaa eemiteetibige gadiodi, codaa me gadiodo.” <sup>21</sup>Odaa nigijo goneleegiwa mee, “Nigijo maleege nigaanigawaanigi naga jeemitetibige ijoatawece nigijoa liigenatakanegeco Aneotedogoji.”

<sup>22</sup>Nigijo Jesus naga wajipateta nigijoa lotaga, odaa jegeete, “Egidaa ananiaditibige mawii. Aani idiwatawece nigicoa ane ganepilidi, odaa edianitiniwace madewetedi ganinyeelo. Odaa jagakati ganiliicagajetecidi digoida ditibigimedi. Odaa nigidiaagidi odaaganagi, aniwitici!”

<sup>23</sup>Nigijo goneleegiwa naga wajipatalo nigijoa lotaga Jesus, odaa eliodi magecagalo, leegodi owidi nigicoa nilicagajetecidi.

<sup>24</sup>Jesus nadi meliodi magecagalo, odaa jegee, “Ica me dakake niginoa liicotedi moika Aneotedogoji me iige laalegenali. <sup>25</sup>Agica lagaliigi gameelo me ixomagatiwece etakado libegi. Pida бага dakake goneleegiwa liico me ikatece Aneotedogoji me iige laalegena.”

<sup>26</sup>Nigijo anowajipatalo nigijoa lotaga ja nigikanaga, modi, “Enice, amiijo ica ane yakadi midioka limedi me yewiga miniwataga Aneotedogoji?” <sup>27</sup>Odaa Jesus meetediogi, “Nigina anoyakadi nigina oko me digica nimawenegegi moyoe, pida Aneotedogoji bigida nimawenegegitetece me yoe.”

<sup>28</sup>Odaa Pedro mee, “Digawini! Ja jikanagatedice ijoatawece ane gonepilidi, odaa ja jiwagatibigagadici.” <sup>29</sup>Odaa Jesus meetediogi, “Ejitagawatiwaji nigina anewi, inatawece oko ane dagadiaagewianaga niwita ligeladi, eliododipi, nioxoadipi, lodawa, idiaa lionigipi, meotibige me iige Aneotedogoji laalegenali nigina eledi oko, <sup>30</sup>Nigidi Aneotedogoji yajigotediogi caticedi nigijoa baanogoikatedice, nigina malee newiga digoina, codaa aagageote nigina oko midioka limedi me newiga miniwataga digoida ditibigimedi.”

**Jesus eetacetece lawikodico anicotece nigidiaagidi**

*(Mateus 20.17-19; Marcos 10.32-34)*

<sup>31</sup>Jesus yadeegi ijokijo nigijo anodiotibece, odaa meetediogi, “Digawini! Jiginiga Jerusalém, odaa digoida jigidiaagi nige jawikode, Ee, Goneleegiwa ane jicogotibigimece ditibigimedi, icotece nigicoa anoiditedini, nigijo anoyelogoditedibece Aneotedogoji lowooko nigijo jotigide aneetici.

<sup>32</sup>Etidajigotiogi nigidi ane daga judeutedi, odaa oyametibigiji, etidiweenigetice, codaa metidawaletice. <sup>33</sup>Etidalaketigi, odaa nigidaagidi jegetideloadi. Pida nige ixomagatedice itoatadigida nokododi, odaa ja idewigatace.”

<sup>34</sup>Nigijo anodiotibece agoyowoogodi nigijoa Jesus lotaga. Oyagaditema nigica ane diitigilo nigijoa lotaga, odaa agoyowoogodi nigica Jesus aneyatedigi ligegi.

### **Jesus icilatidi ica golaga awikotaagi**

*(Mateus 20.29-34; Marcos 10.46-55)*

<sup>35</sup>Jesus nigipegitedio nigotaga Jericó. Odaa onini ica goneleegiwa etoinaga nicotinece liniogotibece naigi, dipokotibige dinyeelo. <sup>36</sup>Nigina me wajipatece nigina noiigi me ixomagatijo, odaa ja digika, digikatece anigina ica ane enagi. <sup>37</sup>Odaa modita, “Jesus nigijoa ane icogotedicogi Nazaré, inaagenagitetece digoina!” <sup>38</sup>Odaa dinigetagatee me dapaawe, mee, “Jesus, anida anenitege licogegi Davi, adiwikodenita!” <sup>39</sup>Odaa nigijo noiigi ane dinewadetibigiwaji jogoyoxogo nigijo golaga, domogoiige me notoko. Pida jegepaanaga dapaawe, mee, “Akaami anida anenitege licogegi Davi, adiwikodenita!” <sup>40</sup>Odaa Jesus ja dabiditedi, ja diigenatakate monadeegitalo nigijo golaga. Naga nipegitalo, odaa Jesus ja ige, meeteta, <sup>41</sup>“Amiina ica anemaani mejigotagawa?” Odaa jegee, “Iniotagodi, jema me jatetibece.” <sup>42</sup>Odaa Jesus jegeete, “Anoleetice, odaa jagatenitibece! Aneotedogoji gadicilatiti, leegodi madinakatoni.” <sup>43</sup>Odaa agica daga leegi, nigijo goneleegiwa ja yatetibece, odaa ja dietece Jesus, codaa dogetetibigimece Aneotedogoji. Odaa ijotawece nigijo noiigi-nelegi nogonadi nigijo Jesus loenatagi, odaa jogodogetetibigimece Aneotedogoji.

### **Jesus igo aniodi Zaqueu ligeladi**

**19** <sup>1</sup>Jesus dakatediwece nigotaga Jericó, yakagiditedeloco nagani nigotaga. <sup>2</sup>Onini ica goneleegiwa liboonagadi Zaqueu, lacilo nigijo anodibatibigege ninyeelo ninionigi-eliodi romaanotedi. Zaqueu one liico. <sup>3</sup>Odaa domaga yemaa me nadi anidoa icoa Jesus, pida ayakadi me nadi leegodi nigidi noiigi, ibeyacagadi me dagaxa moxiigotawaanigi. <sup>4</sup>Odaa jona walokoditicogi lodoe nigidi noiigi, odaa ja dalagatetibigimece aca niale, fiigoigo loidena, eotibige me yakadi me nadi Jesus, leegodi idiaagigotetece digoida aneitice me dalagate.

<sup>5</sup>Nigijo Jesus nigicotedicogi digoida aneitice, naga iwitedibigimece ditibigimedi, odaa jegeeteta, “Zaqueu, adinageni madaxotiti, igataga leeditibige midiaagejo gadigeladi nigina noko.” <sup>6</sup>Odaa ja yediiga me waxoditice, odaa ja dibatege Jesus digoida ligeladi, codaa eliodi me ninitibece. <sup>7</sup>Ijotawece nigijo anonadi Jesus me lixigagawa Zaqueu, dinoxatiwage, modi, “Igo aniodi digoida ligeladi nigijo goneleegiwa anowidi libeyacegeco.”

<sup>8</sup>Naga dabiditi Zaqueu, odaa jegeetalo Goniotagodi, “Digawini, Iniotagodi! Natigide jajigotiogi madewetedi liwigotigi inoa ane inepilidi. Pida nigica ane jinaale me inoga ninyeelo, jopilagaditace cwaatolo mopitibigeloco nigijoa



(Lucas 19.5)

dinyeelo ane jibanootece.”<sup>9</sup>Odaa Jesus jegeeteta, “Nigina noko Aneotedogoji eote nigina oko ane ligeladi nigina diimigi midioka limedi me newiga miniwataga. Igaataga akaami eledi ida anenitege ane licogegi mijotaga Abraão.”<sup>10</sup>Igaataga Ee, Goneleegiwa ane jicogotibigimece ditibigimedi, janagitiogi me jao lewiga miniwataga Aneotedogoji nigijo aniatagigipi, codaa me ane leegitalo moyototedice Aneotedogoji.”

**Jesus yatemati icoa deez beexotedi oolo**

(Mateus 25.14-30)

<sup>11</sup>Odaa nigijo noiigi nogowajipatalo ijoa lotaga, odaa Jesus ja yatemati ica natematigo ane godiigaxi. Nigijo nogodipegita Jerusalém, odaa jogodiletibige daantaga nipegi ica nige iige Aneotedogoji inatawece oko.

Joanigidaa leegodi Jesus naga yatemati nigida natematigo. <sup>12</sup>Mee, “Onini ica goneleegiwa ica loiigiwepodi one niginoa gonegaga. One igo miditaga eledi iigo digoida ditigedi, eotibige moixotio me ninionigi-eliodi nigidi epaa nipodigi. Odaa ja dopitijo. <sup>13</sup>Anigicatibige daga diniwaje, odaa jegeniditioigi deez liimetedi. Odaa yajigota oninicebeci onaniteci beexo oolo, odaa meetiogi, ‘Abakeni niginoa dinyeelo bidige owidi nigepaa idopitijo.’ <sup>14</sup>Pida nigidi loiigi ane ideitice miditaga niigo agoyemaa me ninionigi-eliodi. Odaa jogoiomagaditicoace icoa goneleegiwadi, odaa jogoiigeticoigi nigidi oko me igotibeci digoida miditaga eledi iigo moyelogodita nigijo ane domaga ixotio nigijo goneleegiwa me inionigi-eliodi. Oyelogodita me dogoyemaa nigijo goneleegiwa ane domaga ixotio me ninionigi-eliodi nigidi noiigi.

<sup>15</sup>Nigijo goneleegiwa naga dopitijo, ja ninionigi-eliodi nigijo ane daga domogoyemaa. Nigijo naga dopitijo, odaa jegeniditioigi nigijoa liimetedipi ane yajigotioigi ninyeelo, leegodi yemaa me yowoogodi nigica ane liwokodi dinyeelo anowote moibake nigijoa beexotedi oolo. <sup>16</sup>Nigijo odoejegi limeedi negenota, meeta, ‘Iniotagodi, jakaditedagadomi deez beexotedi me jibake nagajo beexo ananajicitiwa.’ <sup>17</sup>Odaa nigijo inionigi-eliodi meeta, ‘Jigidiaagi! Akaami nimeedi anele! Jaganikeenitiwa me jakadi me gadinakatoni, mele mawii nigijo ane jajigotagawa me gabaketawaanigi. Joanigidaa leegodi gadixomitio me iigeni deez nigotadi.’ <sup>18</sup>Odaa nigijo eledi limeedi nagaga enota, meeta, ‘Iniotagodi, jakaditedagadomi ciinco beexotedi me jibake nagajo ananajicitiwa beexo.’ <sup>19</sup>Odaa jagaga eeta nigijo ninionigi-eliodi, ‘Jigidiaagi! Jajigotagawa me iigeni ciinco nigotadi.’

<sup>20</sup>Odaa nigijo eledi nimeedi nagaga enota, meeta, ‘Digawini, Iniotagodi! Etani nagajo ganibeexo. Jilipaditigi leenxo, odaa ja jotete. <sup>21</sup>Igaataga idoitagawa, leegodi makaami goneleegiwa ane dakake laalegena. Akati manogaa nigina ane daga ganebi, codaa anopilagatitio ane daga gatanigijegi.’ <sup>22</sup>Odaa nigijo inionigi-eliodi meeta, ‘Akaami nimeedi ane beyagi! Niginoa gadotaga ja ikee makaami beyagi. Owoogoti me ee goneleegiwa ane dakake laalegena, me inoga ane daga inebi, codaa inopilagaditio nigina ane daga eyanigijegi. <sup>23</sup>Enice, igaamee dagajicitiogi ijoa ininyeelo nigina anonadila dinyeelo modoletibige me gaanyaga? Dagajicitiogi, odaa naga idopitijo, otagaga jibatacege ininyeelo codaa me nigicoa ane ganigaanye.’

<sup>24</sup>Odaa nigijo inionigi-eliodi jegeetioigi nigijo anowalitibigege nigica ligegi, meetiogi, ‘Anogaa nagani nibeexo, odaa ajicitiogi nigijo anidiwa deez nibeexotedi.’ <sup>25</sup>Odaa jogodita, ‘Pida Goniotagodi, jigidiwa deez nibeexotedi.’ <sup>26</sup>Odaa jegee, ‘De jelogoditagawatiwaji, nigijo anidiwa, odaa alee dibatege eletidi. Pida nigijo ane digicoa, icaagica onatecigidi ane nebi pida oibanotece. <sup>27</sup>Natigide, anadeegitediwa nigicoa idelagawepodi ane daga domogoyemaa me ee ninionigi-eliodi, odaa anigoti digoina yodoe.’”

**Jesus dakatediwece nigotaga Jerusalém**  
(Mateus 21.1-11; Marcos 11.1-11; João 12.12-19)

<sup>28</sup>Nigijjo Jesus negee nigijjoa lotaga, odaa ja dinewade, dalagatetedibigimece nalagate Jerusalém. <sup>29</sup>Naga icotediogi icoa nigotadawaanaga ane liboonagadi Betfagé, aniaa Betânia, anipegitiwage odipegitege ica lojotagadi ane liboonagadi “Lojotagadi Oliveira”. Nigijjo nigipegitediogi, odaa ja iige itoataale nigijjo anodiotibece. <sup>30</sup>Meetediogi, “Emii nigeepaa midiwataga nigotadawaanaga digoida gododoe. Nigakaatiotiwaji, odaa jagakati bollicawaanigi dinigoetini, analeedigica mowaxoditeloco. Owileceni ini bollicawaanigi, odaa anadeegiticogi digoina meetaga. <sup>31</sup>Nigica ane gadigeeiwaji, nigeetagawa, ‘Igaamenitiwaji ina mowileceni ini bollicawaanigi?’ Odaa enita, ‘Jowilecenaga ini bollicawaanigi leegodi Goniotagodi yopotedibige.’”

<sup>32</sup>Odaa jigigotibeci nigijjo ane iigetedibigiwaji, odaa jogoyakadi nigijjo aneyatedigi Jesus ligegi. <sup>33</sup>Nigijjo naga oikatice nigijjo bollicawaanigi, odaa nigica ane nebi ja nigikanaga, modi, “Igame leegodi ina mowileceni ini bollicawaanigi?” <sup>34</sup>Odaa jogoigidi, modita, “Jowilecenaga nigini bollicawaanigi leegodi Goniotagodi yopotedibige.” <sup>35</sup>Odaa jogoyadeegi bollicawaanigi midoataga Jesus, nigidiaagidi jogoyexagateloce nijayogoli lelága nigijjo bollicawaanigi. Odaa jogoyadodi Jesus me waxoditedibige. <sup>36</sup>Igaanaga onaditege Jesus, odaa nigidi noiigi oipecetiniigi iigo nijayogoli naigitinece, owotibige moikee moiwenigide.

<sup>37</sup>Nigipegitedio nigotaga Jerusalém, naga idinikanagatinece minitaga lojotagadi aninoa icoa nialeli “oliveira”, anodita “Lojotagadi Oliveira”. Nigijjo nigico nigica noiigi-nelegi anodiotibece ninitibigiwaji, odigaanagatibigimece Aneotedogoji me dinigetagateetibigiwaji leegodi ijoatawece nigijjoa godoxicegetedi libinienaga baanigijjo monadi. <sup>38</sup>Odaa modi nigijjo noiigi, “Jemaanaga Aneotedogoji meote aneletema niginiwa inionigi-eliodi anida nagatetigi aneitelogo Liboonagadi Goniotagodi Aneotedogoji. Inoatawece aninoa digoida ditibigimedi idioka limedi me ilagatiwage. Jogeegatibigimece ane ideitedice ditibigimedi.”

<sup>39</sup>Odaa onicoa icoa fariseutedi, anidiaagi liwigotigi nigidi noiigi-nelegi, onoditalo Jesus, “Niigaxinaganaga! Oxoki nigidi anodiotibigadici leegodi niginoa lotaga.” (Leegodi agoyemaa modi Jesus me inionigi-eliodi.) <sup>40</sup>Odaa ja igidi, meetediogi, “Ejitagawatiwaji daga notokotiniwace, odaa niginoa wetiadi jagaga napaawagateloce modogetetibigimece Aneotedogoji!”

**Jesus anoe leegodi me iwikode nigeladimigipitigi Jerusalém**

<sup>41</sup>Nigijjo Jesus nigipegite nigotaga, naga naditeta nagani nigotaga, odaa jaganoe leegodi ane ninyaagi nigidiaagidi nigidi nigeladimigipitigi nigotaga. <sup>42</sup>Odaa jeege, “Nigida me Ee domaga jemaa mowoogoti nigina noko nigica ane leeditibige mawii makatitiwaji Aneotedogoji me dagalee yelatedagadomi. Pida nigina natigide agaleegakatitiwaji manati nigica

ane leeditibige mawii. <sup>43</sup>Leegodi icotalo nokododi gadaxakawepodi onojotagadi iigo moyolitagagitiwaji manotiticogi we nigotaga. Jigidaagee nigonoxocotagagitiwaji, etigadiligiceniwaji inoatawece gawailidi. <sup>44</sup>Odaa jogoyaagadi anitawece ganigotagatiwaji, codaa makaamitawece anakaami nigeladimigipi. Odaa agaca nenyagati otaganitece wetiga ane waxoditeloco eledi, leegodi agemaani mowoogoti Nigijoa Aneotedogoji ane niige me dalitagawatiwaji Liigexegi me domegeotedagadomi anele.”

**Ica Jesus aneote digoida Aneotedogoji ligeladi**  
(*Mateus 21.12-17; Marcos 11.15-19; João 2.13-22*)

<sup>45</sup>Jesus naga dakatediwece Aneotedogoji ligeladi, odaa ja niticoitedicoace icoa anoojetekaga anidiaagite. <sup>46</sup>Odaa jegeetediogi, “Lotaganagaxi Aneotedogoji diniditeloco nigica Aneotedogoji ane ligegi, nigijo negee, ‘Igeladi jigidiaa ite nigina oko ane etidotaganee.’ Pida jagademiitiwaji ligeladi micataga daga latecagadi olicagaga.”

<sup>47</sup>Jesus one diigaxinaga minitaga Aneotedogoji ligeladi icoatawece nigicoa nokododi. Odaa nigijoa sacerdotitedi ijaagijo anodiigaxinagatece lajoinaganeegeco Aneotedogoji, ijaagijo nigijo anoiige judeutedi, jogodoletibige moyeloadi Jesus. <sup>48</sup>Pida agica nimawenegegi, leegodi iditawece oko watacotibigiwaji, mowajipatalo lotaga Jesus.

**Ica ane icogoticogi nagatetigi Jesus me iticoitedicoace nigijo anoojetekaga minitaga Aneotedogoji ligeladi**  
(*Mateus 21.23-27; Marcos 11.27-33*)

**20** <sup>1</sup>Ica noko Jesus idiaagite Aneotedogoji ligeladi, odaa niigaxitediniwace ica noiigi, yelogoditediogi nigicoa nibodicetedi anele ane icogotedibigimece miniwataga Aneotedogoji. Odaa jogototalo nigijo anoiige sacerdotitedi, codaa me nigijo anodiigaxinagatece icoa lajoinaganeegeco Moisés, ijaagijoa icoa laxokodi goneleegiwadi, lacilodi noiigi judeutedi. <sup>2</sup>Odaa jogoige, moditalo, “Igame icogoticogi ica ganagatetigi mawiite inoa gadoenataka? Codaa amiijo ica ane yajigotagawa ganagatetigi me yakadi mawiite inoa gadoenataka?”

<sup>3</sup>Jesus ja igidi, meetediogi, “Ee aagaga gadigeetiawaji, odaa jema madigiti. <sup>4</sup>Amiijo ica ane niige João me nilegetiniwace oko? Aneotedogoji niige? Ogoa, goneleegiwadi oniige?” <sup>5</sup>Odaa jigidiaa dinotaganeegetiwage, modi, “Daga jigitaga me Aneotedogoji niwakatee João me dilegenaga, odaa jegeetedogowa, ‘Joanigidaagee igatime leegodi ina digiwagatiteda icoa aneetedagawa João?’ <sup>6</sup>Pida degejinaga me goneleegiwadi oniige, odaa nigina noiigi-nelegi jogonokoletogoloco wetiadi, leegodi oyiwagadi João minaagina ina ane yelogoditedibece Aneotedogoji lowooko.” <sup>7</sup>Odaa jogoigidi Jesus, moditalo me dogoyowoogodi nigica ane yajigota João nagatetigi me nilegetiniwace oko. <sup>8</sup>Odaa Jesus jegee, “Ee eleditiwaji ajelogoditagawa nigica ane najigotiwa inagatetigi me jakadi me jaote niginoa yoenataka.”

**Jesus yatemati natematigigi icoa nawodaganadi abeyacagaga**  
(*Mateus 21.33-46; Marcos 12.1-12*)

<sup>9</sup>Nigidiaagidi Jesus ja yatematidediogi nigidi noiigi nigida natematigo anida ane godiigaxitece, odaa jegee, “Ica goneleegiwa eyatedi ‘uuva’ libatatiidi miditaga lixogotagi. Odaa ja dinilakidetege icoa goneleegiwadi modoweditelogo, odaa ja noditice, igo eledi iigo, ica ditigedi, odaa leegi midiaagi. <sup>10</sup>Nigicota ica limedi monopilagaditedio lawodigijedi, odaa ja iige onijoteci liotagi me dibatege liwai nigica baanaga odinilakidetigi. Pida nigijoa goneleegiwadi anodoweditelogo onaxacogotibige nigijo liotagi, oiige mopi, me digicata ane yadeegi. <sup>11</sup>Nigijo ane nebi nixogotagi ja iige eledi liotagi. Pida idaagodigota onaxacogotibige, onietibige, codaa moiige mopi me digicata ane yadeegi. <sup>12</sup>Odaa ja niwakatee eledi liotagi. Pida nigijo liotagi oyacilotidi, odaa jogoyokoleticogi wetice nigidiwa nawodigijedi anoniotaa.

<sup>13</sup>Odaa nigijo ane nepilidi nigijoa nawodigijedi meetigi le, ‘Amigaleegini ica inimawenegegi? Natigide jiige nigini ionigi yemaanigi. Ijoatibige dogodeemitetibige.’ <sup>14</sup>Pida nigijo anodoweditelogo nigijoa nawodigijedi nogonaditege lionigi nigijo ane nepilidi nawodigijedi, odaa modi, ‘Nigina nigijo lionigi nigijo ane nepilidi nawodigijedi, jiginaa nyenyagatema nawodigijedi, nige yeleo eliodi. Ele me jeloataga, odaa niginoa nawodigijedi ja gonepilidi.’ <sup>15</sup>Odaa jogoyokoleticogi we nigidiwa nawodigijedi, odaa jogoyeloadi.

Natigide, amiini ica anakatitecetiwaji ijo ane nepilidi idiwa nawodigijedi migotioigi idi anoyeloadi lionigi? <sup>16</sup>Enagi, odaa ja nigodi nigidi anodoweditelogo nawodigijedi. Odaa ja yajigotioigi nigidiwa nawodigijedi eletidi goneleegiwadi modoweditelogo.” Nigijo noiigi nogowajipata nigida natematigo, odaa modi, “Inibeonagatege Aneotedogoji me daga ikateda micota nigida niciagi.”

<sup>17</sup>Jesus naga iwitediogi, odaa jegee, “Enice, amiini ica aneetece ijo liwai ajo Aneotedogoji lotaganagaxi anee,

‘Nagajo wetiga ane digica mowo,  
nigijo anoyoe diimigi,  
ajaagajo nagajo wetiga dinoe me wetiga ane dagaxa mida anowo  
mini diimigi,  
catedi nigidiwa eletidi wetiadi anoibake?’

(Leegodi jaganiaa dowediteloco initawece nigini diimigi.)

<sup>18</sup>Nigina oko ane dixipeteloco nagani wetiga, oninoateci liwailidi yeyagatedice. Codaa nagani wetiga degeniteloco oko, iopaagadi.”

**Oigetece Jesus nigijoa dinyeelo ane leeditibige moyediatece nigijo  
ninionigi-eliodi romaanotedi**  
(*Mateus 22.15-22; Marcos 12.13-17*)

<sup>19</sup>Nigijo anodiigaxinagatece lajoinaganegeco Moisés ijaagijo nigijo anoiige sacerdotidedi, oyowoogodi nigidiaageetediogi Jesus, nigijo naga yatemati

nigida natematigo. Odaa jogodoletibige moniwilo aniaagani nagaca lakata, pida agica loenatagi leegodi odoitogi nigidi noiigi. <sup>20</sup>Odaa jogoigoaditalo Jesus, nigidiaagidi jogoiige goneleegiwadi modinanatigi nigina oko ane igenaga moigoaditalo Jesus, codaa monigetedice, odoletibige modibatalo oyatitalo lotaga. Domogoyemaa mica ica anoyatigi ligegi modakapetege Jesus, domogowotibige moyakadi moyajigo minitaga ninionigi-eliodi romaanotedi, moiloikatidi Jesus. <sup>21</sup>Nigijoa goneleegiwadi niigexedi jogoige Jesus, moditalo, “Goniigaxinogodi, jowoogotaga melogoti anewi, codaa me iigaxinaganitece anewi. Codaa jowoogotaga me dagawii gademaani oko daga leegodi mida ane jaoga. Pida ewi me iigaxinaganitece nigica Aneotedogoji ane yemaa mowo nigina oko. <sup>22</sup>Natigide digawini, domige godiige inoa gonajoinaganegeco me jajicagata César dinyeelo, nigijo ninionigi-eliodi romaanotedi ane godiigeta me jedianaga? Ogoa, domige etigodoli inoa gonajoinaganegeco me jedianaga?”

<sup>23</sup>Pida Jesus yowoogodi modoletigi mowotema ane beyagi modakapetege. Odaa jegee, <sup>24</sup>“Awii anikeenitiwa beexo romaanexe. Ame liwigo aniwoteloce ani beexo, codaa ame liboonagadi ane diniditeloce ani beexo?” Odaa jogodi, “César.” <sup>25</sup>Odaa Jesus jegee, “Enice, ediani César nigica ane leeditibige medianitece, codaa ajicitalo Aneotedogoji nigica ane leeditibige medianitece.”

<sup>26</sup>Odaa agoyakadi modi mica ligegi Jesus ane beyagi lodoe nigidi noiigi. Codaa eliodi moyopo ane eyatedigi ligegi me igiditediogi. Joanigidaa leegodi modaa notokotiniwace.

### Oigetece Jesus ica anodaagee nigina oko ica nige newigatace

(*Mateus 22.23-33; Marcos 12.18-27*)

<sup>27</sup>Icoa saduceutedi aonogoyiwagadi micota me newigatace nigijoo baanaga nigo, odaa onica anototalo Jesus, moige, <sup>28</sup>Moditalo, “Goniigaxinogodi, nigijoo Moisés naga idi nigijoo gonajoinaganegeco, mee me iditedini, ‘Digica goneleegiwa ane yeleo nenyagaditi lodawa me digica lionigi, odaa leeditibige nioxoa me lodawa nagajo wajekalo amaleegaga icoa lionaga. Odaa nigidi lionigipi ja micataga daga lionigipi nigijoo baanaga yeleo.’ <sup>29</sup>Pida onicoa seete dinioxomigi. Odaa nigica liidaga jona wado. Pida anigica lionigi naga yeleo. <sup>30</sup>Odaa nigijoo liigejetewa ja lodawa nagajo wajekalo. Pida jagaga yeleo maleedigica lionigi. <sup>31</sup>Nigidiaagidi nigijoo aagaga liigejetewa jagaga lodawa ajaagajo nagajo wajekalo. Pidaeledi yeleo. Odaa joanigidaagee ijotawece nigijoo seete dinioxomigi nodawa ajokajo iwaalo, codaa ijotawece nigo maleedigica lionigi. <sup>32</sup>Nigidiaagidi nagajo iwaalo jagaga yeleo. <sup>33</sup>Odaa nigica noko nige newigatace émagaga, amigepidigica nigijoo seete dinioxomigi baga lodawa ajo iwaalo? Igaataga ijotawece nodawa ajokajo iwaalo.”

<sup>34</sup>Jesus naga igidi, meetediogi, “Nigina oko anida aneetege nigina iigo nadonaga, odaa jiginoa lionaga, odaa jagaga nadonaga niginoa lionaga. <sup>35</sup>Pida nigina Aneotedogoji aneote me yewigatace leegodi me igenagatibigiwaji, nige newigatace, agalee nadonaga. <sup>36</sup>Pida ja liciaco aanjotedi, agalee yakadi daga nigo. Ja lionaga Aneotedogoji leegodi jegaageote naga newigatace.



<sup>37</sup>Codaa ijaagijo Moisés ikee nigijoa émagaga me newigatace. Nigijo naga iditini me yalagata nagajo nialawaana ane ídi, pida ayabidi. Iditini yalagatalo Goniotagodi Aneotedogoji niginiaa, ‘Noenogodi Abraão, Noenogodi Isaque, codaa me Noenogodi Jacó.’ <sup>38</sup>Odaa leegodi nigidiwa notaga, ja jowoogotaga me daga Noenogoditeda émagaga, pida Noenogodi nigina oko anidi me newiga. Leegodi lodoe Aneotedogoji iditawece newiga.”

<sup>39</sup>Nigidiaagidi icoa anodiigaxinagatece lajoinaganegeco Moisés moditalo Jesus, “Goniigaxinogodi, ica mele motagani!” <sup>40</sup>Owo nigida ligegi leegodi nigijoa saduceutedi agaleegabo laalegena mowote eletidi ligikanegeco midoataga Jesus.

**Jesus digikatedigi Nigijoa ane niige Aneotedogoji me godewikatidi**  
(*Mateus 22.41-46; Marcos 12.35-37*)

<sup>41</sup>Jesus digika, meetediogi, “Ica Aneotedogoji ane niwakatee me yewikatidi oko, igame leegodi ina oko modi mida aneetege licogegi Davi? <sup>42-43</sup>Igaataga ijaagijo Davi mee miditaga liwai Aneotedogoji lotaganagaxi anodita Enaco, mee me iditeloco,

‘Goniotagodi Aneotedogoji meeteta Iniotagodi,  
“Anicootini iwai ibaagadi me jiigenatakanaga,  
nigepaagicota me jigeke ganelogododipi.” ’

<sup>44</sup>Davi nigeetalo me Niotagodi, odaa igaamee ina me yakadi ica ane niige Aneotedogoji mida aneetege licogegi Davi?”

**Jesus yalagata nigijo anodiigaxinagatece lajoinaganegeco Moisés**  
(*Mateus 23.1-36; Marcos 12.38-40*)

<sup>45</sup>Nigijo noiigi owajipatalo Jesus, negeetediodigi nigijo anodiotibece, <sup>46</sup>“Anidakitiodigi nigina anodiigaxinagatece lajoinaganegeco Moisés. Lemaanigi nigina mewaligitibigiwaji, modinixotinigilo nijayogoli nigina oko gonegegi. Eleditace lemaanigi nigina oko modeemitetibige monice miditaga ane latecagaditibece oko. Codaa lemaanigi monicoteloco nibaanco nigina oko gonegegi midiwataga niiakanagaxiidi, codaa nigina migotibeci naloogo, odoletibige limedi nigina anele. <sup>47</sup>Pida oninaaletiniwace wajekalodi, odaa jogodoliceta anigidi lowoodagagi anele, codaa lemaanigi me dinikeenaganegemo moyotaganegemo Aneotedogoji. Pida Aneotedogoji icota meliodi me iloikatidi.”

**Aca wajekalo madewete ane yajigotalo Aneotedogoji iniodataale**  
**beexotedawaanaga**  
(*Marcos 12.41-44*)

**21** <sup>1</sup>Jesus iwitediodigi ica oko minitaga Aneotedogoji ligeladi. Odaa naditediodigi nigijoa liicotedi nogoyokoletinigi ninyeelo nagajo niwokodagaxi Aneotedogoji. <sup>2</sup>Odaa aagaga nadi nagajo wajekalo madewete magaga yokoletinigi madi iwokodagaxi iniwataale beexotedawaanaga. <sup>3</sup>Odaa Jesus jeege, “Ejitagawatiwaji nigina anewi. Nagani wajekalo

madewete yajigotalo Aneotedogoji caticedi anoyajigo nigijo eledi oko. <sup>4</sup>Leegodi nigijo eledi oko oyajigo niginoa ane iigotedice ninyeelo. Pida nagani wajekalo digo anee me dagaxa me madewete, pida yajigotalo Aneotedogoji ijoatawece nigijoa ane domaga yopotibige me yewiga.”

**Jesus yalagate micota moyojiketini Aneotedogoji ligeladi**  
(*Mateus 24.1-2; Marcos 13.1-2*)

<sup>5</sup>Nigijo anodiotibece notaganagateloco oyalagata Aneotedogoji ligeladi, oyakadi ica me dagaxa me libinienigi, icoa niwetiadi libinienaga, codaa owidi nigicoa eletidi elomagajetecidi libinienaga nigini diimigi anoibootalo Aneotedogoji nigica noiigi. Odaa Jesus jegee, <sup>6</sup>“Icota noko nigini diimigi libinienigi ananatitiwaji icota moyaaagadi. Odaa agaca nenyagatini otaganitece wetiga ane waxoditeloco eledi wetiga.”

<sup>7</sup>Odaa jogoige Jesus, moditalo, “Goniigaxinogodi, igaatigi ica nige jinataga ida niciagi? Amiida ica Aneotedogoji loenatagi me nikeetedogowa ica nige limedi ida niciagi anenita?”

**Nigina anodiatece Jesus nigidiaagidi nawikodeega, codaa moiatetibeci**  
(*Mateus 24.3-14; Marcos 13.3-13*)

<sup>8</sup>Odaa Jesus mee, “Adinowetitiwaji! Adigica ane gadinaaleni, leegodi eliodi oko odinanatibigiji, modi, ‘Ee liigexegi Aneotedogoji’, ogoa, domigodi, ‘Jigicota noko Goniotagodi.’ Pida jinigiwitecetiwaji. <sup>9</sup>Codaa jinagadoii nigajipaata moyalagata nidelegeco digawiniteloco noiigi, codaa me nigina dinooigiwepodi nidelaga. Igaataga jiginaa odoejedi me jinataga, pida anaga nipegi liniogo niginoa nokododi.”

<sup>10</sup>Odaa Jesus jegee, “Icota mido noiigi dinigoditege eledi noiigi, codaa nimawenegeco iigo dakapetege nimawenegeco eledi iigo. <sup>11</sup>Niginoa eletidi nipodaga jibodicagata datalale iigo ane yoniciwadi, oko nigodi nigigi, codaa me neelotika ane yediiga me waxodita eledi oko. Aneotedogoji eote ane ikee digoida ditibigimedi ane ikee me deligide, odaa eote nigina oko meliodi me doitibigiwaji.

<sup>12</sup>Pida maleedaga icotece inoatawece niginoa anejitedagawa, icota modibatagawatiwaji, owo mawikodee. Odaa etigadajicitiogitiwaji niginoa lacilodi liiakanagaxiidi judeutedi, odaa jegetigadixomitiwece niwilogonagaxi. Leegodi Iboonagadi etigadadeegitawaji lodoe inionaga-elodoli, inaaginoa eletidi lacilodi metigadiwini, odaa jogowo anodigotagawa. <sup>13</sup>Joanigidaa nigakatitiwaji menitici miditaga. <sup>14</sup>Atiteteloco gadowoogo, jinigiigi amanagawini aagagowikomataatiwaji maleedaga icota lakata motagani. <sup>15</sup>Leegodi emegege jajigotagawa gadixakedi, odaa jaxawatagadici ane alitigi gagegi magiti gadaxakawepodi, odaa iditawece agoyakadi modinigaanyetagadici, codaa agoyakadi moditagawa me degenitece anewi. <sup>16</sup>Pida etigadajicita metigadiwilo nigina gadiododipi, ganioxoadipi, gaditacepodi, inaa gadokaagetepi. Codaa ganigepidigica anoyeloadi nigina akaamitiwaji. <sup>17</sup>Odaa inatawece oko agetigademaani Ee leegodi. <sup>18</sup>Pida nigida makaamitiwaji agica ananiatitema

otagagidatece gadamodi. <sup>19</sup>Odaa natigide aatege niginoa ane dakaketedagadomi, amaleegaga idioka limedi me gadewiki miniwataga Aneotedogoji.

**Jesus yalagate ica me daa nigotaga Jerusalém**  
(*Mateus 24.15-21; Marcos 13.14-19*)

<sup>20</sup>Niganatitiwaji nigotaga Jerusalém, monawiile owidi iodagawadi gadidelagawadi, odaa jogowoogotitiwaji nigicotalo nokododi ane nibikota Aneotedogoji me yaagadi nigotaga. <sup>21</sup>Odaa anidiaaagi nipodigi Judéia ele me deletibigimoace midiwataga wetiadi. Codaa nigina anidiaagitice nigotaga leeditibige me yediigatibigiwaji me noditicoaci. Odaa nigina anidiaagitice nipodigi agalee yakadi me dakatiwece nigotaga. <sup>22</sup>Leegodi nigicoa nokododi ja limedi Aneotedogoji me iloikatidi nigidi noiigi, codaa icota midiokidi minoa ninyaco ijoatawece nigijoa aniwoteloco Aneotedogoji lotaganagaxi. <sup>23</sup>Nigina iwaalepodi ipilagaga, inaagina nigina bagalee oilipege lionigipi, nigidi eliodi me nawikodeega nigicoa nokododi, leegodi enagi owidi nawikodico digoina iigo, codaa Aneotedogoji iloikatidi nigina noiigi leegodi yelatetema me dagaxa mowidi libeyacegeco. <sup>24</sup>Odaa nigica laxakawepodi eliodi anonigodi nigidi noiigi oyatitioyi lodaajoli-ocagatedi, codaa idi eledi oyadeegi micataga me niwilogojegipi minoataga eletidi iigotedi. Odaa idi eledi noiigi oyaagadi nigotaga Jerusalém, odaa ida loniciwagatema moiige nigotaga nigepaa liniogo nigicoa nokododi Aneotedogoji ane nibikota me ika mowo nigida niciagi.

**Lanokegi Goneleegiwa ane icogotibigimece ditibigimedi**  
(*Mateus 24.29-31; Marcos 13.24-27*)

<sup>25</sup>Joanigidaagee nigica niciagi, nagani aligege, epenai, codaa me yotetitedi, oikeetiogi nigina oko naga nipegi liniogo iigo. Odaa digoina iigo, inatawece noiigi agaleegica dogonibeotibigege anele, codaa eliodi me doitibaigiwaji, leegodi layaagegegi akiidi-eliodi, nebekadi. <sup>26</sup>Codaa nigina oko nogomiwaditiniwace leegodi dagaxa me doitibaigiwaji, nigina moyowo nigida niciagi nigicote. Leegodi inoatawece ane loniciwegeco ditibigimedi digikee. <sup>27</sup>Odaa nigina oko jegetidadi, Ee, Goneleegiwa ane jicogotibigimece ditibigimedi, me idinikatini jiniotinece lolaadi, meliodi yoniciwaga. <sup>28</sup>Nige limedi niginoa ninyacoli, odaa jagabo gadaalegena maliitigi, leegodi agalee leegi odaa Aneotedogoji ja gadogaatedicogi niginoa gadawikodico.”

**Jesus yatemati ica natematigo anida ane godiigaxitece ane yalagata niale fiigoigo**

(*Mateus 24.32-35; Marcos 13.28-31*)

<sup>29</sup>Odaa Jesus ja yatemati nigida natematigo anida ane godiigaxitece, mee, “Digawini niale fiigoigo inaagina eletidi nialeli. <sup>30</sup>Nigina manatitiwaji niginoa laamotiidi maleekoka daxoditedice, odaa jogowoogoti jigicota limedi me

daamotiide. <sup>31</sup>Jigidaagee nigicota manati nigida niciagi, minoa nawikodico, odaa jogowoogotitiwaji naga nipegi Aneotedogoji me iige laalegenali oko.

<sup>32</sup>Ejitagawatiwaji nigina anewi, nigina oko aninaa me newiga nigica nigicotalo nigicoa nokododi nige limedi nawikodico, aginatawece nigo nigicota nigida niciagi anejita. <sup>33</sup>Ditibigimedi, iigo, бага ixomagatedice, pida yotaga baadaga ixomagatedice, idioka limedi midiya.

### **Leeditibige midioka limedi me idinowetagatege nigica anenagi**

<sup>34</sup>Akamagakaamitiwaji adinoweti jinigidioka limedi moleetibige maloo, daga gademakitibece, codaa jinagagowikomataatelo niginoan eni digoina iigo. Ina dagadoiita adagakaami libakajetegi maledaga enitigi degeno nigica noko Aneotedogoji. <sup>35</sup>Igaataga nigica noko enagi, odaa dibatiogi eliodi oko digoina iigo, nigina analee dogoditibige, macataga nagana enoona me dibata eijeegagi me daga eetibige. <sup>36</sup>Odaa leeditibige midioka limedi madinoweti, codaa midioka limedi motaganegeni Aneotedogoji, amaleegaga akatitiwaji metigadiwokoni nawikodico anenagi, codaa amaleegaga akatitiwaji manooticogi yodoe, Ee, Goneleegiwa ane jigogotibigimece ditibigimedi.”

<sup>37</sup>Inoatawece nokododi Jesus niigaxitediniwace nigijjo noiigi minitaga Aneotedogoji ligeladi. Odaa nigina menoale ja noditedicogi nigotaga, idiaagitedice maditaga aca wetikawaana anodita, “Lojotagadi Oliveira”. <sup>38</sup>Odaa nigina naga yelogotibige, iditawece nigidi noiigi igotibeci midoataga Jesus minitaga Aneotedogoji ligeladi mowajipatalo lotaga.

### **Lacilodi judeutedi odinilakidetege Judas me ikee Jesus (Mateus 26.1-5, 14-16; Marcos 14.1-2, 10-11; João 11.45-53)**

**22** <sup>1</sup>Naga nipegi ica nalokegi anodita “Lalokegi paon ane digica labookojegi”, aneledi oyatigi me “Páscoa”. <sup>2</sup>Nigijjo anoiige sacerdotitidi ijaagijjoa niigaxinaganadi anodiigaxinagatece lajoinaganegeco Moisés, jogodoletibige nimawenegegi moyelodi Jesus. Pida agoyakadi, leegodi odoitigi nigidi noiigi.

<sup>3</sup>Judas, aneledi oyatigi me Iscariotes, ida aneetege nigijjo dooze anodiotibece Jesus. Satanás ja dakatiwece laalegena Judas. <sup>4</sup>Odaa jigigo yotaganene nigijjo anoiige sacerdotitidi ijaagijjo anoiige nigicoa iodagawadi anoyowie Aneotedogoji ligeladi. Odinotaganetege ica nimawenegegi me yajigo Jesus midiya lacilodi judeutedi. <sup>5</sup>Odaa eliodi me ninitibigiwaji, codaa odinilakidetege moyediatece dinyeelo. <sup>6</sup>Judas ja niwoditema, odaa ja doletibige nimawenegegi me yakadi me yajigo Jesus midiya nelogododipi me dogoyowoogodi nigidi noiigi.

### **Jesus iige itoa anodiotibece moilakideti ane niodagadi me Páscoa (Mateus 26.17-25; Marcos 14.12-21; João 13.21-30)**

<sup>7</sup>Nigicota ica noko nalokegi “Paon ane digica labookojegi”, nigica noko nogonigodi waxacocoli moninitege ica lalokegi Páscoa. <sup>8</sup>Odaa Jesus ja iige Pedro ijaa João, meetediogi, “Emiitiwaji odaagoeni goweenigi lajo Páscoa.” <sup>9</sup>Odaa ja

nigikanaga, modi, “Igamei ica anemaani mejonagatice me joenaga ica goweenigi?”<sup>10</sup> Odaa Jesus ja igidi, meetediogi, “Digawinitiwaji, nigakaatiwece nigotaga, akapetege goneleegiwa yoyagadi boote ane nolee ninyogodi. Odaa iwitece nigepaa minitaga nigica diimigi ane dakatiwece. <sup>11</sup>Odaa enita nigini ane nebi diimigi, ‘Goniigaxinogodi godiige me jigikanagatigi ica ane diigetigi ica godicoogadi nelegi, anei me niodaga, Goniotagodi inaaginoa anodiotibece moyeligo liweenigi Páscoa.’<sup>12</sup> Odaa ja ikeetagawatiwaji ica godicoogadi nelegi ditibigimedi diimigi initawece ilagatini. Odaagidiaagonitetiwaji me oeni goweenigi.”<sup>13</sup> Nigijo nigigotibeci, odaa jogodakapetege nigijo Jesus aneyatedigi ligegi. Odaa jogoyoe liweenigi Páscoa.

**Jesus diigenatakate moyeligo ica niweenigi moyalagatibige**  
(*Mateus 26.26-30; Marcos 14.22-26; 1 Coríntios 11.23-25*)

<sup>14</sup> Nigijo nigicota aca lakata, odaa Jesus ja nicotedi maditaga aca nameeja awatetege nigijo anodiotibece. <sup>15</sup> Odaa jegeetediogi, “Jigijo mejitagawatiwaji, meliodi me jema me jeligo nigida goweenigi me Páscoa, mokotawece jatecogojogo maleedaga icota me jawikode. <sup>16</sup> Leegodi ejitagawatiwaji me dagadiaa jeligo liweenigi nalokegi Páscoa nigepaa jiniodaga nige limedi lalokegi Aneotedogoji ane iomagaditedice, nigicota me iige laalegenali inatawece oko.”

<sup>17</sup> Odaa Jesus naga dibate aca goopa viinyo, odaa diniotagodete Aneotedogoji. Nigidiaagidi jegee, “Abaatege nagada goopa, odaa adinajicitigi nigida viinyo. <sup>18</sup> Leegodi ejitagawatiwaji agalee jacipe viinyo nigepaa limedi Aneotedogoji me iige laalegenali nigina oko.”

<sup>19</sup> Odaa ja dibate paon, naga diniotagodete Aneotedogoji. Odaa ja inoke nigijo paon. Naga yajigotediogi nigijo anodiotibece, odaa jegeetediogi, “Nigidi paon micataga yolaadi ane jajigo leegodi akaamitiwaji. Awiitibiga nigida anejinaga amaleegaga analakitibigiji.” <sup>20</sup> Igaanaga oiaaditece moyeligo paon, odaa naga dibate nagajo goopa, idaagigote, odaa jegeetediogi, “Nagada goopa viinyo micataga Aneotedogoji daga gelatace me dinilakidetetege oko me noga libeyacegeco, odaa ja dibatacetege leegodi yawodi ane anado ane akaamitawecetiwaji leegodi. Odaa nigida viinyo anacipetatiwaji micataga daga yawodi.

<sup>21</sup> Pida digawini! Nigijo ane idajigotiogi yaxakawepodi, etini aniodi digoina meetaga. <sup>22</sup> Odaa Ee, Goneleegiwa ane jicogotibigimece ditibigimedi, ideleo, leegodi mina lowoogo Aneotedogoji. Pida nigini ane idajigotiogi inelogododipi, nigidiaagidi eliodi me dawikode.” <sup>23</sup> Odaa nigijo anodiotibece ja dinigetiwage, modi, “Amigijo ica ane yajigo Goniotagodi midi nelogododipi?”

**Nigica ane dagaxa me gonegegi**

<sup>24</sup> Nigijo anodiotibece Jesus ja dinotigimadetiwage, odoletibige moyowoogodi ganigepidigijo ica ane dagaxa me diniwaloe. <sup>25</sup> Odaa Jesus jegeetediogi, “Niginoa ninionaga-eloodoli digoina iigo lemaanigi moiige oko, codaa lacilodi lemaanigi moditiogi, ‘Minigina aneo anele mokotaga.’ <sup>26</sup> Pida

bagaleedigidaagenitatiwaji. Pida nigina ane idei makaamitagatiwaji ane dagaxa me gonegegi, leeditibige miniaagini micataga nigina niotagi bagalee lioneeega. Odaa nigina ane gadacilo, ele midioka limedi me diniciaceketege nimeedi. <sup>27</sup>Amiijo ica ane dagaxa me gonegegi? Manigijaagijo ijo ane nicotini madi nameeja maniodi, ogoa, manigijaagijo ane nadeegita eledi oko liweenigi ane yeligo? Nige yemaa nigijo ane nicotini madi nameeja jigijaa gonegegi! Pida Ee бага diniciaceketege nigina niotagi digoina gadiwigotigitiwaji.

<sup>28</sup>Jagakamagakaamitiwaji nigijo anidioka limedi me idinadeegitibigege minoa yawikodico. (Pida agadikanitiwaji). <sup>29</sup>Pida joanigidaa Eiodi me najigotediwa me jiige inoatawece, odaa Ee, aagaga jajigotagawatiwaji me iigeni inoatawece. <sup>30</sup>Odaa icota maniodi, macipe, codaa makaami gogiiwepodi miditaga nalokegi Aneotedogoji aneote nige limedi me jiige inoatawece. Codaa nigida makaami jigida ganagatetigitiwaji me iigenatakani, odaa jagawiniti waji anemiitioigi, codaa me iigeni nigijoa dooze latopaco loiigi Israel.”

### **Jesus eote leemidi Simão Pedro**

*(Mateus 26.31-35; Marcos 14.27-31; João 13.36-38)*

<sup>31</sup>Odaa Goniotagodi jegee, “Simão, Simão, digawini! Satanás dipokotalo Aneotedogoji me ika me dineetagawa akaamitaweceti waji, me gadigikeni, micataga nawodaganaga me yajigijice leyeema, catinedi beneela. <sup>32</sup>Pida jagaga jipokotagaloco me gadaxawani Aneotedogoji, me daga ikani madadiwagati, Simão. Odaa nige adopilitiwa, odaa awii me yoniciwaditace ganioxoadipi mabo laalegena.” <sup>33</sup>Pida Pedro meetalo, “Iniotagodi, ja idigo makaami iniwilagawa, codaa makaami yemagawa.” <sup>34</sup>Odaa Jesus meeteta, “Pedro, ejitagawa, nigina enoale anigicatibige daga anoe okogokoodi, odaa itoatadigida meni me dagadowoogoti.”

### **Jesus jagageote leemidi nigijo anodiotibece**

<sup>35</sup>Odaa Jesus ja ige, meetediogi, “Ica ananiaditagadomitiwaji, ijo me gadiigeni memiitiwaji me digicoa ganibocoli, me dagaca ganixacoola, codaa meletidi gawelatedi?” Odaa jogoigidi, moditalo, “Agica ane aniaditibige.”

<sup>36</sup>Odaa jegeetediogi, “Pida nigina natigide anidiwa nibocoli, mige nixacoola, ele me yadeegi. Odaa nigini ane digica lodaajo-ocagataga, odaa ele meyaa nicaapa, me yakadi me dinoojeteta lodaajo-ocagataga. <sup>37</sup>Leegodi ejitagawatiwaji me leeditibige micota nigida niciagi, aneeta nagadi Aneotedogoji lotaganagaxi mee, ‘Awatetege monilagadi nigijoa agopeloaga.’ Leegodi jigicota nigida niciagi, ijo aneetece Aneotedogoji lotaganagaxi.” <sup>38</sup>Odaa nigijo anodiotibece moditalo, “Goniotagodi, digawini! Digoina idiwa itiwataale gododaaajoli-ocagatedi.” Odaa jegeetediogi, “Jagabo!”

**Jesus igotace minitaga Lojotagadi Oliveira**

*(Mateus 26.36-46; Marcos 14.32-42)*

<sup>39</sup>Jesus noditedicogi nigotaga, igo minitaga Lojotagadi Oliveira ane ligilegegitedibece. Nigijo anodiotibeceeledi igotibeci. <sup>40</sup>Nigijo nigicotedicogi nigijo lemaanigi meitedibige, odaa jegeetediogi nigijo anodiotibece, “Ipokitalo Aneotedogojitiwaji me daga ikateda mawii ane beyagi nigetigadicini.”

<sup>41</sup>Odaa ja yetecetedicoace, ibogodi mabo me jokolenaga wetiga. Odaa ja yamagatedini lokotidi me yotaganege Aneotedogoji, mee, <sup>42</sup>“Eiodi, nigemaani, madatamagateenitege niginoa yawikodico anenagi, ane jiciaceeketege nagana goopa ane nolee nigina nacipagadi ane bayodi. Pida jemaame jixomagateetedice nigica anakamaga emaani, idigida aginiginoo ane emaga jemaame jixomagateetedice.” <sup>43</sup>Odaa ja dinikeetalo ica aanjo, ane icogotibigimece ditibigimedi, enagi me yajigotalo loniciwaga. <sup>44</sup>Jesus egidaagee me yotaganege Aneotedogoji, odaa eliodi me dogowikomata, negepaa dinonipetece lawodi ane datikoletedinigi iigo.

<sup>45</sup>Naga nigotedini me yotaganege Aneotedogoji, odaa ja dabiditedini, opitacedicogi miditaga nigijo anodiotibece, odaa jigicotediogi me niotaga, leegodi eliodi me agecagalodipi. <sup>46</sup>Odaa jegeetediogi, “Igaamenitiwaji ina me iote? Anicootiniwacetiwaji, odaagipokitalo Aneotedogoji me daga ikateda me oeni ane beyagi nigetigadicini.”

**Jesus oniwilo**

*(Mateus 26.47-56; Marcos 14.43-50; João 18.3-11)*

<sup>47</sup>Jesus egidaageeteda me dotaga, nogototalo ica noiigi-nelegi. Odaa nigijo ane liboonagadi Judas, anida aneetege nigijo dooze anodiotibece Jesus, jigijaa odilokoteloco nigijo noiigi. Odaa nigipegitalo Jesus ja domaga napicogo.

<sup>48</sup>Pida Jesus meeteta, “Judas, me domagadapicigi, oletibige me adikeenitiogi idi inelogododipi, Ee Goneleegiwa ane jicogotibigimece ditibigimedi?”

<sup>49</sup>Nigijo nagonadi nigijo anodiotibece Jesus nigida niciagi, odaa ja nigikanaga, modi, “Goniotagodi, emaani me jiticodagaticoace jatiigatiogi gododaajoli-ocagatedi?” <sup>50</sup>Odaa jigijo ica aneyacilotidi ica limeedi nigijo lacilo-sacerdotitedi, yakagiditice napaagate ane digeticogi libaagadi.

<sup>51</sup>Pida Jesus yoxogo, meete, “Jagabo, jinagaleegawii gadoenatagi!” Odaa ja dibatedinece napaagate nigijo nimeedi, odaa ja yexocagaditacedi.

<sup>52</sup>Odaa jegeetediogi nigijo anoiige sacerdotitedi ijaagijoa icoa ninionaga iodagawadi anoyowie Aneotedogoji ligeladi, icoa lacilodi judeutedi, anigotibeci moniwilo. Odaa jegeetediogi, “Igame leegoditiwaji manadeegi inoa gadodaajoli-ocagatedi inaa ganeboli madiwilotiawaji, micataga degee gonematagodi?” <sup>53</sup>Ijigijo me jawatagagitiwaji minitaga Aneotedogoji ligeladi inoatawece nokododi, pida agadiwilotiawaji. Pida nigina natigide,

jigicota lakata Aneotedogoji ane nibikota mabaatiwawaji, ja limedi nigina anida aneetege nexocaga me ini loniciwaga meo loenatagi me dakapetigi.”

**Pedro mee ica me daga yowoogoditeda Jesus**

*(Mateus 26.57-58, 69-75; Marcos 14.53-54, 66-72; João 18.15-18, 25-27)*

<sup>54</sup>Odaa jogoniwilo Jesus, jogoyadeegitedicogi ligeladi nigijo lacilo-sacerdotitedi. Odaa Pedro ja diotece, pida leegitece me yototedice. <sup>55</sup>Nigijo nogoyelotigi noledi liwigotigi niogó ica diimigi, odaa ja dinitotibigiwaji. Odaa Pedro jagaga nicotini miditaga. <sup>56</sup>Naga nicotini, odaa aca niimete ja nadi liniogotibece noledi. Naga iwi, odaa jegee, “Nigini aaginaga idiaagi-iitice mijoataga Jesus!” <sup>57</sup>Pida Pedro mee, “Awicije, agicoa daga yowoogotagi!” <sup>58</sup>Aona nigica daga leegi, ica goneleegiwa nagaga nadi, odaa jegee, “Nigida makaami eji makaami eledi ganigepidigica nigijo anodiotibece.” Pida Pedro ja igidi, meeta, “Godokaagedi, agica daga jiotibece!”

<sup>59</sup>Naga ixomagatice onaniteci lakata, ica eledi goneleegiwa jegee, “Jelogoditagawa nigina anewi, nigini goneleegiwa idiaagitice mijoataga, leegodi icogoticogi nipodigi Galiléia!” <sup>60</sup>Pida Pedro mee, “Nagoodi godokaagedi, odaa agica daga jowoogodi nigica ane gadalakita!” Odaa aonigica daga leegi, egidaagee me dotagatibece, naganoe okogokoodi. <sup>61</sup>Odaa Goniotagodi ja nawiilitetetege me iwiteta Pedro. Odaa Pedro ja nalagatibige nigijoa Goniotagodi lotagateta, negeeteta, “Nigina enoale, anigicatibige daga anoe okogokoodi, odaa itoatadigida meni me dagadowoogoti.” <sup>62</sup>Odaa Pedro ja noditicogi anei, odaa eliodi manoetibece.

**Icoa iodagawadi onalaketedibige Jesus**

*(Mateus 26.67-68; Marcos 14.65)*

<sup>63</sup>Icoa goneleegiwadi anoyowie Jesus onigiwogotedice, codaa monalaketedibige. <sup>64</sup>Onoxoco ligecoogeli, odaagoyalaketigi latobi, odaa jogoige, moditalo, “Iwela, amiijo ica ane gadalakeni?” <sup>65</sup>Odaa owidi eletidi anodigotalo moyametibigo.

**Jesus ideite lodoe ica me dilapode lacilodi judeutedi**

*(Mateus 26.59-66; Marcos 14.55-64; João 18.19-24)*

<sup>66</sup>Naga yelogotibige, nigijoa lacilodi judeutedi, ijaagijo nigijo anoiige sacerdotitedi, ijaagijo anodiigaxinagatece lajoinaganegeco Moisés, nigidi ja yatecogo. Odaa jogodipoko monadeegitedicogi Jesus lodoe me dilapode. <sup>67</sup>Odaa jogoige, moditalo, “Manige akamagakaami Nigicoa ane niwakatee Aneotedogoji me godatamagateetetege godaxakawepodi? Enitogowa nige nagakamagakaami!” Odaa ja igidi, meetediogi, “Degejitagawatiwaji negemegee, agadadiwagati. <sup>68</sup>Codaa daga gadigeetiwaji, agadigiti. <sup>69</sup>Pida Ee, Goneleegiwa ane jicogotibigimece ditibigimedi, agica daga leegi odaa ja idicotini liwai libaagadi Aneotedogoji aninoatawece loniciwegeco.” <sup>70</sup>Odaa iditawece jogoige, moditalo, “Ida makaami, akaami Lionigi Aneotedogoji?” Odaa ja igidi, meetediogi, “Ewi nigida alitigi gagegi ewi negemegee Lionigi Aneotedogoji.”



<sup>71</sup>Odaa jogodi, “Agalee jopoogatibige eledi oko daga nelogoditogowa aneyatedigi ligegi, leegodi okomogoko ja jajipaagatalo ane lotaganegegi!”

**Jesus oyadeegitalo Pilatos, ica romaano ane iige nipodaga Judéia**  
(*Mateus 27.1-2, 11-14; Marcos 15.1-5; João 18.28-38*)

**23** <sup>1</sup>Odaa ijotawece nigijo lapo-nelegi dabiditiniwace, odaa jogoyadeegi Jesus minitaga Pilatos. <sup>2</sup>Odaa ja notaganagateloco modakapetege Jesus, modi, “Ja jibaagatalo nigidoa goneleegiwa ane niigaxitediniwace godoiigi modakapetege romaannotedi, codaa me dogoyedia ane leeditibige me jedianaga César, ninionigi-eliodi romaannotedi. Codaa Idaagidoa mee ica minionigi-eliodi, Aneotedogoji ane niige.” <sup>3</sup>Odaa Pilatos ja ige Jesus, meetalo, “Ewi nagakamagakaami ninionigi-eliodi judeutedi?” Jesus ja igidi, meeteta, “Iniotagodi, ewi nigida gagegi.” <sup>4</sup>Odaa Pilatos jegeetiogi nigijo anoiige sacerdotitedi, ijaagijo noiigi-nelegi, “Agica ane beyagi ane jinaditece idoa goneleegiwa daga jiigenatakatalo moyeloadi.” <sup>5</sup>Pida jogoyopilagaditacelogo nigijoa lotaga, notigimadaga, modi, “Pida niigaxitediniwace godoiigi anitawece Judéia modakapetege romaannotedi, anetigodiige. Yajela nipodigi Galiléia, natigide jegenotedicogi digoina Jerusalém.”

**Jesus jagagoyadeegitedicogi lodoe Herodes, nigijo anoiolatice romaannotedi me iige nipodaga Galiléia**

<sup>6</sup>Nigijo Pilatos naga wajipatibece Jesus mida aneetetege noiigi galileu, odaa ja ige migewi me galileu. <sup>7</sup>Igaanaga yowoogodi Pilatos Jesus me icogotedicogi nipodigi anei me diigenataka Herodes, odaa ja iigetedicogi minitaga, leegodi Herodes aagaga ini manitaga nigotaga Jerusalém nigijoa nokododi.

<sup>8</sup>Nigijo Herodes naga nadi Jesus, odaa eliodi me ninitibece, leegodi ijo me wajipatibece icoa anee, codaa akaa domaga yemaa me nadi. Odaa ja walitibigege Jesus degeote okanicodaagica godoxicegedi. <sup>9</sup>Codaa eliodi me nigetedice Jesus, pida aigidi. <sup>10</sup>Nigijo anoiige sacerdotitedi ijaagijo nigijo anodiigaxinagatece lajoinaganegeco Moisés, idiaagi dabiditiniwace. Odaa dinoniciwagaditibigiwaji me notaganaga modakapetege Jesus. <sup>11</sup>Herodes ijaagijoa niodagawadi oniweenigitedice Jesus, codaa moyametibigo. Onixomegetedinigi nijayogo inionigi-eliodi, odaa Herodes ja iigetacedicogi minitaga Pilatos. <sup>12</sup>Odaa Herodes ijaa Pilatos ja dinokaagetewamigi ijaagijo nigijo noko, leegodi nigicoa nokododi dinelatiwage.

**Pilatos diigenatakatalo Jesus moyeloadi**  
(*Mateus 27.15-26; Marcos 15.6-15; João 18.39-19.16*)

<sup>13</sup>Odaa Pilatos ja yatecogotee nigijo anoiige sacerdotitedi ijaagijoa nigijoa lacilodi judeutedi, codaa mijotawece nigijo noiigi. <sup>14</sup>Odaa jegeetiogi, “Jaganadeegitediwatiwaji nigidoa goneleegiwa menitiwa ica meote lacilo gadoiigi me nakapetegipi romaannotedi. Pida digawinitiwaji, ja inigetedice

gadodoe, odaa jakadi ina me digica loenatagi ane beyagi, nigijoa anenitalo meote. <sup>15</sup>Codaa Herodes idaagee yakadi me digica loenatagi ane beyagi, joanigidaa leegodi me niigetacedicogi mokotaga. Pida digawinitiwaji! Agica loenatagi ane beyagi daga leeditibige me jiigenatakatalo moyeloadi. <sup>16</sup>Pida jiigenatakatalo moyametibigo, odaa nigidiaagidi ja jikatedice.” <sup>17</sup>Inoatawece nicaagape me nakatio nalokegi Páscoa, leeditibige Pilatos me ikatice onidateci goneleegiwa niwilogjegi, leegodi mina ligilegegitibece.

<sup>18</sup>Odaa iditawece nigidi noiigi notaganagateloco, codaa napaawagateloco, modi, “Adeegi nigidoa goneleegiwa meloati, odaa anikanitogodomi Barrabás!” <sup>19</sup>Nigica Barrabás one niwilogjegi leegodi eyatege nigidi noiigi me lakapetepipi ninionigi-eliodi romaanotedi, codaa onica laigo.

<sup>20</sup>Odaa Pilatos jogopitacege me notaganegetiniwace, leegodi domaga lipegegedi me ikatedice Jesus. <sup>21</sup>Pida jegepaanaga napaawagateloco nigijjo noiigi, modi, “Otonitedeloco nicenaganagate! Otonitedeloco nicenaganagate!” <sup>22</sup>Odaa jigicota me itoatadigida Pilatos me nigetiniwace, meetiogi, “Pida amiini ica loenatagi ane beyagi me leeditibige me jiigenatakatalo moyeloadi? Emegee agica jakadi ane leegodi daga jiigenatakatalo moyeloadi. Pida jiigenatakatalo monalaketedibige. Nigidiaagidi odaa ja jikatedice.” <sup>23</sup>Pida idokee modoletibige nigica mowo anodigotalo Jesus, codaa jegepaanaga dinigetagateetibigiwaji me napaawagateloco, modipokotibige moyototedeloco Jesus nicenaganagate. Nigijjo noiigi ijaagijjo nigijjo anoiige sacerdotitidi napaawaga negepaa oyakadi anodoletibige. <sup>24</sup>Odaa Pilatos ja yajigo Jesus midiwa iodagawadi mowo nigica anoyemaa modigotalo nigijjo noiigi. <sup>25</sup>Odaa ja ikatice nigijjo anodipoko me ikatice, ane diniwilo leegodi meyatege loiigi modakapetege ninionigi-eliodi romaanotedi codaa me daije. Pida Jesus baanaga yajigo midiwa iodagawadi moyeloadi, anoyemaa nigijjo noiigi-nelegi modigotalo.

### **Jesus oyototedeloco nicenaganagate**

*(Mateus 27.32-44; Marcos 15.21-32; João 19.17-27)*

<sup>26</sup>Odaa nigijjoa iodagawadi jogoyadeegi Jesus. Egidaa diiticogi migotibeci, jogodakapetege ica goneleegiwa ane liboonagadi Simão ane ligeladi nigotaga Cirene. Simão icogoticogi nipodigi. Odaa jogodibata Simão, oyexagateloco nagajo nicenaganagate digoina lewagi, odaa jogowo me yadeegi dilokotologo Jesus.

<sup>27</sup>Eliodi ica noiigi anodiatece Jesus. Liwigotigi nigidi oko ijo iwaalepodi ane noenagateloco, codaa eliodi me agecagalodipi leegodi nigida anodigotalo Jesus. <sup>28</sup>Pida Jesus naga nawiilitetetege, odaa jegeetediogi, “Iwaalepodi, anakaami nigeladimigipitigi Jerusalém, jinaganoeni leegodi nigida aneji, pida anoeni leegodi akamagakaamitiwaji idiaa gadionigipi! <sup>29</sup>Leegodi ewi micota nokododi nigina oko nigodi, ‘Ninitibigiwaji nigina iwaalepodi analee digica linala!’ <sup>30</sup>Codaa odipokotalo niginoa wetiadi, modi, ‘Godapogotegegitini!’ Codaa oditiogi niginoa lojotakatedi, ‘Godaagategegitini!’ <sup>31</sup>Igaataga nigowo nigida anodigotiwa, Ee ane idegenaga, ane iciagi nigina iwogo bagalee dione (ane dogoibake mowo

noledi), pida gadaxakawepodi бага даgаxa me beyagi anodigotagawa, ane gadiciagi nigina iwogo baanaga yadilo (ane yabidi, oдаa агica ane yeyagatice).”

<sup>32</sup>Nigijoa iodagawadi eletidi oyadeegi itoataale goneleegiwadi gonematagododi me lemagawepodi Jesus. <sup>33</sup>Nigijo nogotota ica lojotagadi ane liboonagadi “Libitagi Godacilo”, oдаa jigidiaagi Jesus moyototedeloco nicenaganagate. Ijaagijoa itoataale goneleegiwadi gonematagododi eletidi nicenaganagatedi anoyototelogo, onidateci digeticogi liwai libaagadi Jesus, ijoeledi digetege nimagijegi. <sup>34</sup>Jesus mee, “Eiodi, jinagaloikatiti nigidi noiigi leegodi nigida anodigotiwa. Igaataga agoyowoogodi nigida ane loenatagi.” Oдаa jogoiwi anepaga dinetetece nogodinawalacetibige lowoodi.

<sup>35</sup>Ica noiigi-nelegi idiaagitice dabititiniwace oiwitalo Jesus, ijaagijoa lacilodi eletidi idiaagiticoaci, oдаa modi, “Eoteeledi oko me newigatice. Daantigidaagidoa Nigicoa ane niige Aneotedogoji me godewikatidi, ane iomagaditedice Aneotedogoji, daganagawini ida nimawenegegi meote lewiga.”

<sup>36</sup>Nigijoa iodagawadi oyametibigo Jesus. Igotibeci midoataga domogoyacipegetalo viinyo ane daga dakake lojedi. <sup>37</sup>Oдаa moditalo, “Nigewi makaami ninionigi-eliodi judeutedi, dicakamaga awii gadewiga!”

<sup>38</sup>Madataga licenaganagate Jesus ditibigimedawaanigi lacilo, oyototeloco taaboa-liwai ane diniditeloco,

“NIGIDOA NINIONIGI-ELIODI JUDEUTEDI.”

Diniditelogo nigijoa notaga nioladi greego, nioladi romaano, nioladi hebraico.

<sup>39</sup>Ganigepidigica nigijoa itoataale gonematagododi anagaga oyototeloco nicenaganagate, beyagi lotagatalo Jesus, meetalo, “Nigewi nagakamagakaami ane niige Aneotedogoji, dice awii gadewiga, codaa moko awii godewiga!”


<sup>40</sup>Pida nigijoeledi gonematagodi ja yoxogo, meeta, “Jinagawii nigida gagegi, agodagadoiitalo Aneotedogoji? Etigodiloikatidi midokida anodigotogowa.

<sup>41</sup>Codaa nigida godawikodigi oko itoataale бага igenaga, leegodi me jedianagateloco nigijoa godoenataka ane beyagi. Pida nigidoa goneleegiwa, агica loenatagi ane beyagi.” <sup>42</sup>Oдаa jegeetalo Jesus, “Iniotagodi, analakitibigiji, nigadopilitijo, nige limedi managi iigeni inoatawece.” <sup>43</sup>Oдаa Jesus jegeeteta, “Ejitagawa nigina anewi, nigina noko adeoni meetaga digoida ditibigimedi.”

### Lemegegi Jesus

(*Mateus 27.45-56; Marcos 15.33-41; João 19.28-30*)

<sup>44-45</sup>Naga nipegi me yaxogo-noko, oдаa aligege ja ipe, ja nexocaga inatawece iigo, negepaa iniwatadagani lakata me gocidi. Codaa nagajo lipegetege minitaga Aneotedogoji ligeladi, ane iomagaditege oko aneite Aneotedogoji, nagajo lipegetege daawidigidicetigi liwigotigi ditibigimedi, icogotibigimece ditibigimedi negepaa natinedi. <sup>46</sup>Oдаa Jesus dinigetagatee me dapaawe, mee, “Eiodi, jajigotagawa iwigo!” Naga nigotedini me dotaga, oдаa ja yeleo.



(Lucas 23.47)

<sup>47</sup>Nigijo nowienogodi niodagawadi romaanotedi naga nadi nigijo niciagi, odaa ja iwenigide Aneotedogoji, mee, “Nigica mewi nigidoa goneleegiwa me digicata loenatagi ane beyagi!”

<sup>48</sup>Ijotawece nigijo oko ane dilapode moiwi nigida niciagi, jogoyabaketibigeloco elipije, moikee magecagalodipi, odaa nigidiaagidi jogopiticogi inoa ligelatedi. <sup>49</sup>Odaa ijotawece nigijo lokaagetedipi Jesus, ijaagijo iwaalepodi anoniocece, oicogoticogi nipodigi Galiléia, agipegitiocece, pida bogonadi ijoatawece ane nigijo niciagi.

**Oixotiwece lolaadi Jesus midataga lawimagajegi-wetiga**

(Mateus 27.57-61; Marcos 15.42-47; João 19.38-42)

<sup>50-51</sup>Onini ica goneleegiwa ane liboonagadi José, ane ligeladi aca nigotaga Arimatéia, nipodigi Judéia. Inaagina goneleegiwa anele, codaa me igenaga, nibeotibigege ica noko Aneotedogoji nige iige inatawece iigo. Codaa ida aneetege icoa seteenta lacilodi judeutedi. Pida aniwoditema nigicoa eletidi lacilodi, nigijo nogodoletibige nimawenegegi mowo anodigotalo Jesus. <sup>52</sup>Nigijo

goneleegiwa igo minitaga Pilatos dipokota Jesus lolaadi. <sup>53</sup>Odaa José jigigo noga Jesus lolaadi madataga nicenaganagate, odaa ja ilipaditigi aca nigelate. Nigidiaagidi ja ixotiwece nigijo lolaadi Jesus catiwedi ica lawimagajegi-wetiga, baanaga igo me dinaligi maditaga aca wetiga. Nigijo lawimagajegi anigica dogoibake digica émegegi anoixotiwece. <sup>54</sup>Nigijo noko anaga nakatio saabado, pida nigijo noko nigidi noiigi jogodinoetege ica saabado.

<sup>55</sup>Nigijo iwaalepodi anoniocece Jesus anoicogoticogi Galiléia, jogodioteci José. Odaa bogonadi nigica lawimagajegi-wetiga, codaa monadi nigica anodigota lolaadi Jesus. <sup>56</sup>Nigidiaagidi jogopiticogi inoa ligelatedi, odaa

jogoyoe edokojetedi, ina najidi aneletege lanigi, moyatita Jesus lolaadi. Naga saabado jaganipetiniwace, ane liigenatakanegegi Aneotedogoji.

### Jesus naga yewigatace

(Mateus 28.1-10; Marcos 16.1-8; João 20.1-10)

**24** <sup>1</sup>Naga domiingo me nigoitijo, nigijo iwaalepodi jigigotibeci midataga nigijo lawimagajegi-wetiga anoyatice lolaadi Jesus, oyadeegi nadokojetedi anoyoe. Codaa ijoeledi iwaalepodi lixigagawepodi. <sup>2</sup>Nigicotiobeci, oadaa jogonadi nagajo wetiga nelegi anoyatita monoxoco nigijo lawimagajegi-wetiga, jogonogaticogi nigijo aneitice. <sup>3</sup>Pida naga dakatiobeci, agaleegica moyakadi lolaadi Goniotagodi Jesus. <sup>4</sup>Agoyowoogodi ane diitigi nigida niciagi, oadaa egidaagee me nowookonaga, codaa nogonida dinikeetiogi lodoe itoataale goneleegiwadi, odinixotinigilo nowoodi ane datale. <sup>5</sup>Oadaa nigijo iwaalepodi eliodi me doitiibigiwaji, dakagitiniwace negepaa iigo. Oadaa nigijoa goneleegiwadi ja nigikanaga, modi, “Igaameni ina moleetibigetiawaji midiwataga émagaga ijoa baanaga yewiga? <sup>6</sup>Agicoatedigi digoina, pida ja yewigatace. Eganalakitibigetiawaji ijoa lotagatedagawa maleegidiaagitedice nipodigi Galiléia, nigijo negeetedagawatiawaji, <sup>7</sup>Ee, Goneleegiwa ane jicogotibigimece ditibigimedi, leeditibige metidajigotioigi goneleegiwadi abeyacagaga, codaa etidototeloce nicanaganagate, igaanige ixomagatedijo itoatadigida nokododi, oadaa ja idewigatace.”

<sup>8</sup>Oadaa nigijo iwaalepodi jogonalagatigilo nigijoa lotaga. <sup>9</sup>Oadaa jogopitibeci, me icogoticogi midataga lawimagajegi-wetiga, igotibeci oyelogoditioigi nigijo oonze anodiotibece Jesus, ijaagijo eletidi. <sup>10</sup>Nigijo iwaalepodi nogoyatematitioigi nigijoa liigexedi Jesus, anonadi, nigidi iwaalepodi liboonagatedi Maria Madalena, Joana, Maria ane eliodo Tiago, ijaagijoeledi iwaalepodi lixigagawepodi. <sup>11</sup>Pida nogowajipata nigijo latematigo nigijo iwaalepodi, oyakadi ina daga dinetoletibigiwaji, oadaa agoyiwagadi. <sup>12</sup>Pida naga dabiditi Pedro, oadaa ja walokoditicogi midataga nigijo lawimagajegi-wetiga. Nigicoticogi, oadaa dakagitini iwitiwece catiwedi. Pida ijoka naditeda nigijoa nigelateli. Oadaa jogopiticogi ligeladi, eliodi me nawela leegodi nigijo ane nadi.

### Jesus iwidatediogi itoataale anodiotibece digoida naigi nigotakawaana

#### Emaús

(Marcos 16.12-13)

<sup>13</sup>Ijaagijo nigijo noko itoataale anodiotibece igotibeci manitaga nigotakawaana anodita Emaús, ejime itoa leegoa me yototice Jerusalém. <sup>14</sup>Nigijoa goneleegiwadi odinotaganegetiigi nigicoa ane loanico Jesus. <sup>15</sup>Eonigidaagee me dinotaganegge, dinotigimadetiwage, naga iwidatediogi Jesus, oadaa ja lixigagawepodi. <sup>16</sup>Oadaa nogonadi agoyowoogodi, Aneotedogoji eote me dogoyowoogoditeda.



(Lucas 24.4)

<sup>17</sup>Odaa Jesus ja nigetediniwace, meetediogi, “Amiina ica ane gadalakitawaji ina naigitece? Codaa igame leegodi ina makaami agecagalodipi?” <sup>18</sup>Odaa ica ane liboonagadi Cleopas ja igidi, meetalo, “Manigakamokakaami ane ideoni Jerusalém, ane daga yowoogodi ijo niciagi, natigidiwaga nigijoa nokododawaanaga ane ixomagatedice?” <sup>19</sup>Odaa ja digika, meetediogi, “Amiida ica niciagi ane gadalaki?” Odaa jogoigidi, moditalo, “Idinotaganegenagatigi ninyaagi Jesus, nigijoa anelatedibige Nazaré. Inaagina nigina ane

yelogoditedibece Aneotedogoji lowooko, eliodi nimawenegegi nigina me dotaga, codaa owidi loenataka datikate loniciwaga lodoe Aneotedogoji, codaa me lodoe eliodi oko. <sup>20</sup>Nigijo anoiige sacerdotitedi ijaagijoa godacilodi oyajigo moyeloadi, odaa jogoyototedeloco nicenaganagate. <sup>21</sup>Pida ja domigijaa jaliigatalo me yatamagateetege godoiigi Israel nigina laxakawepodi. Pida nigina noko jegeote itoatadigida nokododi moyeloadi. <sup>22</sup>Pida ijo iwaalepodi godokaagetepi mejiwagatibece Goniotagodi, owotibige meliodi me godawela. Eka yapacagatege nigoi, nigigotibeci midataga lawimagajegi-wetiga anoyatice lolaadi Goniotagodi. <sup>23</sup>Odaa agaleegica moyakadi lolaadi. Odaa ja dopitijo modi ica modinkeetiogi icoa aanjotedi, odaa nigicoa aanjotedi onodi ica naga yewigatace. <sup>24</sup>Odaa jigijo godokaagetepi anigotibeci midataga nigijo lawimagajegi-wetiga, odaa jogonadi mewi nigijo anodita nigijo iwaalepodi. Pida agicoa monadi Goniotagodi Jesus.”

<sup>25</sup>Odaa Jesus jegeetediogi, “Nigida makaamitiwaji agica gadowoogo, codaa dakake gadaalegenali, me daga iwagatiteda ijoatawece lotaga nigijo anoyelogoditedibece Aneotedogoji lowooko. <sup>26</sup>Nigijoa Aneotedogoji ane niige leeditibige me dawikode, odaa ja dakatediwece miniwataga Eliodi.” <sup>27</sup>Odaa ja yelogoditediogi ijotawece liwai Aneotedogoji lotaganagaxi aneetece Jesus. Yajela nigijo liwai Moisés ligegi, ijaagijoa liwai aneetece Jesus, anoidi nigijo anoyelogoditedibece Aneotedogoji lowooko.

<sup>28</sup>Nigijo nogodipegita nagajo nigotakawaana ane diiticogi, Jesus eote micataga daga ixomagatedicogi odoe. <sup>29</sup>Odaa jogonolitedini, moditalo, “Inaagoni mokotaga, leegodi ja gocidi.” Odaa ja dakatediwece ica diimigi, midiaaginawaanigite. <sup>30</sup>Odaa nigica naga nicotedi maditaga aca nameeja, ijaagijoa itoa goneleegiwadi, naga dibate ica paon, odaa ja diniotagodete Aneotedogoji. Naga inoke nigijo paon, odaa ja yajigotediogi. <sup>31</sup>Odaa Aneotedogoji jegeote nigijoa goneleegiwadi moyowoogodi me Jesus. Pida jigidiaa laakadi. <sup>32</sup>Odaa oninitecibeci mee, “Agodagaleegaga, jowoogotaga naga itinege godaalegena, nigijo naga godotaganegetedice digoida naigi me nelogoditedogowa liwai Aneotedogoji lotaganagaxi?”

<sup>33</sup>Ajaagajo nagajo lakata naga dabiditiniwace, odaa jogopitacicogi nigotaga Jerusalém. Odaa jogototiogi nigijo oonze anodiotibece Jesus, ijaagijoa eledi oko anawatege. <sup>34</sup>Odaa moditiogi nigijo itoataale, “Dicewi Goniotagodi naga yewigatace. One dinikeeteta Simão.” <sup>35</sup>Odaa nigijo itoataale jagagoyatemati anodaagee monadi digoida naigi, codaa oyatemati moyowoogodi Goniotagodi nigijo naga inoke nigijo paon.

### Jesus dinikeetediogi nigijo anodiotibece

(*Mateus 28.16-20; Marcos 16.14-18; João 20.19-23; Atos 1.6-8*)

<sup>36</sup>Eonigidaagee moyatemati, codaa nogonidoateda Jesus naga dinikee liwigotigi. Odaa jegeetediogi, “Jemaa Aneotedogoji meote mele gadaalegenalitiwaji!”

<sup>37</sup>Pida nawelatibigiwaji, codaa eliodi me doitibigiwaji, odiletibige dogonadi niwigo. <sup>38</sup>Pida meetediogi, “Igame leegodi ina manawelatiwaji?”

Codaa igame leegodi me dawienataka gadaalegena? <sup>39</sup>Digawini ibaagatedi, codaa me igonaka! Odaa jaganati mewi negemegee. Digabaatiloco, odaa jogowoogoti negemegee! Leegodi niwigo agicoa liboledi, otegexaagaga libitaka, pida akaamitiwaji madati biginoa iboledi.”

<sup>40</sup>Nigijo negee, odaa ja ikee libaagatedi, codaa me logonaka. <sup>41</sup>Pida anegeniwagatakanaga, leegodi meliodi me nawelatibigiwaji, codaa me ninitibigiwaji. Odaa Jesus ja digika, meetediogi, “Agica anigetigida gaweenigi domaga jeligo?” <sup>42</sup>Odaa jogoyajigotalo liwai nogojegi niloogo. <sup>43</sup>Odaa ja dibatetege, jaganiodi lodoe nigijo anodiotibece.

<sup>44</sup>Nigidiaagidi Jesus meetediogi, “Maleeginaagejotice makaamitagatiwaji negejitagawa me leeditibige me jixomagateetedice ijoatawece nigijoa aneetici maditaga Aneotedogoji lotaganagaxi, miditaga nigijoa ane idí Moisés, miditaga nigijoa anoidi nigijoa anoyelogoditedibece Aneotedogoji lowooko, codaa midiwataga enaco.”

<sup>45</sup>Odaa ja yajigotediogi lixakedi moyowoogodi ane diitigi lotaganagaxi Aneotedogoji. <sup>46</sup>Odaa jegeetediogi, “Nigida diniditeloce Aneotedogoji lotaganagaxi, Nigijoa ane niwakatee Aneotedogoji me yewikatidi oko, ane Cristo, leeditibige me dawikode, codaa me yeleo, odaa yewigatace nige ixomagatedice itoatadigida nokododi. <sup>47</sup>Eledi diniditeloce nigijoa liigexedi moyelogoditiogi nigina oko me leeditibige modinilaatece libeyacegeco, odaa jogodopitalo Aneotedogoji me iwilegi laalegenali. Nigidi liigexedi oyelogodi niginoa nibodicetedi odatika liboonagadi Cristo, minataga inatawece noiigi, oyajela nigotaga Jerusalém. <sup>48</sup>Akaami nakataganadi nigijoa ane ininyaagi, odaa elogotitedibece nigijoa ananati! <sup>49</sup>Odaa digawini! Emegee iniwakateetibigagajitiwaji nigijoa Eiodi aneeteta. Pida ecogotace inaagoni nigotaga Jerusalém, nigepaagabaategetiwaji Liwigo Aneotedogoji ane icogotibigimece ditibigimedi ane yajigotagawa gadoniciwaga.”

### **Jesus opitedibigimece ditibigimedi**

*(Marcos 16.19-20; Atos 1.9-11)*

<sup>50</sup>Odaa Jesus ja yadeegitedicogi wetice nigotaga negepaa manitaga nigotakawaana Betânia. Naga nawacetedibige libaagatedi, odaa ja ibinietediogi. <sup>51</sup>Egidaagee me ibinietediogi, Jesus jaganojicetedice, odaa jogoyadeegitedibigimece ditibigimedi. <sup>52</sup>Nigijoa anodiotibece odogetetibigimece, odaa jogopitacicogi manitaga nigotaga Jerusalém, eliodi me ninitibigiwaji. <sup>53</sup>Odaa idioka limedi me ideiticoace minitaga Aneotedogoji ligeladi, modigaanagatibigimece, codaa modiniotagodetalo Aneotedogoji. Odaa jigidaagee. (Amém).